

Luk

Od Uyu Irouya

1 ¹Musei idi, amā atun erēb erēb wowā yen anī, ditotauf nigin age difen, ²are biya od nē kabī tamo uyulil dibod ken, meledim dilen anidi bun tamal, anī wogō difaman. ³Age fiya nigin, aya yug bagai, gariya bunem erēb wowā yen anī ganān amir ailen, are aya kisi afen, tamo odug Teofilus ō bun el fe, itotoya nigin biya bagai aun, ⁴anī bunem, ō erēb erēb difelnon are momoi yeya anī kelei youf.

Jon Naan Igunēdiya Tamo Gō Fiya Sā Mog, Anī Ket Wogō Yen

⁵Herod Judia nē king ibodon sain bun, pris taka ibodon, in yana Sekaraia, ī Abiya nē pris bun tamal taka, in aiwa Elisabet īg Aron nē ibor bun tamal. ⁶Idi urom Negur mala bun madur dibodon, idi Odug nē itāfiya ganān ado nun el de, tutuk dō difedig. ⁷Anī ere, idi urom kesu sā, ere nigin, Elisabet ī dali, kesu gō fiya kisi feleya sā, agef fen, idi urom tubau bagai.

⁸Sain taka bun, Sekaraia, ne kabī tura tar geid kabī dale mog, ī Negur nē pris kabī yale fen, ⁹pris idi neid tobonunā bunem, Odug nē tempel namen ile fen, aa gaula sumeī biya tō fiya nigin aisaī kodē bunem ī digirnen. ¹⁰Aa gaula sumeī biya tō fiya saine di, idi Odug yana dalesedig ganān mayarē kosē den.

¹¹Agef mog, Odug nē engel, ī bun wō ye, alta aa gaula sumeī biya tō fiyadig anī ima biyalē ifaren. ¹²Age fe di, Sekaraia ī ile fen, ī terē ye mā, kumī ye fen, dē yelen. ¹³Anī ere, engel ī irokenen, “Ō to kumī wo, Sekaraia, ogon kosēya are Negur ī karī yen. Ogon aiwā Elisabet ī, ogon kesu monog gō fouf, age fe di, in yana ū, Jon wouf. ¹⁴Ī bunem waū kulīya ado waū al fiya ō bun ibodōf, age fe di, musei ī gō fouf bun waud al fouf, ¹⁵ere nigin, Odug mala bun ī yana odug adouf, ī wain be, aai naan totol falei difef anīg to yāf, agef fen, ī sina namenem Awa Uur Fateulem aura fiyēf. ¹⁶Israel tamo kayau musei fau inim, Odug, nedi Negur wagen kel gurif irou ilauf. ¹⁷Agef fen, ī Eliya nē uur ado megeir bunem, Odug fau ileya sā mog, ī ket uyu irou ile fen, temeid tar, naaluid tar nigin waud

yenēf nigin ado, fe temeleid idi madur ibodōya nē kisi biya bun ileya nigin falei fe fen, tamo kayau Odug nē anidi saika fediyouf.”

¹⁸ Sekaraia engel to fiyen, “Naig afe fen, aya enei keleī youf? Aya neu kayau ado urom mabodok masi, tubau bagaiif.”

¹⁹ Engel aiten yale iron, “Aya Gabriel. Aya Negur mala bun afaredig, anī nigin, aya ō wogō yōya nigin ado, biya od enei irokonōya nigin sur fiyal.

²⁰ Anī gama ō ait ufokol fen, od to wogō wof ule, anī wō youf naa bun, ere nigin, ō neu od to momoi wol, od enei are fau yogon sain bun bagai, kaū wō youf.”

²¹ Age fe di, tamo kayau Sekaraia tari de fen, idi ī sain meluk tempel namen ibodon nigin kisi musei dalen. ²² Ī ulō yesin sain bun, ī wogō fiyēdiya kisi feleya san. Age fe di, idi kelein, ī tempel namen mala seleulā kurāf fen, ereb taka ilel, ere nigin, ī imam dogol ifelneid fen, ī wogōya sã ibodok ilen.

²³ In kabī nē sain bure fele di, ī fō bun kel ilen. ²⁴ Anī bure fele di, in aiwa Elisabet bou adon, agef fen, ogō faif ī iminkel ibodon. ²⁵ Ī iron, “Odugem enei age fanan. Naa eneidi bun, ī yogon oroya ado wau ifenēya ifelnan, agef fen, neu mama tamo kayau atun yalelkanan.”

Jesus Gō Fiya Sã Mog, Anī Ket Wogō Yen

²⁶ Ogō sigis bun, Negur, engel Gabriel Nasaret taun, oun Galili teneub, sur fiyē di, ile, ²⁷ kayau taulei, tamo yana Josef, Dawid nē ibor bun tamalem yalouf nigin digirin gein ilen. Kayau taulei yana Maria. ²⁸ Engel ī gein ile fen, iron, “Fel, ō nigin Negur fatuk el yok. Odug ō ado ibodok.”

²⁹ Maria in od nigin wau fatuk togu fen, aanya enei naig fiya nigin ye fen, kisi musei yalen. ³⁰ Anī ere, engel ī irokenen, “Maria, ō to kumī wo, ō Negur nē wau el fiya gurug wol. ³¹ Ō fau kesu ado fen, kesu monog gō wouf, ago fen, yana ũ, Jesus wouf. ³² Ī fau odug wō ye di, Negur Ilun Bagai Naal douf. Negur Odug yogo, king nē modoū tama Dawid nē anī, ī ifenēf. ³³ Age fe di, ī Jakop nē ibor bun king gai ibodkalauf, in tano to sa kalauf.”

³⁴ Maria engel to fiyen, “Aya fau mois, eī naig fe wō youf?”

³⁵ Engel ī aiten yale iron, “Awa Uur Fateul ō bun isiyouf, age fe di, Negur Ilun Bagai nē megeir kerub yōf. Anī bunem fateul bagai gō wouf are, yana Negur Naal douf. ³⁶ Ogon sirag Elisabeteg tubau mog, kesu yalouf, ī dali den, anī mogo ogō sigis ī bou ado ibodok. ³⁷ Ere nigin, ereb taka anī Negur bun malai sã.”

³⁸ Maria ī aiten yale iron, “Aya Odug nē kabī kayau, aya bun od sã, ō urok kilei od sã agef wō youf.” Age ye di, engel ī itornē ilen.

Maria Elisabet Ki Fiyen

³⁹ Sain anī bun, Maria dodok fel, kaisã bagai taun taka arei bun, Judia distrik nediwon ilen. ⁴⁰ An ī Sekaraia nē fō bun wō ye fen, Elisabet fel

fiyen. ⁴¹Sain Elisabet Maria nē fel ya anī karī ye fen, kesu sina namen ibodon anī okī yen, age fe di, Elisabet Awa Uur Fateulem aura fiyen. ⁴²Ī ait odugem iweig iron, “Kayau ganan atun, Negur ō el yok. Agef fen, kesu gō wouf anīg, Negur ī el fiyek! ⁴³Anī ere, aya naig fiya bagai nigin, neu Odug nē sina anī aya bun isif? ⁴⁴Ogon fel ya nē ait wederoun ile mog bagai, momou nameun al fe fen, okī yel. ⁴⁵Kayau taka, ī ereb Odug ī irokenek are agef kisi fel wō youf, ye fen, momoi yef, are Negur ī el fiyek!”

Maria Nē Seg

⁴⁶Age fe di, Maria iron:

“Neu malaukanon Odug yana yalesef,

⁴⁷ agef fen, neu uur Negur Isennaya nigin kulī yef,

⁴⁸ ere nigin, ī, aya yogon kabī kayau maleg nigin kisi fatuk yalen.

Sain enei bunem ilauf ganan, ibor ganan Negur ī el fiyen douf,

⁴⁹ ere nigin, Negur Megeir Barikā ī aya bun ereb odug age fel, ī yana fateul ibodok.

⁵⁰ In wau yūya, ī nigin anini def bun tobol fouf, ibor gama ibodok enei ado, dumen isiyouf idi buneg gai gai ibodkalauf.

⁵¹ Ī yogo imam kabī total odug biya age fedin, ī idi neid kisi bun yeneid dalesef anī irudi di, firagagaū difen.

⁵² Ī yeneid adodo, nedi modoū bun yalelneid fen, maleg anī yalesnēdin.

⁵³ Ī idi naū fedif anī, ereb ereb biya ifeneid fen, idi safineid adodo daku irudin.

⁵⁴ Ī amā tubumā tar irokenēdin kilei, ī yogon kabī tamo Israel isennen,

⁵⁵ agef fen, Abraham ado in ibor nē tubu tar bun faimud, wau yūya ifenēdiya nigin karī yeledig.”

⁵⁶Maria, Elisabet ado ogō towo age fiya dibod ken, fō bun kel ilen.

Jon Naan Igunēdiya Tamo Gō Fen

⁵⁷Elisabet nē kesu gō fiya sain wō ye di, ī kesu monog gō fen. ⁵⁸Ī ne tā tar, in sirag tar geid, Negur nē wau yūya odug ifelnen anī karī de fen, idi weim waud al fen.

⁵⁹Naa eit bun, idi mulū nigin kesu bou gudū fiya nigin disin, age de fen, ī yana dū, tama nē dait Sekaraia douf nigin age difen. ⁶⁰Anī ere, ne sina aitedin yale iron, “Age fiya sā! Ī yana Jon ye yauf.”

⁶¹Idi ī dirokenen, “Ogon sirag tar atun, yana age fiya taka sā.”

⁶²Age de fen, in tama bun kesu yana aib youf anī karī douf nigin, uris difenen.

⁶³Age dife di, ī itotoya nē safina nigin to fiyēdin, agef fen, “Ī yana Jon,” ye itoto

di, idi ganan terē den. ⁶⁴Sain anī bun bagai, ī awa kakā ye di, bale faraf yale ulō yalaisi di, ī wogō ye fen, Negur yana yalesen. ⁶⁵Ne tā tar terē de fen, anini den, age de fen, Judia neid arein, fonō fonō wogagā de fen, ereb wō yen anī ganan wogō den. ⁶⁶Adok anī karī de fen, kisi musei dale fen, to difen, “Kesu enei naig fiya wō youf?” Ere nigin, Odug nē ima ī bun ibodon.

Sekaraia Nē Seg

⁶⁷In tama Sekaraia Awa Uur Fateulem aura fiyē di, ī profet od eig ye wogō yen:

⁶⁸“Odug seli tabiyouf, Israel neid Negur,

ere nigin, ī isi fen, in tamo kayau kafī fiya bun tamal kel gei fel.

⁶⁹Ī yogon kabī tamo Dawid nē fō bun,

isennadaya megeir ado yalesel ifaref,

⁷⁰(are ī yogon profet fateul kulu temeleid sigoreid bun wogō den kilei).

⁷¹Nemā kiwai tar ado,

amā nigin to orodif anī imeid bun tamal, kel yalemāf.

⁷²Nemā tamamā tar nigin wau yūya anī ifelneid fen,

ī yogon bar itenēya fateul anī karī yelen.

⁷³Ī wau kuturol fen, nemā tamamā Abraham irokenen.

⁷⁴Nemā kiwai tar imeid bun tamal kel gei famāf,

agef fen, amā kumī sā ī aruna yaleya kisi falauf nigin.

⁷⁵Amā nemā mabodok malauf bun, ī mala bun gai fateul bagai fen,

madur bagai mabodōf nigin.

⁷⁶“Age fe di, ō neu kesu, Negur Ilun Bagai nē profet douf,

ere nigin, ō uyu urou fen, Odug nē naab dodok wouf.

⁷⁷In tamo kayau neid mosor nigin wedereid tu kalauf bunem,

kel yalediyouf nē keleī wenēdiyouf.

⁷⁸Are nemā Negur molol nem wau yūya bunem,

anī bun gaa kurā fiya, saa ilunem amā bun isiyouf.

⁷⁹Are idi gugum bun difaref ado,

laa nē buri bun difaref anidi bun, fula fouf,

age fe di, nemā yemā delē anidi bun madur marā di, wau inosiya bun malauf.”

⁸⁰Age fe di, kesu biya fen, uur orib yen, ī gerere tuan ibodok ile, dum ī Israel tamo kayau meleid bun wō yen.

Jesus Gō Fen

(Matyu 1:18-25)

2 ¹Sain anī bun, Sisa^a Ogastus, Rom teneub ganan bun, tamo kayau an temeleid anī yeneid yaleya nigin od inon. ²(Eī urug bagai, sain Kwirinius

^a 2:1 Rom neid king odug.

ĩ Siria nẽ gawaman mudur ibod mog, tamo kayau yeneid dalen.)³ Anĩ nigin, ganan dogo dogo neid taun bun yeneid inoya nigin dilen.

⁴Anĩ nigin, Josef ĩg, oun Galili teneub Nasaret taun bun tamal Judia iselen, Betlehem Dawid nẽ taun bun iselen, ere nigin, ĩ Dawid nẽ fonõ ado in ibor bun tamal. ⁵Ĩ Maria ado yeneid dinouf nigin diselen, ĩ Maria aiwauƒ nigin digirin, anĩ ĩ bou ado. ⁶Idi an dibod mog, kesu gõ fiya sain wõ yen. ⁷Age fe di, kesu monog matu gõ fen. Maria ĩ gabar nem silef fen, yaro neid beĩ bun inenen, ere nigin, tamo irouya fõ bun modoũ isokosen.

Gaar Lo Fediya Tamo, Engel Geid

⁸An gaar lo fediya tamo, melsã fonõ yerin dibod ken, bõ nedi gaar lo difedin. ⁹Age de mog, Odug nẽ engel idi bun wõ yen, age fe di, Odug nẽ fula fiya medeĩya kerub fedĩ di, idi kumĩ tererẽ den. ¹⁰Anĩ ere, engel idi irokenẽdin, “Ã to kumĩ wog, aya od biya, tamo kayau ganan waud al fouf nigin arou asif. ¹¹Ere nigin, gama Dawid nẽ taun bun, āgenei isenneĩya wõ yel, ĩ anĩ Kristus Odug. ¹²Enei ā bun uris. Ã momou taka gabar nem sile de fen, yaro neid beĩ bun dinenem yenek anĩ ulougouf.”

¹³Kaisã bagai, engel musei saa ilun temeleid ulolõ deis, engel anĩ geid Negur yana dales diron,

¹⁴“Negur ilun bagai bun fula fiya medeĩya, age fe di, tenebur ein tamo kayau ĩ el fedif bun, wau inosiya ibodõf.”

¹⁵Sain engel idi ditorneĩd, saa ilun disele di, gaar lo fiya tamo abob dirokenen, “Odug ada irokanadal anĩ nigin, ada Betlehem teleg, ereb wõ yel anĩ taileg.”

¹⁶Anĩ nigin, idi kaisã bagai dile, Maria, Josef ado diledin, momou yaro neid beĩ bun yen mog, dilen. ¹⁷Idi ĩ dile fen, idi kesu anĩ nigin wogõ fiyẽdin anĩ od wogõ de diyon. ¹⁸Age dife di, ganan karĩ den idi, gaar lo fiya tamo wogõ difiyẽdin anĩ nigin terẽ den. ¹⁹Anĩ ere, Maria od anĩ ganan yale fen, waun ino fen, kisim dogol fen. ²⁰Gaar lo fiya tamo keku de fen, idi wogõ fiyẽdin kilei, ereb idi karĩ den ado dilen anĩ ganan nigin, Negur seli dabi fen, yana dalesen.

Jesus Tempel Bun Dirou Dilen

²¹Naa eit bun, ĩ mulũ ileyã saine di, ĩ yana dũ, Jesus den, yana are sina fau bou ado ya sã mog, engelem yun.

²²Idi neid nonorou lilik fiya naa, Moses nẽ Lo ifaref kilei anĩ bure fele di, Josef Maria ado, Jesus Jerusalem, Odug ifenẽya nigin dirou diselen, ²³(are Odug nẽ Lo itotoya bun ibodok kilei, “Kesu matu monog wõ douf ganan, Odug wenẽdigouf”^b), ²⁴idi Negur sesewi fiya difenẽf nigin diselen, Odug nẽ Lo eig ye irok kilei, “kuburir uru be, kukutir balas uru be.”^c

^b 2:23 Eksodas 13:2, 12 ^c 2:23 Levitikas 12:8

²⁵Gama Jerusalem an tamo yana Simeon ibodon, ĩ madur bagai fen, Odug nigin karĩ yeledig. ĩ Israel waud inosiya dalouf anĩ tari fedig, Awa Uur Fateul ĩ bun ibodon. ²⁶Awa Uur Fateulem, ĩ fau to laaf mog, Odug nē Kristus wō ye di, ilouf nigin irokenen. ²⁷Awa Uurem toli fiyē di, ĩ tempel nē modoũ bun ilen. Sain tama sina ado, Lo irok kilei age difouf nigin, kesu Jesus dirou dile di, ²⁸Simeon imam ĩ yales fen, Negur yana yales iron:

²⁹“Odug, ō uron kilei, ō gama ogon ferfer wau inosiya ado sur wo di, ilauf.

³⁰Aya malaum bagai ogon isennēya anĩ ailel.

³¹Are ganan meleid bun saika won.

³²Are haiden Israel sā anidi bun, Negur nē oroya kurō falaisiya nē lalan, ago di, are ogon tamo kayau Israel bun fula fiya medeīya.”

³³Kesu tama sina ado, od anĩ karĩ de fen, kisi bun terefeit den. ³⁴Age dife di, Simeon el fiya ifeneīd fen, sina Maria irokenen, “Kesu enĩ, Israel tamo kayau musei kuku douf, musei fafā douf nigin ado, ĩ daũ gen ifare di, ĩ dumen od sane dirōf nē uris wō youf nigin igirnen. ³⁵Anĩ bunem, musei waud bun dinokok are yaorouf. Age fe di, ogon malākanon anig dig otem borũ fouf.” ³⁶Profet kayau takag ibodon, Ana, Fanuel ne barai, Aser nē ibor bun tamal. ĩ gai tubau bagai, ĩ tamo yale fen, aiwa ado yar sewen dibodon. ³⁷Agef fen, ĩ waab ibodok ile, in yar eiti-fo. ĩ tempel to itoron, bō ado gaa ado kuri ye fen, kosē ye, Negur yana yalesedig. ³⁸Sain anĩ bun bagai, ĩ idi gein isel, Negur de fiye ken, Jerusalem tamo kayau kafĩ fiya bun tamal kel yalediyouf nigin ganan tari de difaren anidi, kesu anĩ nigin wogō fiyēdin.

³⁹Josef, Maria ado, Odug nē Lo irok anĩ ganan dō de kisi fele di, idi baban ke de, Galili teneub oun, nedi taun Nasaret dilen. ⁴⁰An, kesu ĩ biya fen, total adon, ĩ kisi biya barikan, agef fen, Negur nē wau ifenēya ĩ bun ibodon.

Jesus Kesun Tempel Bun Ilen

⁴¹Yar ganan bun, in tama sina Pasa Sifa naa bun Jerusalem taun diledig. ⁴²Sain ĩ tuwelf yar mog, idi neid tobonunā dō de fen, Sifa bun diselen. ⁴³Sifa bure fele di, in tama sina fonō ke de dile mog, kesu Jesus ĩ fau Jerusalem ibodon, anĩ ere, idi to kelein. ⁴⁴Idi weim melef den, age de fen, naa tekelei diyon. Age dife fen, idi mogo nedi sirag tar bun ado, nedi tā tar atun dimirnen. ⁴⁵Idi ĩ to dile mā, idi ĩ dimirnē fenē nigin, Jerusalem taun baban ke de dilen. ⁴⁶Naa towo bure fele di, idi ĩ tempel modoũ bun ifelnēdiya tamo atun ibod, karĩ fiyeīd fen, to fiyeīd mog, fotou difiyen. ⁴⁷Ganan ĩ karĩ difiyen are, in karīya nigin ado aiteid solo fen anĩ nigin, terefeit den. ⁴⁸Tama sina ado ĩ dile fen, fatuk bagai terē den. Sina ĩ irokenen, “Neu kesu, ere nigin eig wamam? Aya tamā ado waumā morō ken, mamirnom.”

49Ĩ to fen, “Ere nigin ā aya umirnegel? Aya neu Dei nē fō bun abodōf ya, ā keleī sā de?” 50Anī ere, ĩ ereb irokenēdin are, idi to kelein.

51Age dife di, ĩ weim Nasaret disil fen, sigoreid dōf el fen. Anī ere, in sina anī ganan yale, waun inon. 52Jesus kisi biya ado bouwa orib yen, Negur ado tamo nē lo fiya bun biya len.

Jon Naan Igunēdiya Tamo Naab Dodok Fenen

(*Matyu 3:1-12; Mak 1:1-8; Jon 1:19-28*)

3 1Taiberius, Sisa mudur ibodon yar fiftin bun, Pontius Pailat ĩ Judia distrik nē gawaman mudur ibodon, Herod ĩ Galili distrik lo fen, ĩ tura Filip Ituria distrik ado Trakonitis distrik lo fen, age fe di, Lisania ĩ Abilene distrik lo fen. 2Anas Kaiafas ado pris mudur dibodon sain bun, Negur nē od gerere tuan oun Jon, Sekaraia naal bun isin. 3Ĩ Jordan naan kalilī fiya ganan bun iyo ken, waud falei de fen, naan digū di, mosor yalel kenēdiyof nigin biya od wogō yen. 4Are profet Asaia nē itotoya bun ibodok kilei: “Ait taka gerere tuan iweig irok, ‘Odug nē naab dodok ge fen, madur wenēg. 5Uus ganan bun kurokiriya yoso fouf, arei ganan mudu ganan ado gudū falaisi tenebur ouf. Naab goigul yedin, madur fouf, naab kouki yediya yoso fediyof. 6Age fe di, tamo kayau ganan, Negur nē tamo kayau kel gei fiya anī dilouf.’ ”^d

7Tamo kayau Jonem naan igunēdiyof nigin guru difen anidi Jon irokenēdin, “Ā, gogour sane gere tar! Negur nē didi isiyof anī wal ge fen, uyagauf nigin, aim irokenein? 8Wauī falei gef are, faat biya ū gouf. Ā aug nigin to eig ge urōg, ‘Abraham nemā tamamā.’ Aya arokeneik, meein enidi Negur sā irō di, Abraham gere tar wowā douf. 9Safor aayū gariyan mogo ibodok, aayū ganan faat biya to yuk, are itu ira ken, yā malan irāf.”

10Tamo kayau guru difen anidim to difen, “Age fiyauf are, amā naig mafouf?” 11Jon aitedin yale iron, “Tamo ĩ gabar uru adouf are, aib ĩ sā anī taka ifenēf, takag, taka ĩ saaf adouf, areg de age foug.”

12Takis yaleya tamog, naan igūya nigin disin, idi to difen, “Tise, amā ere naig mafouf?”

13Ĩ irokenēdin, “Ā yaleya kilei anī to wal woseg waleg.” 14Age fe di, kusī tamo tunī to difiyen, “Ba amā ere naig mafouf?” Age de di, ĩ iron, “Ā nedi moni nigin ge fen, to fefu wiyēdig fen, idegēya bunem tamo kayau bouweid bun od to ūg. Āgenei kabī mala walegedig anī bun dogol al gouf.”

15Tamo kayau Kristus nigin tari difen, anī nigin, idi ganan waud bun Jon anī Kristus be de fen, kisi musei dalen. 16Jon idi ganan aitedin yale irokenēdin, “Aya naan nem naan aguneik. Anī ere, taka ĩ in megeir neu wal fiya fau isif, aya to biya nigin, ayam in su nē malū biru felediya

^d 3:6 Asaia 40:3-5

kisi feleya sã. Ì Awa Uur Fateul yã ado nem naan iguneif. 17Ì es fiya nẽ fok iman ado, ì yogon mayã waĩ foug, yogon wit biya are yogon ki bun kuruf fen, wit ido yã mala faimud bun an irãf.” 18Agef fen, Jon od musei bunem, tamo kayau waud yale fen, biya od wogõ fiyẽdin.

19Anĩ ere, Jonem, Herod tano anĩ nẽ mudur, tura nẽ aiwa Herodias nigin ado ereb ereb sane ganan age fen nigin ou fiyẽ di, 20Herod mosor ganan mosor enei ado baguf fen, ì Jon kalabus bun inenen.

Jesus Naan Igun Ado In Ibor Nigin (Matyu 1:1-17; 3:13-17; Mak 1:9-11)

21Sain Jonem tamo kayau ganan naan iguneid fen, Jesus ig naan igunen. Age fe di, Jesus kosẽ ye mog, saa kã fele di, 22Awa Uur Fateul kuburir bouwa bun genem ì bun isin. Age fe di, ait taka saa ilunem isin, “Õ neu Kesu, õ nigin aya wau laa fedig, õ nigin aya wau kulĩ yedig.”

23Gama Jesus yogo ì yar teti age fiya bun kabĩ gariya inon. Tamo kayau kisi difen, ì Josef naal den,

Heli naal, 24Matat naal,

Lewi naal, Melki naal,

Janai naal, Josef naal,

25Matatias naal, Amos naal,

Nahum naal, Esli naal,

Nagai naal, 26Mat naal,

Matatias naal, Semen naal,

Josek naal, Joda naal,

27Joanan naal, Resa naal,

Serubabel naal, Sieltiel naal,

Neri naal, 28Melki naal,

Adi naal, Kosam naal,

Elmadam naal, Er naal,

29Josua naal, Elieser naal,

Jorim naal, Matat naal,

Lewi naal, 30Simeon naal,

Juda naal, Josef naal,

Jonam naal, Eliakim naal,

31Melea naal, Mena naal,

Matata naal, Natan naal,

Dawid naal, 32Jesi naal,

Obed naal, Boas naal,

Salmon naal, Nason naal,

33Aminadab naal, Ram naal,

Hesron naal, Peres naal,

Juda naal, 34Jakop naal,

Isak naal, Abraham naal,

Tera naal, Nahor naal,
 35 Serug naal, Reu naal,
 Peleg naal, Eber naal,
 Sela naal, 36 Kainan naal,
 Arpaksad naal, Sem naal,
 Noa naal, Lamek naal,
 37 Metusela naal, Enok naal,
 Jared naal, Mahalalel naal,
 Kenan naal, 38 Enos naal,
 Set naal, Adam naal,
 Negur naal.

Satan Jesus Kisi Fiyen
(Matyu 4:1-11; Mak 1:12, 13)

4 ¹Jesus Awa Uur Fateulem aura fiyen, Jordan naanum kel fen, Awa Uurem itonē, gerere tuan irou ilen. ²An ī naa foti ibod mog, Satanem kisi fiyen. Ī sain anī bun ereb taka to yon, naa foti bure fele di, ĩ naū fen.

³Agef mog, Satanem Jesus irokenen, “Ō Negur Naal ouf are, meein enei urokenē di, bret falei fouf.”

⁴Jesus Satan aiten yale iron, “Negur nē Itotoya bun eig ye irok, ‘Tamo bretem dogol to mata ifenēf.’^e”

⁵Satan Jesus yale irou, modoū ilun isel fen, kaisā bagai teneub enei nē tano ganan ifelnen. ⁶Agef fen, Satan Jesus irokenen, “Aya ō teneub enei nē biya fiya megeir ado ganan afonōf, ere nigin, are aya ifanan, anī nigin, aya aib taka ifenēya orouf are afenēf. ⁷Anī nigin, ō aya selu wabiyouf are, onou ganan are ogon ouf.”

⁸Jesus Satan aiten yale iron, “Negur nē Itotoya bun eig ye irok, ‘Odug ogon Negur seli wabi fen, ĩ dogol aruna walouf.’^f”

⁹Satan Jesus yale irou, Jerusalem taun ilen, an tempel fō soko ilun bagai inenē, ifaren. Satan iron, “Ō Negur Naal ouf are, ogo einenem ufū urā. ¹⁰Ere nigin, Negur nē Itotoya bun eig ye irok:

“Negur ō nigin yogon engel ari fedī di,
 kulatun diyōf,

¹¹idi ō imedim ololon daleyōf,
 age dife di, ō yē meein takam to itutu ouf.’^g”

¹²Jesus Satan aiten yale iron, “Eig ye irok, ‘Odug ogon Negur kisi fiya bun to unenē.’^h”

¹³Satan kisi fiya enei ganān bure fel fen, ĩ Jesus itorne ken, ĩ fau sain taka anī tari fen.

^e 4:4 Diuteronomi 8:3 ^f 4:8 Diuteronomi 6:13 ^g 4:11 Sam 91:11, 12 ^h 4:12 Diuteronomi 6:16

Nasaret Tamo Kayau Idi Jesus Dudum Difiyen
(*Matyu 4:12-17; Mak 1:14, 15*)

¹⁴Jesus Awa Uur nē megeir bunem Galili kel ilen, age fe di, ī nigin od Galili teneub fonō fonō ganan iyokelen. ¹⁵Ī idi neid uub fō fō bun biya od ifelnēdi di, ganan ī yana dalesen.

¹⁶Ī Nasaret ilen, ī an biyan nē, agef fen, Sabat naaⁱ bun, idi neid uub fō namen ilen, gai age fedig gen. Agef fen, ī iwesauf nigin fā ye ifaren. ¹⁷Age fe di, profet Asaia nē itotoya buk kori fiya anī difenen, age dife di, ī fara fel fen, eig ye itoton anī imiren:

¹⁸“Odug nē Awa Uur aya bun ibodok,
ere nigin, ī aya maleg anidi biya od wogō afediyouf nigin, igrina
fen,
mudurou bun mouf fi felen.

Ī, aya kalabus bun difaref anidi karika dalouf nigin ado,
meleid ifofakeleya anidi meleid fara falauf nigin, kurō afalaisiyouf
nigin sur fiyan.

Tamo kayau tunim kiwai difeneid fen, morō difenēdif anidi yalel
kenēdiya nigin sur fiyan.

¹⁹ Takag, Odug nē biya fiya nē yar anī kurō afalaisiyouf nigin sur
fiyan.”^j

²⁰Age yel fen, ī gaar gabar itotoya ado are korif fen, itotoya anī lo fedig tamo, kel ifen ken, ibodon. Juda neid uub fō anī bun difaren ganan bagai, Jesus lo difelen. ²¹Age dife di, ī gariya ino fen, irokenēdin, “Gama naa enī bun, Negur nē Itotoya enei, āgenei kariya bun kisi felel.”

²²Ganan ī yana dales fen, ī sigoron, wau ifenēya od wogō yen anī nigin terē den. Age de fen, idi to difen, “Eī Josef naal anī sā de?”

²³Jesus idi irokenēdin, “Momoi bagai, aya nigin od enei tamo kayau musei wogō dedig wogō gouf, ‘Dokta, ō ogo ogon dagi el wo! Ereb Kapenaum taun oun agon karī maun anī, ogon fō gariyan ein ago wo.’ ”

²⁴Ī od tobol fe fen, iron, “Aya ā momoi arokeneik, profet taka ī yogon fō gariyan to karī difiyēf. ²⁵Aya ā momoi bagai arokeneik, Eliya nē sain bun, Israel oun kayau waab musei difar mog, yar towo ogō sigis saa katī fele di, teneub ganan bun uyē sā naū odug difaren. ²⁶Age de mog, Negur idi anidi taka bun Eliya to sur fen, anī ere, waab taka Sarefat oun Saidon teneub bun sur fen. ²⁷Takag, Israel oun profet Elisa nē sain bun, musei lepra dagi ado dibodon, anī ere, idi atun taka lepra dagi to loko felen, Naman, Siria tamalem dogol.”

²⁸Juda neid uub fō bun, ganan anī karī de fen, waud sanen. ²⁹Age de fen, idi fafā de fen, ī taun anī itor ilauf nigin dirun. Nedi taun are, arei

ⁱ 4:16 Juda neid uub naa, are Sarere. ^j 4:19 Asaia 61:1, 2

bun nigin, siya sane bun dirāf nigin dirou dilen. ³⁰Anī ere, ī tamo kayau atu iyok ile fen, yogon naab ilauf nē anī dōf ilen.

Jesus Kaa Sane Irun

(Mak 1:21-28)

³¹Agef fen, ī Kapenaum taun isilen, taun are Galili distrik bun ibodok, an Sabat naa bun, ī tamo kayau ifelnēdiya gariya inon. ³²Idi ī ifelnēdin anī nigin terē den, ere nigin, in od wogōya are megeir ado.

³³Juda neid uub fō bun, tamo taka kaa sanem irounen anī an ibodon. Ī ait ilun feis iweig iron, ³⁴“O, Jesus Nasaret tamal, ō amā ere naig wamā fenē? Ō amā daū wamā fenē nigin usil de? Aya ō nigin keleī, Negur nē Fateul anī!”

³⁵Jesus totul ado iron, “Foro wol! Ī namen tamal ulō weis!” Age ye di, kaa sane anī, tamo kayau ganan atun, tamo anī tou fiyē ira ken, ulō yeis ilen, tamo are bouwa to daū fen.

³⁶Tamo kayau ganan terē de fen, abob dirokenen, “Eī ere keleī eig fiya? Ī yana megeir adom irō di, kaa sesen ulō deis dilef.” ³⁷Anī bunem, ī nigin od teneub anī kalilī fiya ganan bun iyokelen.

Jesus Musei El Fedin

(Matyu 8:14-17; Mak 1:29-39)

³⁸Jesus Juda neid uub fō itor ken, Simon nē fō bun ilen. Simon nē mam, ī bouwa uruwa odug ado nigin yenen anī, isennēf nigin Jesus to difiyen. ³⁹Anī nigin, Jesus ī itirne ken, bouwa uruwa dagi ou fiyē di, itornen. Age fe di, kayau anī kaisā bagai fā yale, aruneid yalen.

⁴⁰Gaa kuru kel mog, tamo kayau, dagi tamo dagi gariya fire fire adodo ganan, Jesus wagen guri difeid disin, age dife di, idi mugu mugu bun ima tetedin ino fen, ī idi el fedin. ⁴¹Kaa sesen, tamo kayau musei bun, ulolō deis fen, diweig diron, “Ō anī Negur Naal!” Anī ere, ī sakā fiyeid fen, to wogō douf nigin sigoreid ifofan, ere nigin, idi keleī, ī Kristus.

⁴²Bonimeigugum ado, Jesus moilin ilen. Tamo kayau ī dimirnek dile, ī ibodon nē disi fen, ī idi to itornēdiyof nigin katū difiyen. ⁴³Anī ere, ī iron, “Aya Negur nē tano nigin biya od, taun taka takag wogō auf, ere nigin, aya anī nigin sur fiyan.” ⁴⁴Age ye fen, ī Judia distrik oun Juda neid uub fō fō bun, biya od wogō yef iyon.

In Dō Fiya Tar Enidi Ket Jesus Iweignēdin

(Matyu 4:18-22; Mak 1:16-20)

5 ¹Naa taka bun, Jesus Genesaret daliyou^k yerin ifaren. Agef mog, tamo kayau ī salili difiye ken, Negur nē od wogō ye di, karī de difar

^k 5:1 Are, Galili Maaī.

mog anī, ²ī mala ira kel, waag uru naan yerin difar mog, ilen, are gau yaleya tamom an ditor yen ken, nedi kakāg kulo difen. ³Ī waag anidi taka bun sō yen, are Simon nē waag, agef fen, waag naanū naal godof irou ilauf nigin to fiyen. Agef fen, ĩ waag bun ibod ken, tamo kayau biya od ifelnēdin.

⁴Sain ĩ wogōya bure fel fen, ĩ Simon irokenen, “Waag naan mala bun urou ule fen, gau yaleya nigin kakāg urofosil.”

⁵Simon aiten yale iron, “Odug, amā bō odug kabī total malel, anī ere, ereb taka to malel. Anī ere, ō urok nigin aya kakāg baban arofosilauf.”

⁶Sain idi age difen, idi gau musei bagai gei difen, age dife di, nedi kakāg serek fou fenē melsan. ⁷Anī nigin, idi, nedi tā tar waag taka bun temeleid disi disennēdiyof nigin, gale difiyēdin, age dife di, disi, waag uru bun gau dife isokos fen, waag uru are dimutū fenē melsan.

⁸Sain Simon Pita enī ile fen, Jesus iboron bobou fe fen, iron, “Odug, aya utorna ule, aya mosor nē tamo!” ⁹Ere nigin, ĩ ne tā tar geid gau gei difen anī nigin, terefeit den. ¹⁰Sebedi gere tar Jems Jon ado, are Simon ne kabī tura tar idig age difen. Age dife di, Jesus Simon irokenen, “Ō to kumī wo, gama naa enī bunem ilauf ganan, ō tamo gei wouf.” ¹¹Age fe di, idi neid waag fiteiwō didī dife di, isel fen, ereb ereb ganan ditorara ken, Jesus dō difen.

Tamo Lepra Dagi Ado (*Matyu 8:1-4; Mak 1:40-45*)

¹²Jesus taun taka bun ibod mog, tamo taka lepra guruma barikā anī isin. Sain ĩ Jesus ile fen, ĩ tenebur kubū ye kumokur fe, Jesus igone ken, iron, “Odug, ō oroyōf are, el wiyauf.”

¹³Jesus ima irā, tamo anī kobū fiye ken, iron, “Aya wau irok, ō bouwā biyauwā.” Age ye di, kaisā bagai, lepra dagi ĩ itornen.

¹⁴Agef fen, Jesus tamo anī irokenen, “Ō aib taka to urokenēf, anī ere, ō pris wagen ule, ō bouwā ufelnef, ō bouwā biyal anī nigin Moses nē od irok anī dō fen, sesewi fiya wenēf, anī bunem yaore di, tamo kayau dilouf.”

¹⁵Anī ere, ĩ nigin od fau fau iyok ilen, anī nigin, tamo kayau musei ĩ karī difiye ken, idi neid dagi yalel kenēdiyof nigin disin. ¹⁶Anī ere, Jesus sain taka taka moilin ile fen, kosē yedig.

Jesus Tamo Bouwa Ilolaisin Anī El Fiyen (*Matyu 9:1-8; Mak 2:1-12*)

¹⁷Naa taka bun, ĩ biya od ifelneid mog, Farisia tamo, lo ifelnēdiya tamo geid, Galili distrik fonō ganan, Judia distrik ado Jerusalem temeleid idi an dibodon. Age de mog, dagi el fediyof nigin Odug nē megeir, ĩ bun ibodon. ¹⁸Tamo tunī, tamo ilolaisin anī, gabgab bun faali de dirou disi,

Jesus wagen dinenēf nigin fō namen dirou dilau fenē age difen. ¹⁹Idi anī age fiya nigin naab taka to dilen, ere nigin, tamo kayau ino yalen, idi fō sokoron disel, soko korō difel fen, ī gabgab ado folo folō dife di, tamo kayau atun, Jesus wagen bagai isilen.

²⁰Jesus idi neid momoiya ile fen, ī iron, “Mou, ogon mosor alelkonok.”

²¹Farisia tamo, lo ifelnēdiya tamo geid, idi dogo namedin kisi difen, “Eī aim bagai, kono fiya od wogō yef? Taka nem mosor yaleleya to yenek, Negur yogo dogol.”

²²Jesus idi kisi difen anī kelei ken, to fen, “Ā ere nigin nameī bun agog kisi gef? ²³Od nanī anī aya wogōya nigin karika, ‘Ogon mosor alelkonok’ de, ‘Fā wale fen, uyok ule’? ²⁴Anī ere, Tamo Naal ī tenebur ein mosor yaleleya nigin yana ado anī, ā kelei youf nigin...” Ī tamo ilolaisin anī irokenen, “Aya ō arokonok, fā wo, ogon gabgab wale fen, fonō ule.” ²⁵Age ye mog bagai, ī fā ye, idi wagedin ifaren, yogon yenen gabgab yale, Negur yana yalesef, fonō ilen. ²⁶Ganan terē de fen, Negur yana dalesen. Idi waud bun terefeit ye fen, diron, “Ada gama tobonunā fire bagai tailer.”

Jesus Lewi Iweignen

(Matyu 9:9-13; Mak 2:13-17)

²⁷Enei bure fel fen, Jesus ile, takis yaleya tamo yana Lewi, an yogon takis yaleya fō bun ibod mog, ilen. Jesus ī irokenen, “Aya dō wiya.” ²⁸Age ye di, Lewi fā ye, ereb ereb adok itor yen, Jesus dō fiyen.

²⁹Agef fen, Lewi yogon fō bun, Jesus nē saaf odug yabi di, takis yaleya tamo musei, tunī geid weim saaf don. ³⁰Anī ere, Farisia tamo, idi neid lo ifelnēdiya tamo geid, Jesus nē dō fiya tar bun nauseir den, “Ā ere nigin takis yaleya tamo, mosor adodo geid, saaf ado naan wōgef?”

³¹Jesus idi aitedin yale iron, “Dagi sā anidim dokta nigin waud to yenēdig, dagi adodom dogol. ³²Aya madur tamo anidi iweignēdiya nigin to asin, mosor adodo tamo anidi waud falei douf nigin asin.”

Kuriya Nigin Jesus To Difiyen

(Matyu 9:14-17; Mak 2:18-22)

³³Farisia tamo idi ī dirokenen, “Jon nē dō fiya tar, idi kuri de fen, kosē dedig, Farisia tamo neid dō fiya tar idig age fiya, anī ere, ogon idi dobu dirak.”

³⁴Jesus aitedin yale iron, “Mois ī fau ne tā tar weim dibod mog, ā ne tā tar idi kuriya nigin urokenēdigouf anī kisi feleya de? ³⁵Anī ere, naa fau isi di, anī bun mois tamo idi bun tamal yalelnē di, naa anidi bun idi kuri douf.”

³⁶Jesus yaab od enei idi irokenēdin, “Taka nem gabar masak mata serek fe fen, gabar tubu bun to iwadig. Ī age foug are, ī gabar mata anī

serek fouf, takag, gabar mata bun tamal masak are tubu anī ado to susu falauf. ³⁷Takag, taka nem wain mata meme gabar^l tubu bun to itinēf. Ī age fouf are, wain mata anī, meme gabar gē ye fen, serek fouf. Age fe di, wain anī oho yeis fen, meme gabar sane lauf. ³⁸Age fiya sā, wain mata, meme gabar mata bun itinēf. ³⁹Agef fen, taka nem wain tubu yakas fen, mata to orodig, ere nigin, ĩ irok, ‘Tubu are de biya.’”

Jesus Ī Sabat Naa Nē Odug
(*Matyu 12:1-14; Mak 2:23–3:6*)

6 ¹Sabat naa taka bun, Jesus in dō fiya tar geid, wit kabī atu diyok dile fen, in dō fiya tar wit biya tunī fito difen, imeid bun orok de fen, nedi ilo don. ²Farisia tamo tunim to difen, “Ā ere nigin Sabat naa bun itāfiya ufoduleg fen, tobonunā enei ago gef?”

³Jesus aitedin yale irokenēdin, “Sain Dawid, ne tā tar geid naū fedī di, age fen anī, ā to uwesege de? ⁴Ī Negur nē fō namen ile fen, bret fateul prisem dogol dōdig^m an ibodon anī yokon, ĩ bret tunī ne tā tareg ifenēdin.” ⁵Age ye fen, Jesus idi irokenēdin, “Tamo Naal ĩ Sabat naa nē Odug.”

⁶Sabat naa taka bun, ĩ Juda neid uub fō bun ile, biya od ifelnēdin, sain anī bun, tamo taka ima biya melem gege fefu fiya anī an ibodon. ⁷Farisia tamo, lo ifelnēdiya tamo geid, idi Jesus bouwa bun od dinouf nigin naab dimiren, anī nigin, idi ĩ Sabat naa bun dagi el fe mog, mailauf de fen, ololo difen. ⁸Anī ere, Jesus idi neid kisi kelei ken, tamo ima gege fefu fiya anī irokenen, “Fā wo fen, ganan meleid bun ufar.” Age ye di, ĩ fā yale, an ifaren.

⁹Age fe di, Jesus idi irokenēdin, “Aya ā to ayeik, nanī anī Sabat naa bun lo dō fiya? Biya age fiya anī de, sane age fiya anī, oo, isennē di, mata ibodōya anī de, daū fiya anī?”

¹⁰Jesus idi ganan fele feid le fen, tamo anī irokenen, “Imā yaī wo.” Ī yaī fe di, in ima oditekei biya len. ¹¹Anī ere, idi waud fatuk sane fen, mogo Jesus naig tafiyēf de fen, dogo tutur katō difen.

Jesus Aposel Tuwelf Igirnēdin
(*Matyu 10:1-4; Mak 3:13-19*)

¹²Anī sain bun naa taka, Jesus arein kosē youf nigin iselen, bō anī bun Negur kosē fiyen. ¹³We fele di, bonimeī, Jesus in dō fiya tar wagen iweig laisi fen, idi atun tuwelf geif fen, idi anidi aposel wowā douf nigin igirnēdin. ¹⁴Simon (Jesus ĩ yana yun Pita), in tura Endru, Jems, Jon, Filip, Batolomyu, ¹⁵Matyu, Tomas, Jems Alfeus naal, Simon ĩ anī Selotⁿ

^l 5:37 Juda neid tobonunā, idi meme gabar nem darum diwadig. ^m 6:4 Lo bun, bret fateul anī, prisem dogol dōdig. ⁿ 6:15 Juda neid kusī mala taka, idi Rom gawaman ado kusī dedig.

taka, ¹⁶Judas ĩ Jems naal, Judas Iskariot, inim dum Jesus kiwai imeid bun inenen.

El Fiya Ado Malalon

(Matyu 4:23–5:12)

¹⁷Jesus idi geid weim disil, teneub uus bun difaren. In dō fiya tar musei ado, tamo kayau musei biya, Judia distrik kalilī fiya ganan temeleid, Jerusalem temeleid, Taia Saidon taun ado neid ubun temeleid, an difaren, ¹⁸tamo kayau anidi Jesus karī difiyē fenē nigin ado, idi neid dagi el fediyouf nigin, disin. Idi kaa sesenem morō difenēdin are el fedin. ¹⁹Tamo kayau ganan ĩ kobū difiyē fenē age difen, ere nigin, megeir ĩ bunem isi fen, idi ganan el fedin.

²⁰Jesus in dō fiya tar lo fiyeid fen, iron:

“Ā aib maleg are el yeik,
ere nigin, Negur nē tano are āgenei.

²¹Ā gama naū ufaregef are el yeik,
ere nigin, ā nameī isokosauf.

Ā gama maruī isif are el yeik,
ere nigin, ā kasā gouf.

²²Tamo Naal nigin, tamo kayau sane diyeik, diruyei ken, kono diyeik, ā yeneī sane dile fen, to orodif are,
Negur ā el yeik.

²³“Naa anī bun, wauī kulī ye fen, wauī al foug, ere nigin, āgenei mala solo odug oun saa ilun ibodok. Ere nigin, temeid tar profet nigin de age difedin.

²⁴“Anī ere, safineī ado ā meleilon ado,
ere nigin, āgenei wauī isenneīya mogo walegel.

²⁵Nameī gama isokosef ā meleilon ado,
ere nigin, ā naū ulagauf.

Gama kasā gef ā meleilon ado,
ere nigin, ā fau wauī gudūf fen, maruī isiyouf.

²⁶Ā nigin tamo ganan biya de fen, wogō def ā meleilon ado,
ere nigin, temeid tar idegēya profet nigin de age difedin.

Kiwai Tar Nigin Wau Laa Fiya

(Matyu 5:38-48; 7:12a)

²⁷“Anī ere, ā aib aya karī wiyagef anī arokeneik: Āgenei kiwai tar nigin wauī laa foug, ā kiwai difeneik anidi nigin biya ago gouf. ²⁸Idi ā disisneik el fiya wenēdig, idi ā to biya diyeik anidi nigin kosē gouf. ²⁹Tamo taka ogon walā sitakā fakā foug, falei wel, walā sitakāg wenē. Tamo taka ogon saket yalouf are, ogon kolos yalouf nigineg to katū wiyē. ³⁰Wenēdiyof nigin to diyok are, wenēdiyof, aib taka ogon safinā yalef are, anī baban

kel yaleya nigin to urokenēf. ³¹Ereb taka idim age difekeneīf anī oroyeik age fiya gen, āg idi bun ago gouf.

³²“Idi ā nigin waud laa fef anidi nigin dogol wauī laa fef are, ā nigin ere mala ado? Mosor adodo idig, idi nigin waud laa fef anidi nigin, waud laa fedig. ³³Idi ā nigin biya diyeyik anidi nigin biya ago gouf are, ā nigin ere mala ado? Mosor adodo idig age difedig. ³⁴Idi anidi bun moni kel walogouf nigin kisig fen, moni wenēdigouf are, ā nigin ere mala ado? Mosor adodo idig, moni ganan kel yaleya nigin kisi de fen, mosor adodo tutur moni difenēdidig. ³⁵Anī ere, āgenei kiwai tar nigin wauī laa foug, idi nigin biya ago wedigouf, erab taka kel yaleya nigin to kisig fen, wenēdigouf. Ago gouf are, āgenei mala solo odug biyau, agef fen, ā Negur Ilun Bagai nē gere tar wowā gouf, ere nigin, Negur ī idi to de difiyēdig sesen anidi ado, biya fiyēdidig. ³⁶Āgenei Temeī wau yūdig gen, āg idi nigin wauī ineīf.

Ne Tā Es Fiyēya

(*Matyu 7:1-5*)

³⁷“Taka to es wiyēg, to ago gouf are, āg Negur to es yeīf. Taka bouwa bun od to ūg, to ago gouf are, āg Negur bouweī bun od to yūf. Mosor nigin wedereī tu kalauf, ago gouf are, Negur āgenei mosor nigin weder tu kalauf. ³⁸Wenēdig, ago gouf are, Negur ifeneīf. Ima su karikauf, lai fesil fen, baban teten ino isokose di, yokū fe di, awa gere fasauf, ā nigin gogū foug. Tunī es wedigef gen, Negur āg agef es yeīf.”

³⁹Jesus yaab od eneig irokenēdin, “Mala ifofakeleya tamo taka, mala ifofakeleya tura itonēya kisi feleya de? Idi urom bebeigir to kuku douf de? ⁴⁰Skul kesu in tise to wal fef, anī ere, taka ī keleī ganan yalef, yogon tise gen wō youf.

⁴¹“Ō ere nigin turā mala teteur lo fen, ō ogon aa masak malā bun ibodok anī to ulef? ⁴²Ō ogo aa masak ogon malā bun to ule fen, naig fe di, turā nigin dogol urokenek, “Turau, utor len, aya ogon malā teteur alelkonōf? Ō mala yaleya tamo, ō ogon malā bun ketem aa masak walel fen, anī malā kare kele di, turā bun mala teteur walelauf.

Aa Taka Yogon Faat Ado

(*Matyu 7:16-20; 12:33-35*)

⁴³“Aa biya ī faat sane to imadig, aa sane are faat biya to imadig. ⁴⁴Aa mugu mugu yogon faat bun, tamo ī keleī youf. Tamo kayau idi, wei biya barik bun to daledig, gira udum bun to daledig. ⁴⁵Tamo biya ī, yogon wau bun erab biya kuru fedig anī bunem, tobonunā biya yaor fedig, age fiya gen, tamo sane, yogon wau bun erab sane kuru fedig anī bunem, tobonunā sane yaor fedig. Yogon wau bun isokosef, yogon sigor bun wogō yedig.

Fō Inoya Nē Keleī Tamo, Neneya Tamo Ado
(*Matyu 7:24-27*)

46 “Ere nigin ā aya nigin ‘Odug, Odug,’ ge fen, aya orok anī to ago gedig? 47 Taka ī wageun isi, neu od karī ye fen, dōf age fef, ī naig fiya anī aya ā afelneif. 48 Ī fō inoya tamo taka, ku fatuk yale fen, meein teten fō gariya inon gen. Sain kuwei isin, wī ye fen, fō yun, anī ere, fō anī yokū fiya kisi feleya sã, ere nigin, fō are total ado inon. 49 Anī ere, taka ī neu od karī ye fen, to dōf age fef, ī tamo taka teneub bun fō gariya sã inon gen. Sain kuwei wī ye fen, fō yun, fō anī kala fel, oditekei daūf irailen.”

Kusī Tamo Neid Orowa Nē Momoiya
(*Matyu 8:5-13*)

7 1 Jesus tamo kayau karī douf nigin enei ganan wogō bure fel fen, ī Kapenaum taun ilen. 2 An kusī tamo neid orowa nē ferfer taka, in odug ī nigin wau laa fedig anī, dagi fen, laa fou fenē age fen. 3 Kusī orowa Jesus nigin karī ye fen, Juda neid mudur adodo Jesus garan susur fedi di, ī isi fen, yogon ferfer el fiyēf nigin to difiyen. 4 Idi Jesus garan disi fen, total bagai digonen, “Tamo enei, ō enī agouf nigin kisi feleya bagai, 5 ere nigin, ī nemā tamo kayau nigin wau laa fedig, nemā uub fōg inon.” 6 Anī nigin, Jesus idi geid dilen.

Ī mogo fō sirin mog, kusī orowa ne tā tar Jesus dirokenēf nigin sur fedin, “Odug, ō kabī total to walouf, ere nigin, aya to biya nigin aya kisi afef, ō neu fō bun to usiyouf. 7 Aya to biya nigin, aya ō garan isiya nigineg to kisi afen. Anī ere, ō od urō di, neu kabī tamo dagi fara falauf. 8 Ere nigin, aya yug nigin age fiya, ayag neu odug anī farumen abodok, kusī tamo idig aya farumeun dibodok. Aya taka enī arokenek, ‘Ule,’ afiyek, ī ilauf. Aya taka arokenek, ‘Ō usi,’ au di, ī isidig. Neu kabī tamo enī ago afiyek, ī anī age fedig.”

9 Kusī orowa od enī irō di, Jesus karī ye fen, ī nigin terē yen, agef fen, tamo kayau dō difiyen anidi bun falei yel iron, “Aya ā arokenek, aya Israel bun, momoiya odug eig fiya taka to ailen.” 10 Age ye di, kusī tamo sur fedin anidi, fō bun ke de dile fen, ferfer anī dagi sã ibod mog, fotou difen.

Jesus Kayau Waab Taka Nē Kesu Turī Fen

11 Anī dumen, Jesus taun taka Nain ilen, in dō fiya tar, tamo kayau musei, ī geid weim dilen. 12 Ī mogo taun bobog kelē fiyē mog, laa tamo taka faali de disin, laa tamo anī kayau waab nē kesu tekelei bagai, tamo kayau musei taun temeleid kayau waab geid. 13 Sain Jesus kayau waab anī fele fiyen, in wau ī nigin gudūf fen, iron, “To inā wale.”

14 Age ye fen, ī isel, dege kobū fe di, faali difen idi, dē delen. Ī iron, “Tamo gaū, aya ō arokonok, fā wale!” 15 Laa tamo anī fā ye ibod ken, od yen, age fe di, Jesus tamo anī ī sina kel ifenen.

¹⁶Age fe di, idi ganan kumĩ ado terefeit de fen, Negur yana dalesen. Idi diron, “Profet odug taka, ada atun wõ yel. Negur yogon tamo kayau isennēdiyof nigin isil.” ¹⁷Jesus nigin, od enei Judia distrik kalilī fiya ganan iyokelen. Jesus,

Jon Naan Igunēdiya Tamo Ado

(Matyu 11:2-19)

¹⁸Jon nē dō fiya tar, enei ganan nigin Jon dirokenen. Jon idi uru iweigneid fen, ¹⁹Odug eig de to difiyēf nigin sur fedin, “Tamo isiyof den, ō ogo yeir de, amā fau taka nigin malamā manouf?”

²⁰Tamo Jesus garan disi diron, “Jon Naan Igunēdiya Tamo, ō to mayōf nigin amā sur famam, “Tamo isiyof den, ō ogo yeir de, amā fau taka nigin malamā manouf?” ”

²¹Sain anī bun bagai, Jesus, tamo kayau musei dagi adodo, darau adodo, kaa sesenem dirounēdin el feid fen, meleid ifofakeleya el fedī di, kelē den. ²²Jesus solof irokenēdin, “Kekug uleg fen, ā wedereim karī gel, meleim ulegel anī Jon wogō wiyēg, meleid ifofakelen kelē def, to diyon mogo diyok, lepra dagi adon mogo el fedin, wedereid daabun od karī def, gare den turī fedif, maleg bun biya od wogō fedif. ²³Tamo aya nigin wau to firagagaū fef, Negur ī el fiyek.”

²⁴Jon nē arū tamo ditornē dilele di, Jesus, tamo kayau guru difen anidi, Jon nigin irokenēdin, “Ā ere bagai anī ulogouf nigin, gerere tuan ulegen? Ā unin yaum walala fe di, ulogouf nigin ulegen de? ²⁵Anī sāf are, ere bagai ā ulogou fenē, ulegen? Tamo taka kolos biya bagai ifonun de? Sā, idi kolos medēiya biya difoun ken, safineid inid adodo are, king nē fō bun dibodok. ²⁶Ere bagai anī ā ulogou fenē, ulegen? Profet taka de? Ariya, aya ā arokeneik, ī profet wal fediya. ²⁷Tamo anī, ī nigin eig ye itoton:

“‘Aya neu arū tamo sur afe di, ī uyu ilauf,
im ket ogon naab dodok fouf.’”

²⁸Aya ā arokeneik, kayau onudi kesu dalen idi atun, taka nem Jon to wal difiyen, anī ere, aib taka Negur nē tanon yana naal bagai ado, ī Jon wal fiya.”

²⁹(Tamo kayau ganan, takis yaleya tamog, sain idi Jesus nē od karī de fen, Negur nē naab anī biya den, ere nigin, idi Jonem naan igunēdin. ³⁰Anī ere, Farisia tamo, lo keleī tamo geid, idi dogo nigin Negur nē oroya ditoron, ere nigin, idi Jonem naan to igunēdin.)

³¹“Tamo kayau sain enei bun, idi nigin ere bunem aya kisi afouf? Idi ere gen? ³²Idi simō maket modoū bun dibod ken, abob diweignēdidig gen:

◦ 7:27 Malakai 3:1

“ ‘Amã ã nigin kelel maun,
 anĩ ere, ã to kui gen;
 amã kanon seg malen,
 anĩ ere, ã to inã walegen.’

³³Aya enei wogõ auf, ere nigin, Jon naan igunëdiya tamo isin, bret to yon, wain to yon, ã urõgef, ‘Í kaa sane ado.’ ³⁴Tamo Naal isin, saaf yon, naan yon, ã urõgef, ‘Eĩ dobu irãya tamal, ĩ, takis yaleya tamo, mosor tamo adodo geid, uyu kũ difedig.’ ³⁵Anĩ ere, kisi biya ĩ, in dô fiya ganan bunem, biya yaorouf.”

Mosor Kayaum Jesus Bun Moul Fi Felen

³⁶Farisia tamo takam, Jesus ĩ ado saaf dãf nigin iweignen, anĩ nigin, Jesus ĩ Farisia tamo anĩ nẽ fõ bun ile fen, tebol bun ibodon. ³⁷Taun anĩ bun, kayau taka mosor ado ibodõdig, Jesus Farisia tamo anĩ nẽ fõ bun, saaf yoko yeya karĩ ye fen, kayau, moul sumeĩ biya bagai anĩ gulub^p ado irou isin. ³⁸Kayau ĩ Jesus dumen ye garan ifar, maru isi fen, Jesus ye lũ fen. Agef fen, kayau yogon fatiyam Jesus ye waif, umã fe, moul sumeĩ biya bagai, ye bun fi felen.

³⁹Sain Farisia tamo Jesus iweignen anim, enei ile fen, ĩ yogo kisi bun iron, “Tamo enei profet takauf, ĩ aibem kobũ fiyek, ĩ ere kayau, ĩ mosor kayau taka anĩ, keleĩ youf.”

⁴⁰Jesus ĩ irokenen, “Simon, aya ereb taka arokonõf.”

Ī iron, “Tise, urokana.”

⁴¹Jesus iron, “Tamo uru, moni tamo taka bun wareg dalen, taka faif tausen kina, taka faif hundred kina. ⁴²Idi urom wareg ifenëya moni sã, anĩ nigin, moni tamo dogo neid wareg gudũ felen. Gama nanim anĩ, moni tamo nigin wau fatuk laa fouf?”

⁴³Simon solof iron, “Aya kisi afef, taka ĩ wareg odug yalen anĩ gudũ fel kenen anim.”

Jesus iron, “Õ tutuk es wol.”

⁴⁴Age ye fen, Jesus falei yel, kayau wage ifen ken, Simon irokenen, “Õ kayau enei ulef? Aya ogon fõ bun asil. Õ yeu kulo fiya nẽ naan taka to wanal, anĩ ere, kayau ĩ yogon marum yeu lũf fen, yogon fatiyam waif fel.

⁴⁵Õ to umã wiyal, anĩ ere, kayau enei, aya asour alel sain bun, ĩ yeu umã fel anĩ, fau fau umã fiyek. ⁴⁶Õ mudurou bun moul to unol, anĩ ere, kayau ĩ moul sumeĩ biya bagai, yeu bun fi felel. ⁴⁷Anĩ nigin, aya õ arokonok, kayau enĩ nẽ mosor musei yalelel, anĩ nigin, ĩ fatuk wau laa fen. Anĩ ere, aib taka mosor naal yalelen, ĩ wau laa fiya naal.”

⁴⁸Age ye fen, Jesus kayau irokenen, “Ogon mosor alelkonok.”

⁴⁹Tamo Jesus geid dibodon, tutur dogo dogol diron, “Eĩ aim, ĩ mosoreg yalelef?”

^p 7:37 Meein alabasta nem dinon.

⁵⁰Jesus kayau anī irokenen, “Ogon momoiya anim isennom, waū inosiya ado ule.”

Faat Irarāya Tamo Nē Yaab Od
(*Matyu 13:1-23; Mak 4:1-20*)

8 ¹Anī dumen, Jesus taun ado fonō fonō iyo ken, Negur nē tano nigin, biya od wogō yen. In dō fiya tar tuwelf weim, ²kayau tunī idi kaa sesen iruid fen, dagi el fedin idig weim: Maria (Magdala tamal) ī bun kaa sesen sewen irudi di, diyan, ³Joana Kusa nē kayau, Kusa ī Herod nē fō lo fiya tamo, Susana, musei tunī geid. Kayau eneidi, idi neid safineid nem disennēdin.

⁴Tamo kayau taun ganan bun temeleid, Jesus garan disi, moku de mog, ī yaab od enei iron, ⁵“Kabī marau taka, faat irarāf nigin ilen. Sain ī irarak ile mog, tunī naab luwen kuku ren, are teten diyon, ninā ilun temeledim dakasin. ⁶Tunī meein tuar kuku ren, are bali fokū yeid fen, laasi yedin, ere nigin, idi lumi sā. ⁷Faat tunī malū duri atun kuku ren, are malū duri, faat anī ado, odudug fen, malū durim sile feledin. ⁸Faat tunī teneub biya bun kuku ren, are fokū yedin, biya imadin, gariya tekelei yogon biya wan handred iman, biya anim gariya anī wal fiya.”

Sain ī enī wogō ye fen, ī iweig iron, “Taka ī kariya nigin weder ado, ī karī youf.”

⁹In dō fiya tar, yaab od enī nē gariya nigin, ī to difiyen. ¹⁰Jesus iron, “Negur tano nigin, iminēya od nē keleī are, Negur ā mogo ifenein, anī ere, tunī bun aya yaab od nem wogō auf, anī bunem,

“idi meledim diledig, anī idi meleid fokōya sā,
idi wederedim karī dedig, anī idi gariya keleī sā.”⁹

¹¹“Yaab od anī nē gariya eig fiya. Faat are Negur nē od. ¹²Faat tunī naab luwen kuku ren are, tamo idi od karī den, Satan isi, biya od idi namedin ibodok anī yaleledig, anī bunem, idi to momoi de di, to isennēdiyof. ¹³Faat tunī meein tuar iraran are, tamo idi od karī de fen, waud bun kulīya ado od daledig, anī ere, idi warumutei sā. Idi sain naal bagai momoi def, anī ere, kisi fiya isi di, fara furu de diyaleledig. ¹⁴Faat malū duri atun kubū yen are, tamo idi od karī den, anī ere, idi diyok dile mog, tenebur mata ibodōya nē suwēya, safina ado ibodōya nē kisi, bouwa nē oroya anidim idi sile fedi di, idi faat to yūf. ¹⁵Anī ere, faat teneub biya bun kubū yen are, tamo idi, kisi biya, kariya biya ado, waud bun ibodok, od karī de fen, kafī difelef, anī totol difaref, faat biya yūf.

Lam Yoki Bun
(*Mak 4:21-25*)

¹⁶“Taka nem lam tōf fen, mis kur be, fatar farumen to inodig. Age fiya ban, ī yoki bun iseginē di, idi aaben disif, lalan dilouf. ¹⁷Ereb ereb ganan

⁹ 8:10 Asaia 6:9

iminēya yenek anī ganan yaor fouf, ereb ereb ganan nar fen yenek anī ganan irou isi, biru fel fen, yaau du fe di, keleī youf. ¹⁸Anī nigin, ā kisi el ge waleg fen, ā karī gouf. Aib taka ī ado, aya toru afouf, age fe di, ī musei adouf. Taka ī sā bagai, ereb taka ī ado nigin ī kisi fef areg, ī bun tamal son fouf.”

Jesus Nē Sina, Tura Tar Geid
(*Matyu 12:46-50; Mak 3:31-35*)

¹⁹Jesus nē sina, tura tar geid, ī dilouf nigin disin. Anī ere, idi ī wagen ileyā kisi feleyā sā, ere nigin, tamo kayau musei. ²⁰Takam Jesus irokenen, “Ogon sinā, turā tar geid, ō dileyōf nigin serē difaref.”

²¹Jesus solof iron, “Neu naai ado turau tar, are idi Negur nē od karī de fen, dō difef anidi.”

Jesus Yau Uyē Ado Irokenēdi Di, Kee Delen
(*Matyu 8:23-27; Mak 4:35-41*)

²²Naa taka bun, Jesus in dō fiya tar irokenēdin, “Ada daliyou sitakā talauf.” Anī nigin, idi waag bun sō de dilen. ²³Idi solī de mog, Jesus mulaī yenen. Yau odug daliyou bun isi di, maaī waag namen isokosen. Idi morō odug fotou difen.

²⁴In dō fiya tar dile, Jesus turī difiyē diron, “Odug, Odug, ada naanū talalau fenē!”

Ī fā yale, yau naan moloun wī yen ado, sakā fiyēdi di, yau uyē ado irorou kel, ganan dē delen. ²⁵Jesus in dō fiya tar to fiyēdin, “Āgenei momoīya nain?”

Idi kumī terē de fen, abob toti difen, “Eī aim bagai? Ī yau ado naaneg irokenēdi di, ī ait dō difef.”

Jesus Tamo Taka Kaa Sesen Musei Ado El Fiyan
(*Matyu 8:28-34; Mak 5:1-20*)

²⁶Idi Galili tamal daliyou dibal, Gerasa teneub bun dilen. ²⁷Sain Jesus ubun kutū yesin, taun anī bun tamal, tamo taka kaa sesen ado ī tarabā fiyan. Sain meluk, tamo enei kolos sā, fō buneg to ibodōdig, anī ere, ī matmat bun ibodōdig. ²⁸Ī Jesus ile fen, kaī ye, Jesus ye gariyan kubū ye, ī ait odugem iweig iron, “Ō aya ere naig wiyau fenē, Jesus, Negur Ilun Biya nē Naal? Aya ō agonok, ō aya to daig wiyauf!” ²⁹Ere nigin, Jesus mogo kaa sane tamo anī bun tamal ulō yesiyouf nigin irokenen. Sain musei kaa sanem ironē di, ye ima ado, sen nem difofādig, age de fen, tari difiyēdig, anī ere, ī sen kokour fele di, kaa sanem wala ino di, moilin iledig.

³⁰Age ye di, Jesus ī to fiyan, “Ō yana ai?”

Ī solof iron, “Aya yanau Ami,” ere nigin, kaa museim ī namen disilen. ³¹Idi ku isil idiya sā modoū bun to sur fediyouf nigin, baba baban Jesus digonen.

³²Arei wala sirin, bor musei biya an saaf doko difaren. Kaa sesen idi, bor namedin dilauf nigin, Jesus digonē di, Jesus idi yo fedin. ³³Kaa sesen, tamo anī bun tamal ulolō deis fen, bor namedin dilelen. Age dife di, bor gududu de, bebeig sane baurin daliyoun disil, naanū gare desin.

³⁴Bor lo fiya tamo, ereb ereb wō yen anī dile fen, diya dile, od anī, taun ado fonō fonō wogō den. ³⁵Age dife di, tamo kayau, ereb wō yen anī dilou fenē dilen. Sain idi Jesus garan disin, kaa sesen tamo anī bun tamal diyalelen tamo anī, garab yel, kisi biya ado, Jesus ye gariyan ibod mog, dile fen, idi kumī den. ³⁶Tamo idi meledim dilen anidim, kaa sesenem tamo diroun anī, naig be el fiyen anī, tamo kayau wogō difiyēdin. ³⁷Age dife di, Gerasa teneub bun, tamo kayau ganan, Jesus itorneid ilauf nigin, ī dirokenen, ere nigin, idi kumim lai fedin. Anī nigin, Jesus waag bun sō ye fen, itornēdin.

³⁸Tamo ī bun tamal kaa sesen diyalelen anī, Jesus ado dilauf nigin igonen, anī ere, Jesus ī sur fiye ken, iron, ³⁹“Fonō kel ule fen, Negur ō nigin age fen anī wogō wouf.” Age ye di, tamo anī itor ilen, Jesus ī nigin age fen anī, taun ganan bun iyo ken, wogō yen.

Kayau Naal Laa Fen Ado Dagi Kayau Taka (*Matyu 9:18-26; Mak 5:21-43*)

⁴⁰Sain Jesus kele di, tamo kayau musei, ī aan difiyen, ere nigin, idi ganan ī nigin ololo difen. ⁴¹Age de mog, Juda neid uub fō lo fiya nē mudur taka, yana Jairus isi, Jesus ye gariyan kubū ye fen, yogon fō bun ileyā nigin igonen, ⁴²ere nigin, ī ne barai tekelei bagai, ī kayau naal tuwelf yar age fiya, mogo laa fou fenē.

Jesus naab ile mog, tamo kayau musei kiti de fen, kafī difiyē genen. ⁴³Kayau taka an ifaren, ogō dagi faimud ado, yar tuwelf iyon. Anī ere, taka nem ī to el fiyen. ⁴⁴Kayau ī Jesus dume ise, in kolos iri kobū fen, age fe di, kaisā bagai, kayau nē naud segē yelen.

⁴⁵Jesus to fen, “Aim aya kobū fiyal?”

Idi ganan wa dife di, Pita iron, “Oduḡ, tamo kayau musei kiti de fen, kobū diyok

⁴⁶Anī ere, Jesus iron, “Aibem aya kobū fiyal. Aya keleī, total aya bun tamal ul fe yalel.”

⁴⁷Age ye di, kayau ī imin ken, ileyā kisi feleya san, tererē ye fen, isi, Jesus ye gariyan kubū yen. Tamo kayau ganan meleid bun, ī ereb nigin Jesus kobū fiyem ado, naig be ī kaisā bagai biya lel anī, wogō yen. ⁴⁸Age ye di, Jesus kayau irokenen, “Nau barai, ogon momoiya anim el yom. Waū inosiya ado ule.”

⁴⁹Jesus fau od wogō ye mog, tamo taka, Juda neid uub fō lo fiya mudur Jairus nē fō bunem isin. Ī iron, “Nē barai mogo laa fel. Baban ō tise morō to wenēf.”

⁵⁰Jesus od enei karī ye fen, Jairus irokenen, “To kumī wo, momoi dogol wo, ago di, kayau fau el fiyēf.”

⁵¹Jesus Jairus nē fō bun wō ye fen, takam ī geid, aaben ileyā nigin katū fedin, Pita, Jon, Jems ado, kesu nē tama sina dogol. ⁵²Tamo kayau ganān, ī nigin waud gudūf fen, inā legur mog, Jesus iron, “To inā waleg. Kayau naal ī laa fiya sā, ī mulā yenek.”

⁵³Idi Jesus kasā difiyen, idi keleī, kayau naal laa fel. ⁵⁴Anī ere, Jesus ī ima yales fen, iron, “Neu kesu, fā wo!” ⁵⁵Kayau nē uur kelen, age fe di, kaisā bagai, fā yale ifaren. Age fe di, Jesus, ī erēb taka ifen yōya nigin, idi irokenēdin. ⁵⁶Kayau nē sina tama terefeit de di, erēb wō yel anī, taka to dirokenēf nigin, Jesus idi katū fedin.

Jesus In Dō Fiya Tar Tuwelf Sur Fedin

(*Matyu 10:5-15; 14:1-12; Mak 6:7-29*)

9 ¹Jesus in dō fiya tar tuwelf iweigneid fen, kuru fedin. Agef fen, ī, idi kaa sesen ganān dirudiyouf nigin ado, dāgi el difediyouf nigin totol ifeneid fen, megeir fedin. ²Ī, idi Negur nē tano nigin wogō douf nigin ado, dāgi adodo el difediyouf nigin sur fedin. ³Jesus idi irokenēdin, “Delē uyōgouf nigin erēb taka to walogouf, manig sā, faa sā, bret sā, moni sā, kolos uru to walogouf, tekelei dogol. ⁴Fō nanī be bun sō gouf, an ubodōg ile, taun anī utorōgouf. ⁵Tamo kayau ā to daleyēi ken, ā to karī diyēif, sain ā nedi taun anī utorōg fen, yei aas tu welege di, idi ā kiwai difenein anī keleīf.” ⁶Anī nigin, idi fafā de, fonō fonō diyo ken, modoū ganān bun, biya od wogō de fen, tamo kayau dāgi el difedin.

⁷Galili lo fiya nē mudur Herod, anī ganān wō yef ilef anī, karī ye fen, wau togun, ere nigin, tunim dirok, Jon ī laa bun tamal mata kel fā yen, ⁸tunim dirok, Eliya wō yen, age fe di, tunīg dirok, profet kulu temeleid anidi taka mata kel fā yen. ⁹Anī ere, Herod iron, “Aya Jon ula gudū afen. Enei aim, ī nigin karī auf?” Age ye fen, ī Jesus ileyā nigin kisi fen.

Jesus Faif Tausen Tamo Saaf Ifenēdin

(*Matyu 14:13-21; Mak 6:30-44; Jon 6:1-14*)

¹⁰Sain aposel idi keku den, idi age difen anī Jesus wogō difiyen. Age de di, Jesus idi geif irou, idi mugu diya, taun taka Betsaida dilen. ¹¹Anī ere, tamo kayau musei anī keleī ken, Jesus dō difen. Jesus idi aan fiyēid, Negur nē tano nigin wogō fiyēid fen, idi dāgi el fiya nē anidi el fedin.

¹²Aragau di, in dō fiya tar tuwelf, ī gein disi diron, “Tamo kayau susur wo di, idi fonō kalilī fiya fonō fonō dile fen, saaf ado yenēya modoū dilouf, ere nigin, ada ein gerere tuan tabodok.”

¹³Jesus aitedin yale iron, “Idi dāf nigin erēb āgem wenēdigouf.”

Idi solo de diron, “Ada bret faif, gau uru ado dogol. Ada tele, tamo kayau enei ganān nigin saaf to na talouf, are kisi feleya sā.” ¹⁴(Faif tausen tamo age fiya an dibodon.)

Anī ere, Jesus in dō fiya tar irokenēdin, “Tamo kayau, mala fire fire fifti age fiya bun, ubodnēdig.” ¹⁵In dō fiya tar age dife di, ganan dibodadan. ¹⁶Jesus, bret faif gau uru ado yale, saa ilun itad fen, ī Negur de fiye ken, anī mumā fedin. Agef fen, ī in dō fiya tar ifenēdin, tamo kayau wagedin gō difouf nigin. ¹⁷Idi ganan don kisi felen. In dō fiya tar, tamo kayau bret gau ado dokon, tunī ifaren anī fito difen, karam tuwelf isokosen.

Pita Kristus Nigin Kurō Fesin
(*Matyu 16:13-28; Mak 8:27-9:1*)

¹⁸Sain Jesus mugun kosē yen, in dō fiya tar idi ī weim. Ī idi to fedin, “Tamo kayau idi, aya nigin ai dedig?”

¹⁹Idi solo de diron, “Tunī dirok, Jon naan igunēdiya tamo, tunī dirok, Eliya, are tunīg dirok, profet kulu temeleid anidi taka mata kel fā yen.”

²⁰Jesus to fedin, “Ba ā uleg? Aya nigin ā ai gef?”

Pita aiten yale iron, “Ō anī Negur nē Kristus.”

²¹Age ye di, Jesus enei taka to dirokenēf nigin, idi wedereid totol iroun. ²²Age ye fen, ī iron, “Tamo Naal ī darau musei yale fen, mudur adodo, pris odudug, lo ifelnēdiya tamo idim dudum difiyēf. Age de fen, ī dukesi di, naa towo bure fele di, mata kel fā youf.”

²³Age ye fen, Jesus idi ganan irokenēdin, “Aib taka aya dō fiyau fenē, ī yogon oroya dudum fe fen, yogon aa tetek, naa ganan faali fe, aya dō fiyauf. ²⁴Aib taka, yogon bouwa buru, mata ibodōf nigin oro fef, are fō yalauf, anī aib taka yogon mata bouwa buru, aya nigin ye fen, irailauf, are kel yalouf. ²⁵Tamo taka ī teneub enī ganan kakarai fe, akorou ye fen, ī yogo bou fō yalauf be irailauf, ere biya ī yalouf? ²⁶Aib taka, aya nigin ado neu od nigin, mama fouf are, sain Tamo Naal, in fula fiya medeīya, Tama nē ado, engel fateul neid fula fiya medeīya ado disiyouf bun, īg ī nigin mama fouf. ²⁷Aya ā momoi arokeneik, tunī ein difaref, fau to gare de mog, idi Negur nē tano dilouf.”

Jesus Bouwa Falei Felen
(*Matyu 17:1-8; Mak 9:2-8*)

²⁸Jesus enei irokēl fen, naa eit age fiya ilele di, ī, Pita, Jon, Jems yale, kosē youf nigin arei ilun diselen. ²⁹Ī kosē ye mog, yogon nawa falei felen, agef fen, yogon kolos, kolimei filiya nē lalan gen, wō yen. ³⁰Tamo uru, Moses Eliya ado, ³¹fula fiya medeīya ado wowā de fen, Jesus geid wogō den. Idi Jesus teneub itorōf anī nigin wogō den, anī ī Jerusalem oun kisi falauf. ³²Pita ī, ne tā tar geid, mulā nigin meleid morō kelen, anī ere, idi oditekei meleid bi fel fen, idi Jesus nē fula fiya medeīya ado, tamo uru ī geid difaren anī dilen. ³³Tamo idi Jesus ditornē mog, Pita Jesus irokenen, “Odog, ada ein ibodōya nigin biya bagai. Ada salafat towo tanouf, taka ogon, taka Moses nē, taka Eliya nē.” (Ī wogō yen anī, ī yogo keleī sā.)

³⁴Age ye mog, lalo isi, idi kerub fedī di, idi lalo bun dilel mog, kumī den. ³⁵Ait taka lalo bunem wō ye fen, iron, “Eī neu Kesu, ayam ī agirnen. Ī karī wiyēg.” ³⁶Ait anī wogō yele di, idi Jesus mugu dilen. In dō fiya tar anidi, enei dogo bun dogol ibodon, idi ereb dilen anī, sain anī bun, taka to dirokenen.

Jesus Kesu Kaa Sane Ado El Fiyen
(*Matyu 17:14-18, 22, 23; Mak 9:14-27, 30-32*)

³⁷Naa taka bun, idi arein tamal disi mog, tamo kayau musei Jesus tarabā difiyen. ³⁸Guru fiya atun, tamo takam iweig iron, “Tise, aya ō agonok, ō neu kesu ulekanauf, ere nigin, ī neu kesu tekelei bagai. ³⁹Kaa sanem ironē di, ī terē adod ye, ui yedig. Kaa sanem kesu yū irā di, tererē ye fen, awa bun sali moku fedig. Agef fen, kaisā to folō fiye kele fen, ī bouwa daū fedig. ⁴⁰Aya, on dō fiya tar kaa sane diruwauf nigin agonēdin, anī ere, idi kisi feleya sā.”

⁴¹Jesus solof iron, “Sain enei bun, tamo kayau momoiya sā, sane bagai. Sain ganī aya ā geid tabod ken, ā nigin wau aukesilauf? Ogon kesu ein urosi.”

⁴²Kesu anī isi mog, kaa sanem kesu tenebur yū irā di, tererē yen. Anī ere, Jesus kaa sane ou fiyen, agef fen, kesu anī el fiye ken, ī tama kel ifenen. ⁴³Age fe di, idi ganan, Negur nē megeir odug nigin terefeit den.

Idi ganan, Jesus age fen anī ganan nigin, terē de mog, Jesus in dō fiya tar irokenēdin, ⁴⁴“Ereb aya arokeneif anī wedereī unog. Tamo Naal ī fau kiwai tamo imeid bun dinou fenē.” ⁴⁵Anī ere, idi od enī nē gariya nigin nene den. Idi nigin gariya anī inokon, anī nigin, idi od anī to kelei ken, ī to fiyēya nigin kumī den.

Ai Anī Odug Bagai?
(*Matyu 18:1-5; Mak 9:33-40*)

⁴⁶Jesus nē dō fiya tar idi, aim anī idi atun odug ibodōf nigin, luwa diroun. ⁴⁷Jesus idi neid kisi kelei ken, kesu naal taka yale iroule, ī sirin ifarnen. ⁴⁸Agef fen, ī idi irokenēdin, “Aib taka, aya yanau bunem, kesu naal eig fiya taka yalef are, ī aya yaleyaf. Aib taka ī aya yaleyaf are, ī aya sur fiyan anī yalef. Ā ganan atun, taka ī naal bagai are, ī anī odug bagai.”

⁴⁹Jon iron, “Odug, tamo taka, ō yanā nem kaa sesen iruid mog, amā mailen. Anī nigin, amā ī katū mafiyēf nigin age mafen, ere nigin, ī neda takam sā.”

⁵⁰Anī ere, Jesus iron, “To katū wiyēg, taka ī kiwai to ifeneik, are āgenei.”

Samaria Tamo Kayau Jesus Kiwai Difenen

⁵¹Jesus saa ilun yale irou iseleya nē naa dodole di, ī Jerusalem ileya nigin wau kuturolen. ⁵²Age fe di, ī arū tamo uyu sur fedī di, idi Jesus nē

ereb ereb dodok fiya nigin, Samaria fonō dilen. ⁵³Anī ere, tamo kayau an to aan difiyen, ere nigin, ī Jerusalem ilauf nigin age fen. ⁵⁴Sain in dō fiya tar Jems Jon ado, anī dile fen, idi to difen, “Odug, ō amā yā saa ilun tamal maweig di, isi, idi daū fediyoun nigin oroyok de?” ⁵⁵Anī ere, Jesus falei yel, ou fiyēdin, ⁵⁶age de fen, idi fonō taka bun dilen.

Jesus Dō Fiyēya Bun Kafī Fiya Fire Fire
(*Matyu 8:19-22*)

⁵⁷Idi naab luwe dile fen, tamo taka Jesus irokenen, “Ō narib ulauf are, aya ō dō ayōf.”

⁵⁸Jesus aiten yale iron, “Gaū kuī idi, yenēya nē modoū ku ado, ninā lalo bun diyok idi, uru ado, anī ere, Tamo Naal ī mudur inoya nē modoū sā.”

⁵⁹Jesus tamo takag irokenen, “Dō wiya.”

Anī ere, tamo iron, “Odug, fau de, folō wiya len, aya ele, neu dei mū afel fen.”

⁶⁰Jesus ī irokenen, “Laa tamo idi, laa tutur abob mumā difouf. Anī ere, ō ule, Negur nē tano nigin wogō wo.”

⁶¹Baban takag iron, “Odug, aya ō dō ayōf, anī ere, folō wiya len, kelau ele, neu ibor tar dabuo afiyeid fen.”

⁶²Jesus solof iron, “Taka ī dur bun ima ino fen, koriri yedig anī, Negur nē tano nigin kabī yaleya to kisi falauf.”

Jesus In Dō Fiya Tar Sewenti-tu Sur Fedin
(*Matyu 11:20-27; 13:16, 17*)

10 ¹Anī dumen, Odug sewenti-tu tamo igrineid fen, idi, ī taun ganan ado modoū ilauf nē bun, uyulil uru uru susur fedin. ²Jesus idi irokenēdin, “Kabier saaf musei biya bure felen, anī ere, kabī tamo musei sā. Age fiya nigin, kabī marau, Odug to wiyēg, kabī tamo sur fedid, yogon kabier dilauf. ³Uleg! Aya ā sipsip naal gen, gaū kuī atun sur ayeik. ⁴Ā moni nē kodol be, faa be, su be to walogouf, agog fen, naab luwen taka to aan wiyēgouf.

⁵“Fō taka aaben ulagauf, uruwa urōgouf, ‘Fō enei wau inosiya ado.’

⁶Tamo taka wau inosiya nē anī an ibodōf are, āgenei wauī inosiya ī bun ibodōf, sāf are, ā bun kel isiyouf. ⁷Fō anī bun ubodōgouf, saaf ado naan yōya nigin idi difeneif, are wāgauf, ere nigin, kabī tamo ī mala solo yaleya kisi feleya. Fō fō to walegef uyōg.

⁸“Ā taun taka bun ulege di, idi ā aan diyeif, ā ereb wagein dinouf anī wāgauf. ⁹Dagi adodo an difaref, el wiyēdig fen, idi urokenēdigouf, ‘Negur nē tano mogo ā nigin melsā.’ ¹⁰Anī ere, ā taun taka bun ulege di, idi ā to aan diyeif, naab toko tokō ge fen, urōgouf, ¹¹‘Āgenei taun nē aas yemā bun degē fen anīg, amā kema ā bun tu mafef. Anī ere, ā enei keleī youf

bagai, Negur nē tano mogo melsā.’¹² Aya ā arokeneik, es fiya naa anī bun, taun anī, in darau Sodom taun darau dalen anī wal fiya, yalouf.

¹³ “Korasin taun, ō malalon ado! Betsaida taun, ō malalon ado! Ā bun memelik musei anodin, age fiya gen anī, Taia ado Saidon taun bun wō yem are, mogo kulu waud falei de fen, wau gudū fiya nē gabar difoun ken, aasur dibodom. ¹⁴ Anī nigin, es fiya sain bun, ā, morō Taia ado Saidon taun dalouf anī wal fiya, walougouf. ¹⁵ Ō Kapenaum taun, ō yanā anī saa ilun iselauf de? Sā magari, ō laa neid modou bun usilauf.

¹⁶ “Taka ī karī yeik, aya karī fiyaf, taka ī ā iruyeik, are aya iruyaf, anī ere, taka ī aya iruyaf, are ī aya sur fiyan anī iruf.”

¹⁷ Sewenti-tu tamo idi, kulīya ado keku de, disi diron, “Odug, ō yanā bunem kaa seseneg morō di, dō difen.”

¹⁸ Jesus solof iron, “Aya, Satan saa ilunem kolimei lalan gen kakur fen, kubū ye mog, ailen. ¹⁹ Aya, ā, gogour, ambei lalai wedig fen, kiwai nē total ganan wal gouf nigin, megeir afenein. Ereb takam to tadū yeif. ²⁰ Anī ere, kaa sigoramā dō difel ge fen, to wauī kulī youf, anī ere, āgenei yeneī saa ilun itoton nigin, wauī kulī youf.”

²¹ Sain anī bun, Jesus, Awa Ur Fateul bunem, kulīya isokos fen, iron, “Dei, saa ado teneub nē Odug, aya ō yanā alesef, ere nigin, safina eneidi, kisi biya ado keleī adodo to dilouf nigin, ō unokon, ago fen, simō gen dibodon anidi bun yaor won. Dei, enī are ogon waū filolō fiya biya bunem agon.

²² “Ereb ereb ganan, Dei ī aya bun inon. Taka nem Naal ī ai ya nigin keleī sā, Dei yogo dogol keleī. Taka nem Dei ī ai ya nigin keleī sā, Naal yogo dogol ado, tunī idi Naalum Dei ifelnēdiyof nigin igrnēdif anidim dogol keleī.”

²³ Age ye fen, Jesus falei yel, in dō fiya tar lo feid fen, idi dogol irokenēdin, “Meleim ā ulegedif anī dilef are el fedif. ²⁴ Ere nigin, aya ā arokeneik, profet musei, king geid, ā ulegef anī dilou fenē nigin waud yenen, anī ere, idi meledim to dilen, idi ā karī gef anī karī dou fenē nigin waud yenen, anī ere, idi wederedim to karī den.”

Samaria Tamo Tobonunā Biya Ado Nē Yaab Od

²⁵ Sain taka bun, lo keleī tamo taka fā ye fen, Jesus kisi fiyen. Ī Jesus to fiyen, “Tise, aya naig afe di, mata faimud ibodkeleya anī alouf?”

²⁶ Jesus ī irokenen, “Negur nē Itotoya bun Lo ere yef? Ō uwesedig anī, ere yōdig?”

²⁷ Lo keleī tamom Jesus solof irokenen, “ ‘Ō, Odug ogon Negur ī nigin waū adok, malākanon adok, ogon megeir adok, ogon kisi adok bunem, waū laaf yenēf.’ Takag, ‘Ō ogo nigin waū laa fef gen, nē tā nigineg ago waū laa fouf.’”

^r 10:27a Diuteronomi 6:5 ^s 10:27b Levitikas 19:18

²⁸ Jesus tamo anī irokenen, “Ō de tutuk solo wol. Enei ago di, ō mata ibodkeleya walouf.”

²⁹ Anī ere, lo keleī tamo ī, Jesus ī nigin keleī biya sã fiyēf anī itor ken, Jesus to fiyen, “Age fiyau f are, ai anī neu tā?”

³⁰ Jesus solof iron, “Tamo taka Jerusalem taun tamal Jeriko taun isil mog, bē tamo imeid bun ilen. Idi yogon kolos dinukeis dū di, laa gen yen mog, ditornē diyalelen. ³¹ Sain anī bun, pris taka naab tekelei anī dōf isilen, tamo are de ile fen, ī fasis fe tokō felen. ³² Age fiya gen, Lewi tamo takag modoū anī bun isi, tamo are de ile fen, ī fasis fe tokō felen. ³³ Anī ere, Samaria tamo taka iyok isin, tamo yenen nē isi, wō ye, tamo anī ile fen, ī nigin wau yun. ³⁴ Ī wagen ilen, moul wain ado gudū fiya bun fi fel fen, ifokenen. Agef fen, tamo are yales, yogon donki teten ino irou ilen, tamo iroya fō bun ino fen, kulatun fiyen. ³⁵ Naa taka di, ī tu silwa koin moni yalis, tamo iroya fō marau ifen ken, iron, ‘Kulatun wiyēf, sain aya kelauf bun, ō baban mala teten be uran, are aya kela afonōf.’

³⁶ “Ō kisi wof, towo eneidi atun, ai anī, bē tamo imeid bun ilen anī ī ne tā?”

³⁷ Lo keleī tamo solof iron, “Tamo ī nigin wau yun anī.”

Jesus ī irokeken, “Ule, ī age fen gen, ago.”

Marta Maria Ado Neid Fō Bun

³⁸ Jesus, in dō fiya tar geid, naab luwe dile fen, Jesus fonō taka bun wō yen, an kayau yana Marta yogon fō bun Jesus ilauf nigin, Jesus irokenen. ³⁹ Ī tura yana Maria, ī anī, Odug ye gariyan ibod ken, ī wogō yen anī karī yen. ⁴⁰ Anī ere, Marta erēb erēb dodok fiya anī bun kisi yen ken, Jesus wagen isi to fiyen, “Odug, neu turau itorna di, aya mugu kabī alef anī nigin, ō to kisi wof de? Ī uroken, aya isenna!”

⁴¹ Age ye di, Odug aiten yalen, “Marta, Marta, ō erēb erēb musei nigin suwē wo fen, waū morok, ⁴² anī ere, tekelei dogol ō nigin biya. Maria ī biya ani igirim, anī taka nem to yalelkenēf.”

Jesus Kosēya Nigin Ifelnēdin

(*Matyu 6:9-13; 7:7-11*)

11 ¹ Naa taka bun, Jesus modoū taka bun kosē yen. Sain ī bure fele di, yogon dō fiya tamo takam Jesus irokenen, “Odug, amā kosēya nigin ufelnamā, Jon, ne dō fiya tar ifelnēdin gen.”

² Jesus idi irokenēdin, “Sain ā kosē gouf, eig ge urōgouf:

“Dei,

ō yanā fateul ibodōf,

ogon tano isiyouf.

³ Naa mugu mugu bun, naa anī nē saaf wanamāf.

⁴ Ganan amā bun mosor dinof, amā idi neid mosor nigin wederamā tu kelef,

age fiya bagai, òg amã nemã mosor nigin wederẽ tu kel.

Age fen, kisi famãya bun to uroulemãf.’”

⁵Age ye fen, ì idi irokenẽdin, “Ãgenei taka ì, ne mou ado, anĩ bõ atun ì gein ile fen, irokenẽf, ‘Mou, bret towo nem usenna, ⁶ere nigin, aya neu tã taka, aya bun delẽ isil, anĩ ere, aya ì yõya nẽ ereb taka sã.’

⁷“Age ye di, ì aaben tamal anim irõf, ‘Aya kabĩ totol to wana. Sukar mogo kotũ felel, aya neu kesu tar geid mogo fataren mainek. Aya fã au fen, ereb taka ifonõya kisi feleya sã.’ ⁸Aya ã arokeneik, ì, ne mou nigin to fã ye fen, bret ifenẽf, anĩ ere, tamo are kukiãya sã kinĩ yei fiyẽ di, fã ye fen, ereb ì orof anĩ kilei ifenẽf.

⁹“Anĩ nigin, aya ã arokeneik, to gouf, agef ã ifeneif; umirẽgouf, ã gurug gouf; godu godu gouf, ã sukar kã feneif. ¹⁰Aibem taka to fouf, yalouf; aibem taka imirek, gurug fouf; aibem taka godu godu fouf, sukar kã fel kenẽf.

¹¹“Ã tama tar, aim ãgenei kesu gau nigin to fef, anĩ ban gogour wenẽgouf de? ¹²Takag, ì tataro faat nigin to fef, ì ambei wenẽgouf de? ¹³Ã seseneĩ bagai, anĩ ere, ãgenei kesu safina biya biya anĩ ifenẽdiya, ã keleĩ bagai youf are, ãgenei anĩ wal fiya, Temeĩ saa ilun ibodok, Awa Uur Fateul aib idi to difiyek, idi ifenẽdiyof bagai!”

Jesus Belsebub Ado Difiyen

(*Matyu 12:22-30, 43-45; Mak 3:20-27*)

¹⁴Jesus ait ifokeleya nẽ kaa sane irun. Sain kaa sane iyawo di, tamo ait ifokelen od wogõ yen, age fe di, tamo kayau musei terẽ den. ¹⁵Anĩ ere, tamo tunĩ diron, “Are kaa sane neid mudur Belsebub yana bunem, ì kaa sesen irudif.” ¹⁶Tunĩ Jesus kisi difiye ken, saa ilun tamal uris nigin to difen.

¹⁷Jesus idi neid kisi kelei ken, idi irokenẽdin, “Tano taka yogo kiwai ifen ken, fara fouf, are sane lauf, fõ taka yogo kiwai ifen ken, fara fouf, are kubũ youf. ¹⁸Satan ì yogo kiwai ifen ken, fara fouf are, yogon tano naig fe ifarauf? Aya enĩ orok, ere nigin, ã urõgef, aya Belsebub yana bunem kaa sesen arudif. ¹⁹Are aya Belsebub yana bunem kaa sesen arudif are, ere bunem ãgenei dõ fiya tar kaa sesen dirudidig? Anĩ nigin, idim ã es diyeif. ²⁰Anĩ ere, aya Negur nẽ ima gege bunem kaa sesen arudif are, Negur nẽ tano mogo ã bun isil.

²¹“Tamo megeir ado taka, ì waila kisi feleya ado yogon fõ lo fef are, in safina are totoũ. ²²Anĩ ere, taka ì yogon megeir wal fiya anim ironẽ lai fiye ken, yogon waila ì anĩ bun totol yaledig anĩ son fe fen, in safina gadõ fouf.

²³“Taka ì aya to fedẽ fiyaf, ì neu kiwai, takag, ì aya ado to kuru mafef are, ì firagagaũ fef.

²⁴“Sain kaa sane tamo bun tamal ulõ yeis fen, gerere tuan ile, si inoya modoũ imirek ile to fotou fef. Agef fen, ì irok, ‘Aya fõ atoron anĩ bun

baban kelauf.’ ²⁵Sain ĩ kel isif, fõ ani waĩ difel fen, madur difen anĩ ilef. ²⁶Anĩ nigin, ĩ ile fen, baban kaa sesen ĩ wal fiya sewen anĩ geif irou isif, age de fen, idi namen dile difaref. Age dife di, tamo anĩ gai sane bagai lef, uruwa bun nẽ tobonunã anĩ wal fiya.”

²⁷Jesus eneidi nigin wogõ ye mog, tamo kayau atun kayau taka iweig iron, “Sinã õ gõ yo ken, su ifonon, are ĩ el fiyek.”

²⁸Ĩ solof iron, “Age fiya ban, Negur nẽ od karĩ de fen, dõ difef anidi, el fedif.”

Jona Bun Uris (*Matyu 12:38-42*)

²⁹Tamo kayau guru fiya mala oduge di, Jesus iron, “Tamo kayau, gama sain enei bun dibodok, are sane bagai. Idi memelik nigin to difef, anĩ ere, taka to afenēdiyof, de profet Jona nẽ uris anĩ dogol afenēdiyof.

³⁰Jona are Niniwe taun tamo kayau bun uris, age fiya bagai, Tamo Naal ĩg sain enei nẽ tamo kayau bun uris. ³¹Es fiya sain bun, Kuin Saut tamal fã ye fen, tamo kayau sain enei bun geid, idi neid mosor nigin kurõ falaisiyof, ere nigin, kayau anĩ Solomon nẽ keleĩ karĩ youf nigin, teneub idiyon tamal isin, gama taka Solomon wal fiya are yeir. ³²Es fiya sain bun, Niniwe tamo kayau fã de fen, tamo kayau sain enei bun geid, idi neid mosor nigin kurõ difalaisiyof, ere nigin, idi mogo Jona wogõ ye di, waud falei den, gama taka Jona wal fiya are yeir.”

Bouwa Nẽ Lam (*Matyu 5:15; 6:22, 23*)

³³“Taka nem lam tõi fen, to iminēyan be, beĩ kur inodig, age fiya ban, in yoki bun iseginēdig, age fe di, idi aabē disif anidi lalan dilouf. ³⁴Malã are bouwã nẽ lam. Õ malã biyauf are, ogon bouwã ganane lalan barikãf. Anĩ ere, õ malã sesen lauf are, ogon bouwãg gugum kalauf. ³⁵Anĩ nigin, lalan õ ado anĩ gugum keleya nigin lo walauf. ³⁶Age fiya nigin, ogon boũ ganane lalan barikãf fen, siri sitakã to gugum ouf are, lam nẽ lalan õ bun so fe di, yaor ledig gen, bouwa ganane oditekei lalan ouf.”

Jesus Farisia Tamo Ado Lo Ifelnēdiya Tamo Isisnēdin (*Matyu 23:1-36; Mak 12:38-40*)

³⁷Sain Jesus wogõ ye bure fele di, Farisia tamo takam ĩ, Jesus ado saaf dãf nigin iweignē di, aaben ile, tebol bun ibodon. ³⁸Anĩ ere, Farisia tamo ĩ, Jesus ima ketem kulo fiya sã, saaf nigin ibodon anĩ ile fen, terē yen.

³⁹Age fe di, Odug ĩ irokenen, “Faria tamo ã, kap ado beĩ agara kulo gedig, anĩ ere, ã namein akorouya ado sanem barikã. ⁴⁰Ã neneya tamo! Negur agara inon anĩ, nameg to inon de? ⁴¹Anĩ ere, ereb beĩ namen ibodok anĩ maleg wenēdigouf, ago ge di, ereb ereb ganane ã bun filiya ibodõf.”

⁴²“Farisia tamo ā meleilon ado, ere nigin, ā āgenei edē, bakso ado, kabier tamal ereb ereb ganan farag fen, ten tekelei Negur wenēgedig, anī ere, ā lo es fiya ado Negur nigin wau laa fiya utorōgedig. Ā dum nē anī dōg fen, uruwa nē anīg to utorōgem, are dem.

⁴³“Farisia tamo ā meleilon ado, ere nigin, ā Juda neid uub fō bun modoū malabag ibodōya ado, maket modoū bun tamo kayau idim sere diyeik anī oroyeik.

⁴⁴“Ā meleilon ado, ere nigin, ā tamo mekura dede fiya gen, tamo idi keleī sa ken, teten diyōdig.”

⁴⁵Lo keleī tamo taka Jesus irokenen, “Tise, ō enei urō di, ō amāg kono wamak.”

⁴⁶Jesus solof iron, “Lo keleī tamo, āg meleilon ado, ere nigin, ā tamo kayau, morō idi faali fiya nigin malai bagai anī wenēdigidig, anī ere, ā aug imeī gege tekelei idi isennēdiya nigin to fitei yedig.

⁴⁷“Ā meleilon ado, ere nigin, ā profet neid matmat unogedig, anī ere, ā tubuī tarem idi didenkesin. ⁴⁸Anī nigin, āgenei tubuī tar profet age difedin anī, ā megeir ge fen, yaor gef, ere nigin, idi profet didenkesin, ā idi neid matmat unogedig. ⁴⁹Age fiya nigin, Negur yogon kisi biya bunem iron, ‘Aya fau idi bun profet, aposel ado sur afediyouf, age afe di, idi tunī didenkeis fen, tunī kafī fiya difenēdiyof.’ ⁵⁰Anī nigin, teneub inon gariya bunem isif, profet ganan neid naudeid fi felen anī nē mala solo, tamo kayau gama sain enei bun idim dalouf, ⁵¹Abel nē naud bunem ile, Sekaraia ī tempel alta ado atun dukesin in naud bun. Aya ā momoi arokeneik, naud enī ganan nē mala solo, tamo kayau gama sain enei bun idim dalouf.

⁵²“Lo keleī tamo, ā meleilon ado, ere nigin, ā keleī nē ki walelegen, ā aug namen ileyā sa ken, ā idi namen dilef anidi neid sukar katī welegef.”

⁵³Sain Jesus modoū anī itoron, Farisia tamo, lo ifelnēdiya tamo geid, ī bun kiwai totol dino, to fiya fire fire musei to difiyen, ⁵⁴ereb od wogō youf bun dirounēf nigin tari difiyen.

Weder Irouya Ado Tai Fiya

(Matyu 10:26-33)

12 ¹Dirub kele di, tamo kayau tausen musei biya guru difen, anī bun idi abob tete tete lalai de difaren, age dife di, Jesus in dō fiya tar ketem irokeneid fen, iron, “Ā, Farisia tamo neid yis nigin lo welegei, are mala yaleya tobonunā. ²Gama ereb dede fiya yenek, are ganan fau lelek falauf, gama ereb iminēyan yenek, are ganan fau yaorouf. ³Ā gugum bun wogō gen anī, fau gaa lalan bun karī douf, ā aaben wedereim kosesē gen anī, fau fō sokoronem kurō difesiyouf.

⁴“Neu mou tar, aya ā arokeneik, idi bouwa dukeis fen, anī dumen ereb taka baban age fiya kisi feleya sā anidi to kumī wodig. ⁵Anī ere, ā aib

kumĩ wiyẽgouf anĩ afelneif: Ì bouwa yukeis fen, dumen ã hel bun irãyeif nigin megeir ado anĩ kumĩ wiyẽgouf. Ariya, aya ã arokeneik, ì kumĩ wiyẽg. ⁶Fisisir faif, tuwenti toea nẽ nem na nigin to sur gedig de? Anĩ ere, Negur ì anidi taka nigin to weder tu keledig. ⁷Momoi, Negur ãgenei mudurei bun fatiyei ganan iwes yalen. To kumĩ wog, ã fisisir musei wal fediya.

⁸“Aya ã arokeneik, aibem taka, aya nigin tamo meleid bun kurõ falaisiyouf, Tamo Naal ìg, ì nigin Negur nẽ engel meleid bun kurõ falaisiyouf. ⁹Anĩ ere, taka ì, aya nigin tamo meleid bun wa fouf, ayag ì nigin Negur nẽ engel meleid bun wa afouf. ¹⁰Taka ì, Tamo Naal nigin kiwai ifen ken, kobu yef are, in mosor yalelauf. Ani are, taka ì, Awa Uur Fateul kiwai ifen ken, kono fiyek, in mosor to yalelauf.

¹¹“Sain ã Juda neid uub fõ bun guri diyei diroule, mudur adodo yeneid adodo meleid bun difarneif, an wauĩ moro ken, aug isenneif nigin naig mafouf, ere mauf, wog fen, to sii yeif, ¹²ere nigin, sain anĩ bun, Awa Uur Fateul ereb wogõ gouf nigin, ifelneif.”

Neneya Tamo Safina Ado Nẽ Yaab Od

¹³Tamo kayau musei atun, tamo takam Jesus irokenen, “Tise, neu turau urokenẽ di, amã urom akor foi mafouf.”

¹⁴Jesus solof iron, “Aim aya ã atun es fiya tamo be, foi fiya tamo igirnan?” ¹⁵Age ye fen, Jesus idi irokenẽdin, “Lo welegei, ereb ereb ganan bun akorouya anĩ lo welegei, tamo nẽ mata in safina musei bun to ibodok.”

¹⁶Age ye fen, ì yaab od enei idi irokenẽdin, “Tamo taka safina musei ado, ne teneub bun saaf musei yaledig. ¹⁷Ì kisi yalen, ‘Aya naig afouf? Aya neu saaf inoya nẽ modou sã.’

¹⁸“Agef fen, ì iron, ‘Aya eig afouf anĩ de. Neu ki narĩ afeleid fen, odug nuwa anodiyouf, an neu saaf ado ereb ereb ganan anouf. ¹⁹Age afel fen, aya yug nigin orõf, “Õ ereb ereb biyai biyai musei biya, yar musei nẽ unof. Ibodõya karika, saaf, naan wokon, waũ el fouf.”’

²⁰“Anĩ ere, Negur ì irokenen, ‘Õ neneya! Bõ enei bun bagai, aya ogon mata alelkonõf. Age afe di, aim ogo nigin dodok won anĩ yalouf?’ ²¹“Taka ì yogo nigin, agef safina kuru fef, anĩ ere, Negur mala bun maleg ibodok, ì bun eig bagai fe, wõ youf.”

To Osig

(Matyu 6:25-34)

²²Age ye fen, Jesus in dõ fiya tar irokenẽdin, “Age fiya nigin, aya ã arokeneik, ã ãgenei bouweĩ mata ibodõf nigin to osig fen, ere saaf tãf gouf, ã ãgenei bouweĩ nigin to osig fen, ere gabar tafilaif gouf. ²³Mata anĩ saaf wal fiya, bouwa anĩ gabar wal fiya. ²⁴À kalog uledigedig, idi saaf

to diteneḏdig, idi saaf to u difedig, idi ki be, udū inoya modoū sã, anī ere, Negur ifoutneḏdidig. Ā ninã anidi wal fediya bagai! ²⁵ Ā takam yogon mata nigin osi ye fen, aua tekelei tobol fiya kisi feleya de? ²⁶ Ā naal bagai enei age fiya kisi feleya sã nigin, ere nigin anī ā ereb ereb tunī nigin osi gef?

²⁷ “Aa munī naig fe odugedig anī ulegedig. Idi kabī to daledig, to diwadig. Anī ere, aya ā arokeneik, kulu King Solomon yogon fula fiya medeīya bun naki gegē biya biya ifonun animeg, aa munī taka to wal fen. ²⁸ Anī ere, Negur dubur aa munī gama dogol ifarauf, nile di, yã irãf anī, agef naki fediyof are, ā idi wal fediya bagai, Negur naig fe ā ifounneīf, ā momoiya naal bagai ado! ²⁹ Anī nigin, ā wauī ere saaf wãgauf be, ere naan wãgauf anī bun to unog, anī bun to osig. ³⁰ Are haiden idi enī ganan nigin meleid dimirēdig. Āgenei Temeī ā lau gef anī ganan keleī. ³¹ Anī ere, Negur nē tano umirēg, ago ge di, safina eneidig ifeneīf.

³² “Musei sã ā, to kumī wog, ere nigin, āgenei Temeī, tano anī ā ifeneīya nigin wau al fen. ³³ Āgenei safineī na sur ge fen, maleg wenēdigouf. Ā mugu mugu moni nē kodol to serek fouf anī uwagauf, agog fen, saa ilun nē safina biya biya to sa kalauf anī kuru gouf, an bē tamo non to isidig, tutū to dāf. ³⁴ Āgenei safina biya biya ibodok nē an, wauīg an yenēf.

Jesus Kel Isiyouf Nigin Ololo Fiya (Matyu 24:43-51)

³⁵ “Kabī nē naki ufonūg fen, āgenei lam tōg saika wog, ³⁶ tamo idi, nedi odug, tamo kayau ado bagu fiya nē tar bunem kelouf nigin tari difedig, anī bunem, sain ī isi, sukar godu godu fe di, idi sã kaisã bagai ī sukar kã difelkenēf anidi gen ago gouf. ³⁷ Ferfer anidi ololo dife mog, nedi odug isi ilediyouf anī, idi nigin deuf, aya ā momoi arokeneik, ī fau yogo kabī nē naki ifoun kel, ferfer tebol bun ibodneīd fen, isi, aruneid yalouf. ³⁸ Ferfer anidi saika difel mog, nedi odug, bō atun be, we ado be isi ilediyouf anī, idi nigin deuf. ³⁹ Anī ere, ā enei keleī youf: Fō marau ī, sain nanī be bun, bē tamo isiyouf anī keleī youf are, ī yogon fō lo fe di, to narī fouf. ⁴⁰ Āg saika gouf, ere nigin, Tamo Naal ī fau sain to isiyouf gouf bun isiyouf.”

⁴¹ Pita to fen, “Odug, ō yaab od enei amã nigin de, ganan nigin urok?”

⁴² Odug solof iron, “Ferfer taka aim anī, dō fiya biya, kisi biya ado de? Ī, yogon odugem ī yogon odug nē fō bun, anidi neid saaf dogo neid sain kilei, dōf ifeneḏdiyof nigin, ima bun inof. ⁴³ Sain tamo odug kelouf bun, ferfer biya bagai age fe di, ilouf, tamo odug ī el fiyēf. ⁴⁴ Aya ā momoi arokeneik, tamo odug ī, yogon safina ganan, ferfer anī ima bun inouf. ⁴⁵ Anī ere, ferfer taka ī wau bun irōf, ‘Neu tamo odug isiya nigin sain meluk yalef,’ age ye fen, ī gariya ino, tamo ferfer ado kayau ferfer iden ken, ī yogo saaf biya naan biya yokon, aai sē fedig. ⁴⁶ Ferfer anī nē tamo odug, in isiya nē naa ferfer to isiyouf ye fen, kisif mog, in isiya sain ī keleī

sā mog, isiyouf. Tamo odug, ferfer anī gudūf fisik fe fen, momoiya sā geid, nedi modoū bun inenēf.

⁴⁷“Ferfer taka ī, yogon tamo odug nē oroya kelei ken, to dodok fef be, yogon odug orof anī to dōf age fef, ī fau wōf musei fouf. ⁴⁸Anī ere, taka ī to kelei ken, darau yaleya nē anī age fef, ī musei to wō fouf. Aib taka ī musei ifenen, ī bun musei yaleya nigin irokenēf, agef fen, taka ī lo fouf nigin musei biya ifenen, ī bun musei biya yalouf nigin to fiyēf.

Jesus Maur Gudū Fiya Nigin To Isin, Isoreya Nigin
(*Matyu 10:34-36*)

⁴⁹“Aya tenebur yā arou asiyouf nigin asin, yā mala kaur mogom are, aya orou bagai fiyam. ⁵⁰Anī ere, aya naan igūya taka fau alouf, anī nigin, aya wau fatuk morok ile, anī kisi falauf. ⁵¹Ā kisi gef, aya tenebur ein maur gudū fiya arou asiyouf nigin asin de? Sā bagai, aya ā arokeneik, isoreya nigin asin. ⁵²Gama ilauf bun, ibor tekelei bun, idi faif fara de fen, towom uru kiwai difenēdi di, urum towo kiwai difenēdiyof. ⁵³Idi fara de fen, tamam kesu kiwai ifenē di, kesum tama kiwai ifenēf, sina, ne barai kiwai ifenē di, ne barai sina kiwai ifenēf, sina yanawau kiwai ifenē di, yanawau kayau sina kiwai ifenēf.”

Sain Nigin Es Fiya
(*Matyu 16:2, 3*)

⁵⁴Jesus tamo kayau musei irokenēdin, “Sain ā gaa ileyan budū fā ye di, uleg fen, ā kaisā bagai urōgedig, ‘Uyē isiyouf,’ ago ge di, age fedig. ⁵⁵Takag, yau karag maaī ubunem fū fef, ā urōgedig, ‘Uruwa dō fadauf,’ are agef wō yedig. ⁵⁶Ā mala yaleya tamo! Teneub saa ado suma dinof anī uleg fen, es gouf nigin ā kelei. Naig fe di, sain enei nē suma es fiya nigin ā to keleik de?

⁵⁷“Ere nigin ā aug erab biya anīg to es gedig? ⁵⁸Ō ogon kiwai ado medistret bun uleg fen, naab luwen ogon kiwai ado od madur wouf, to agouf are, ī ō yale, es fiya tamo bun inenōf, age fe di, es fiya tamo ō polis bun inenō di, polis ō kalabus bun inenōf. ⁵⁹Aya ō arokonok, ō wareg ganan to unolauf are, ō kalabus bun to kutū wesiyouf.”

Wauī Falei Gouf, Sāf, Inanakalauf

13 ¹Sain anī bun, tunī an difaren anidim, Pailat Galili temeleid tunī neid naudeid ado dogo neid sesewi fiya nē safina ekul fen anī, Jesus dirokenen. ²Jesus solof iron, “Ā kisi gef, Galili temeleid eneidi age de darau dalen nigin, idi neid mosor Galili temeleid ganan neid mosor wal fiya de? ³Aya ā arokeneik, sā bagai! Anī ere, ā wauī to falei gouf are, āg ganan inanakalauf. ⁴Takag, Siloam fō meluk tamo kayau bun kubū ye fen, idi eitin idenkesin. Ā kisi gef, idi neid mosor, tamo kayau ganan

Jerusalem taun difaref neid mosor wal fiya de? ⁵Aya ã arokeneik, sã bagai! Anĩ ere, ã wauĩ to falei youf are, ãg ganan inanakalauf.”

⁶Age ye fen, Jesus yaab od enei iron, “Tamo taka, aa fig tekelei yogon wain kabier itenen, anĩ ĩ ile, faat nigin mala itoton, anĩ ere, taka to ilen. ⁷Anĩ nigin, ĩ wain kabĩ lo fiya tamo irokenen, ‘Yar towo aya asi, aa fig enei bun faat nigin malau atoton, anĩ ere, taka to ailen. Utu urã! Ere nigin teneub gigiru yakasif?’

⁸“Kabĩ lo fiya tamo solof iron, ‘Odug, baban yar tekelei utorkana len, aya gariyan ku kalĩ afel, yaro te anouf. ⁹Yar taka bun biyau, are deuf! Sãf are, utu urã.’”

Jesus, Kayau Taka Bagiya Fe Fesen, Sabat Naa Bun El Fiyen

¹⁰Sabat naa taka bun, Jesus Juda neid uub fõ taka bun od ifelnēdin.

¹¹Kayau taka, yar eitín kaa sanem irounen nigin dagi ado, an ibodon. Kayau ĩ bagiya fe fesen, agef fen, ĩ madur ifareya kisi feleya sã bagai.

¹²Sain Jesus kayau anĩ lof fen, ĩ wagen iweigne ken, ĩ irokenen, “Kayau, õ ogon dagi bun tamal õ karika afonok.” ¹³Age ye fen, Jesus ĩ bun ima ino di, kaisã bagai kayau ĩ madur le ifar fen, Negur yana yalesen.

¹⁴Juda neid uub fõ nē mudur, Jesus Sabat naa bun dagi el fiyen nigin, name sane fen, tamo kayau irokenēdin, “Kabĩ yaleya nigin naa sigis ado. Anĩ nigin, naa anidi bun usig el yeif, Sabat naa bun sã.”

¹⁵Odug ĩ irokenen, “Ã, mala yaleya tamo! Ã mugu mugu Sabat naa bun, āgenei bulmakau be, donki be difaredig modoũ bun tamal birug fen, naan ifenēdiya nigin to gurig ulegedig de? ¹⁶Kayau enei, ĩ Abraham nē barai, ĩ Satanem sain meluk yar eitín ifokelnen, ĩ ifõya anĩ bun tamal Sabat naa bun to karika afenēf de?”

¹⁷Jesus od enei wogõ ye di, yogon kiwai tar ganan mama fedin, anĩ ere, Jesus ereb ereb biya bagai age fen ganan nigin, tamo kayau musei ganan waud al fen.

Masted Faat Yis Ado Nē Yaab Od (*Matyu 13:31-33; Mak 4:30-32*)

¹⁸Anĩ nigin, Jesus to fen, “Negur nē tano anĩ, ere taka gen? Ere bun aya kisi afe di, susu falauf? ¹⁹Are masted faat gen, anĩ tamo takam yale fen, yogon kabier itenen. Anĩ odug fen, aa wõ ye di, ninã ilun temeleid disi, were bun dibodadan.”

²⁰Baban ĩ to fen, “Negur nē tano anĩ, ere taka bun aya kisi afe di, susu falauf? ²¹Are yis gen, anĩ kayau takam yale fen, flawa odug ado falei fe di, ganan gē yen.”

Bobog Kidõ (*Matyu 7:13, 14, 21-23*)

²²Jesus Jerusalem taun ilauf nigin naab luwen iyok ile fen, taun ado fonõ fonõ ile, od ifelnēdin. ²³Takam Jesus to fiyen, “Odug, are teke tekelei dogol kel yalediyof de?”

Jesus idi irokenēdin, ²⁴“Bobog kidō anī ileya nigin kabī total walogouf, ere nigin, aya ā arokeneik, musei idi namen dilauf nigin age difouf, anī ere, to kisi falauf. ²⁵Sain fō marau fā ye fen, sukar inolalau, ā serē ufareg fen, godu godu ge ugonēgouf, ‘Odug, sukar kā wanamāf.’

“Anī ere, ī solof irōf, ‘Aya ā keleī sā, ā nainenem usigen.’

²⁶“Age ye di, ā urōgouf, ‘Amā ō geid saaf naan ado ton, ago fen, ō nemā naab bun od ufelnamak uyon.’

²⁷“Anī ere, ī solof irōf, ‘Aya ā keleī sā, ā nainenem usigen. Ā sane ago gedig ganan, aya malau bun uyaleleg!’

²⁸“Sain Abraham, Isak, Jakop, profet ganan geid, Negur nē tano bun uledig fen, ā aug mayarē irarāyeif, an inā wifirig fen, goboreī kikokō youf. ²⁹Tamo kayau gaa iseyan temeleid, gaa ileyan temeleid, yat temeleid, fa temeleid disi, Negur nē tanon tar bun idi neid modoū dalouf. ³⁰Momoi, an idi dumen dibodok fau malabag dibodōf, idi malabag dibodok fau dumen dibodōf.”

Jesus Jerusalem Nigin Wau Gudū Fen

(Matyu 23:37-39)

³¹Sain anī bun, Farisia tamo tunī Jesus garan disi dirokenen, “Modoū enei utor ken, taka bun ule. King Herod ī ō inokesiyou fenē.”

³²Jesus solof iron, “Uleg, gaū kuī anī urokenēg, ‘Gama ado nil, aya kaa sesen aruid fen, tamo kayau el afediyouf, age afē fen, naa towo bun, aya neu kabī anī uyu katō afalau.’ ³³Anī ere, aya gama, nil, arā toko tokō afouf, momoi bagai profet taka Jerusalem taun to ito ken, firen laa fouf!

³⁴“O Jerusalem, Jerusalem, ō profet udenkeis fen, ō bun sur fedig anidi, meein meein wedidig, sain ganī aya ō wau afon ken, ogon gerē tar kuru afediyouf nigin age afedig, tataro sina momou waye farumen kuru fedig gen, anī ere, ō utorōdig! ³⁵Ulegouf, āgenei fō ā bun fonou lef. Aya ā arokeneik, ā aya baban to uleyagauf ile, ā fau urōgouf, ‘Odug yana bunem isif ī el fiya ado.’^t Sain anī bun, ā aya uleyagauf.”

Jesus Farisia Tamo Taka Nē Fō Bun

14 ¹Sabat naa taka bun, Jesus, Farisia tamo uyu irouya taka nē fō bun, saaf yōya nigin ilen, idi an Jesus ololo difen. ²Jesus wagen an, tamo taka bou didiya nigin darau yaledig anī ibodon. ³Jesus, Farisia tamo, lo keleī tamo geid to fedin, “Sabat naa bun, dagi el fediya anī lo dō fiya de, sā?” ⁴Anī ere, idi mutū difaren. Anī nigin, Jesus tamo anī yale, el fiye kel sur fiyē di, ilen.

⁵Agef fen, ī idi to difen, “Ā taka, Sabat naa bun, kesu be, bulmakau be taka kuren isilau, ā kaisā bagai to dī wasagauf de?” ⁶Age ye di, idi od solof irōya kisi feleya sā.

^t 13:35 Sam 118:26

⁷Jesus, tamo tebol bun modoū malabag anī gei dife di, ile fen, ī idi yaab od enei irokenēdin, ⁸“Tamo kayau ado bagu fiya nē tar bun, aib ō iweignōf are, modoū malabag anī to walouf, ere nigin, tamo taka ō wal yōya iweignen be. ⁹Age foug are, ā uru iweigneim marau isi, ō irokonōf, ‘Ogon modoū anī, tamo enei wenē.’ Age ye di, ō mama yo ken, modoū dumen bagai anī walouf. ¹⁰Anī ere, ō iweignōf are, modoū dumen anī walouf, ago di, iweignom marau isiyouf, ī ō irokonōf, ‘Mou, modoū biya bun godo urou usel.’ Age fe di, ō modoū malabag anī wale di, ā iweigneim turā tar ganan meleid bun ō yanā odug adouf. ¹¹Ere nigin, aib taka yogo yana yalesef, fau lai fesilauf, aib taka ī yogo yana lai fesilef, Negur ī yana yalesauf.”

¹²Age ye fen, Jesus fō marau irokenen, “Sain ō gaa atun saaf be, bō saaf wenēdiyof fenē, ogon mou tar, naud turā tar, sirag tar be, nē tā tar safina inid adodo to uweignēdiyof, agouf, idi aba diweignōf, anī bun ō mala solo difonōf. ¹³Anī ere, sain ō tar unouf, maleg, bouweid sesen, yeid kirorōya, meleid ifofakeleya anī uweignēdiyof, ¹⁴agouf, Negur ō el yōf. Idi aba ō ke de difonōya kisi feleya sā, anī ere, madur tamo neid mata kel fāya bun, Negur ō mala solo ifonōf.”

Tar Odug Nē Yaab Od

(Matyu 22:1-10)

¹⁵Tamo tebol bun weim dibodon anidi takam, od enei karī ye fen, ī Jesus irokenen, “Negur nē tanon tar bun tamo saaf yāf anī, ī el fiya ado.”

¹⁶Jesus solof iron, “Tamo taka tar odug dodok fe fen, musei iweignēdin. ¹⁷Tar sain bun, ī iweignēdin anidi irokenēdiyof nigin yogon ferfer sur fen, ‘Usig, gama ereb ereb ganan dodok felel.’

¹⁸“Anī ere, idi ganan de tekelei gen galā od dinon. Uyulil ī iron, ‘Aya gama bagai kabī na alen, anī nigin, aya anī ailau fenē alauf. O malalon ado, aya to asiyouf.’

¹⁹“Taka iron, ‘Aya bulmakau ten na alen, anī idi naig fiya anī ailau fenē elef. O malalon ado, aya to asiyouf.’

²⁰“Takag iron, ‘Aya gama bagai kayau mata alen nigin, aya isiya kisi feleya sā.’

²¹“Ferfer kel ile, ne odug od enei irokenen. Age fe di, fō marau name sane fen, yogon ferfer irokenen, ‘Kaisā bagai ule, taun nē naab odug, naab nanaal ado dō wo fen, maleg, bouweid sesen, meleid ifofakeleya, yeid kirorōya anidi guri urou usi.’

²²“Ferfer iron, ‘Odug, ō urom are mogo age afel, anī ere, modoū fau lolokā.’

²³“Age ye di, odug yogon ferfer irokenen, ‘Naab uyok ule fen, fonō fonō naabur tamo kayau idi anī disiyouf nigin total bagai urokenēdi di, disi, neu fō isokosauf. ²⁴Aya ā arokeneik, aya tamo idi aweignēdin anidi taka, neu tar bun saaf bagai to kobū de dilouf.’ ”

Kisi Es Wo Fen, Jesus Dō Wouf
(*Matyu 10:37, 38*)

²⁵Tamo kayau musei, Jesus weim dile fen, ī falei yel, idi irokenēdin, ²⁶“Taka ī aya gein isif, ne tama, sina, ne kayau, kesu tar, ne tura tar, main tar, yogon matag to itorōf are, ī neu dō fiya tamo wō youf nigin kisi feleya sã. ²⁷Takag, taka ī yogon aa tetek to faali fe fen, aya dō fiyaf, ī neu dō fiya tamo wō youf nigin kisi feleya sã.

²⁸“Ā taka, fō meluk taka inoya nigin orouf are, ī tetun ibod ken, fō inolauf nigin moni kisi feleya ado be anī es fouf, age fiya sã de? ²⁹Ere nigin, ī fō gariya ino mā, inoleya to kisi falauf are, tamo kayau ganān anī dile fen, kasã difiye ken, ³⁰dirōf, ‘Tamo enei fō kare fen, anī ere, inoleya kisi feleya sã.’

³¹“Takag, king taka, king taka ado kusī douf nigin, ī ten tausen kusī tamo adom, king taka tuwenti tausen kusī tamo ado kusī disif anī, kusī bun wal fiyēya kisi feleya be sã be anī, tetun ibod ken, es fouf, age fiya sã de? ³²Ī to kisi falauf are, ī king taka fau gerō ifar mog, wowor fiya tamo sur fedī di, idi komo fiya nigin to difiyēf. ³³Age fiya gen bagai, ā taka ī, ereb ereb ganān ī ado anī to itorōf are, ī neu dō fiya tamo wō youf nigin kisi feleya sã.

³⁴“Anī nigin, sol ī biya, anī ere, in kai sa kalauf are, naig fe di, ī baban kai youf? ³⁵Sol age fiya are, teneub ado falei fiya nigin ado, gaar te ado falei fiya nigineg to biya, anī nigin dirailedig.

“Aib ī kariya nigin weder ado, utornē karī youf.”

Sipsip Fō Yelen Nē Yaab Od
(*Matyu 18:12-14*)

15 ¹Takis yaleya tamo, mosor adodo geid ganān, Jesus karī difiyēf nigin ī non disin. ²Anī ere, Farisia tamo, lo ifelnēdiya tamo geid, nauseir de fen, diron, “Tamo enei, mosor adodo aan fiyeid fen, weim saaf doko.”

³Age de di, Jesus yaab od enei irokenēdin, ⁴“Ā taka wan handred sipsip ado, anī tekelei iminkalauf are, ī nainti-nain sipsip yaorin itorneid fen, iminkelen anī imirek ile fotou fedig, age fiya sã de? ⁵Sain ī fotou fouf, ī wau adod fen, yale, benerin orowa sef, ⁶fō bun ilauf. Agef fen, ī ne mou tar ado, ne tā tar gou feid irōf, ‘Ā aya geid kulī tauf. Aya neu sipsip fō yelen anī fotou afel.’ ⁷Aya ā arokeneik, age fiya gen bagai, mosor ado tamo taka wau falei yef bun, saa ilun kulīya odug adouf anim, nainti-nain madur tamo baban faleiya nē sã idi nigin kulīya wal fiya.

Silwa Koin Moni Iminkelen Nē Yaab Od

⁸“Takag, kayau taka silwa koin moni ten ado, anī tekelei iminkalauf are, ī lam tōf, fō waif fen, el fe imirek ile fotou fouf, age fiya sã de? ⁹Sain

ĩ fotou fouf, ĩ ne mou tar ado, ne tã tar gou feid irōf, ‘Ā aya geid kulĩtauf. Aya neu silwa koin moni iminkelen anĩ fotou afel.’ ¹⁰Age fiya gen bagai, aya ã arokeneik, mosor ado tamo taka wau falei yef ĩ nigin, Negur nē engel meleid bun kulīya odug wō yef.”

Kesu Fō Yelen Nē Yaab Od

¹¹Jesus tobol fe iron, “Tamo taka kesu uru adon. ¹²Ibuyem tama irokenen, ‘Dei, akor neu anĩ fara wana.’ Anĩ nigin, temeid yogon safina idi atun foi fen.

¹³“Anĩ bure fel fen, sain meluk to ilele di, kesu ibuye, safina ĩ ado ganan kuruf yale irou, teneub taka bun gerō biya ilen, an in safina tobonunã to biya bun daũ felen. ¹⁴Ī ereb ereb ganan daũ fele di, teneub anĩ bun naũ odug wō yen, age fe di, ĩ bun lau fiya wō yen. ¹⁵Anĩ nigin, ĩ ile, fō morou taka bun kabĩ yalouf nigin to fiyē di, fō moroum ĩ bor saaf ifenēdiyof nigin yogon kabier sur fen. ¹⁶Ī naũ bagai nigin bor saaf dō di, ĩg anĩ yōya nigin orodig, anĩ ere, takam ereb taka to ifenēdig.

¹⁷“Ī kisi kelen sain, ĩ iron, ‘Neu dei ĩ kabĩ tamo musei ado, idi saaf barikã. Aya ein naum laa fiyau fenē! ¹⁸Aya fã au, neu dei garan kelau fen, ĩ arokenēf: Dei, aya saa ilun ado ō bun mosor anon. ¹⁹Aya to biya nigin, neu kesu to wouf, ogon kabĩ tamo oroi waledin taka gen waleyau.’ ²⁰Anĩ nigin, ĩ fã ye, tama gein ilen.

“Anĩ ere, ĩ fau gerō iyok isi mog, tama ĩ kesu ile fen, ĩ nigin wau fatuk yũ di, kesu gein gudu ref ile, kakarai fiye ken, umã fiyen.

²¹“Kesum tama irokenen, ‘Dei, aya saa ilun ado ō bun mosor anon. Aya to biya nigin, neu kesu to wouf.’

²²“Anĩ ere, tama ĩ yogon ferfer irokenēdin, ‘Gamanem kolos biya bagai waleg urousig, ĩ ufounnēg, ima gege bun sai unog fen, ye bun su unokenēg. ²³Bulmakau lubu bou dīya waleg urousig ukesig. Ada tar tano tokon, sigigi tafouf. ²⁴Ere nigin, neu kesu enei laa fen anĩ baban matal, ĩ fō yelen anĩ baban fotou tafiyem.’ Anĩ nigin, idi gariya dino sigigi difen.

²⁵“Sain anĩ bun, kesu matu ĩ kabier ibodon. Dum ĩ iyok isi, fō kelē fiye ken, fō non kui de gurū de mog, karī yen. ²⁶Agef fen, ĩ kabĩ tamo taka iweigne ken, to fiyen, ‘Oun ere naig difef?’ ²⁷Kabĩ tamo ĩ aiten yale iron, ‘Turã kel isil, anĩ tamã bulmakau lubu bou dīya yum, ere nigin, tamam ĩ bouwa totoũ biya bagai ado kel yalel.’

²⁸“Age ye di, tura matu name sane fen, fō bun ileyā nigin itoron. Age fe di, tama mayarē ile wowor fiyen. ²⁹Anĩ ere, kesu ĩ tama solof irokenen, ‘Ulefe, yar enei ganan aya ō sigor taka to wal afe fen, arunã alef asin. Anĩ ere, ō aya meme lubu taka wana di, neu mou tar geid to sigigi mafen. ³⁰Anĩ ere, ō naal enei are, ogon safina, kayau bouweid na nē sur difedig anidi bun daũ fel fen, fonō isi di, ō bulmakau lubu bou dīya ukenem!’

³¹“Tama iron, ‘Neu kesu, ō aya ado faimud tabodōdig. Safina ganan aya ado, are ogon. ³²Anĩ ere, ada sigigi tafe fen, wauda al fem bagai,

ere nigin, turā enei laa fen anī baban matal, ī fō yelen anī baban fotou tafiyem.’ ”

Kabī Tamo Neid Orowa Tobonunā Sane Kisi Biya Ado Nē Yaab Od

16 ¹Takag, Jesus in dō fiya tar irokenēdin, “Safina musei ado tamo taka, ī yogon kabī tamo neid orowam in safina daū fef yeya karī yen. ²Anī nigin, ī iweignē ile di, to fiyen, ‘Eī ere od anī ō nigin karī auf? Ogon kabī walēn anī faded wo di, karī auf, ere nigin, ō baban kabī tamo neid orowa to ubodōf.’

³“Kabī tamo neid orowa yogo nigin iron, ‘Gama aya naig afouf? Neu odug neu kabī yalelkanaf. Aya meku yaleya nigin totolou sã, agef måg, aya nonīya nigin mama ado. ⁴Aya naig be afouf are aya keleī, anī bunem sain aya neu kabī ein atorōf are, tamo kayau neid fō bun ileyā nigin aan difiyauf.’

⁵“Age ye fen, ī, yogon odug bun wareg dalen anidi mugu mugu iweignēdi di, disin. Ī tamo uyulil anī to fiyen, ‘Ō neu odug bun wareg ganī walēn?’

⁶“Ī aiten yale iron, ‘Eit handred galen aa oliv moul alen.’ ” Kabī tamo neid orowa ī irokenen, ‘Ogon wareg ditoton wale, kaisā ubod ken, fo handred utot.’

⁷“Age ye di, ī uyulil dō fiyen anī to fiyen, ‘Ba ō wareg ganī walēn?’

“Ī solof iron, ‘Wan handred wit bek alen.’

“Kabī tamo neid orowam ī irokenen, ‘Ogon wareg ditoton wale, eiti utot.’

⁸“Yogon odug ī, kabī tamo neid orowa idegēya tamal, ī kisi el fe yale fen, age fen nigin, yana yalesen. Ere nigin, tamo kayau teneub enei bun temeleid kisi el de dale fen, ereb dogo neid nigin tamo kayau lalan bun temeleid wal fediya age difedig. ⁹Aya ā arokeneik, teneub enei nē safina bunem ā aug nigin neī mou tar waledigouf, anī bunem, sain safina sa kalauf, mata gai ibodkeleya bun aan diyēif.

¹⁰“Taka ī ereb naal bagai el fe lo fef, odug buneg agef lo fouf, taka ī naal bagai bun idegek, odug buneg idegēf. ¹¹Anī nigin, ā tenebur enei nē safina to el ge lo gen ouf are, aim ā momoi nē safina lo fiya nigin ineneif? ¹²Ā takan nē safina to el ge kulatun gen ouf are, aim anī ā safineī ifeneif?

¹³“Kabī tamo takam odug uru bun to kabī yalouf. Taka nigin to wau yen ken, taka nigin wau laa fouf be, taka anī aruna yale fen, taka anī to awa yāf. Ā Negur nigin ado moni nigin aruna yaleya kisi feleya sã.”

¹⁴Farisia tamo moni nigin waud laa fedig anī, od enei ganān karī de fen, Jesus kasā difiyen. ¹⁵Age dife di, Jesus idi irokenēdin, “Ā bagai anī, tamo meleid bun, ā aug nigin biya age mafef gedig, anī ere, Negur ī wauī keleī bagai. Tamo ereb nigin waud fatuk difenek, are Negur mala bun ninir bagai.”

Ifelnēdiya Od Tobol Fiya

16“Lo nē od ado, profet neid od wogō def disi, Jon bun daun. Sain anī bunem, Negur nē tano nigin biya od wogō def disif, age fe di, ganan namen ileyā nigin mugu mugu teībir def. 17Saa teneub ado iminkeleya nigin are karika, anī ere, Lo bun itotoya togo fiya naal bagai taka to iminkalauf.

18“Taka ī aiwa iru fen, kayau taka yalouf are, ī seseirā inof, taka ī kayau tamo takam irun anī yalouf are, ī seseirā inof.

Safina Musei Tamo Ado Lasarus

19“Safina musei ado tamo taka, naa ganan bun kolos naki biya, saaf biya, ibodōya biya ibodōdig. 20Maleg taka yana Lasarus, gurumam barikā, safina musei ado tamo ne bobogē yenēdig. 21Agef fen, ī, safina musei ado tamo nē tebol bunem kuku ref anī yāf nigin orodig. Gaūg disi, guruma seum difedig.

22“Dum maleg tamo laa fe di, engelem Abraham wagen dirou diselen. Safina musei ado tamog laa fe di, mū difen. 23Laa neid modoū bun, safina musei ado tamo darau odug yale fen, ī gerō mala irakel, Lasarus Abraham wagen ibod mog, ilen. 24Agef fen, ī Abraham iweigne ken, iron, ‘Dei Abraham, aya nigin waū ino ken, Lasarus sur wiyē di, ima gege uyum naan kobūf fen, irosi baleu felu kouf, ere nigin, aya yā enei bun darau odug alef.’

25“Anī ere, Abraham aiten yale iron, ‘Kesu, ō mata ubodon sain, ō erēb erēb biya wale mog, Lasarus ī erēb erēb to biya yalen, anī karī wo, anī ere, gama ein ī wau wā fe di, ō darau odug bun ubodok. 26Takag, enei ganan teten, amā ā geid atun meku odug inon, anī bunem, idi ein tamal ā gein isiya nigin kisi feleya sā, takam an tamal amā gein ibal isiya nigineg kisi feleya sā.’

27“Ī aiten yale iron, ‘Age fiyauf are, Dei, aya ō agonok, neu dei nē fō bun Lasarus sur wiyē di, isilauf, 28ere nigin, aya turau tar faif dibodok. Utorne len, wedereid irouwau, age fe di, idig darau odug nē modoū enei bun to disiyouf.’

29“Abraham solof iron, ‘Idi Moses nē itotoya ado profet neid itotoya ado, utorneid len, idi anidi bun wedereid dinouf.’

30“Ī iron, ‘Age fiya sā, Dei Abraham, laa bun tamal takam idi bun isilauf are, idi waud falei youf.’

31“Anī ere, Abraham tamo anī irokenen, ‘Idi Moses nē od ado profet neid od nigin to wedereid dinouf are, laa bun tamal takam fā ye fen, idi irokenēdiyof to karī douf.’ ”

Jesus Mosor Ado Momoiya Nigin Ifelnēdin

(Matyu 18:6, 7, 21, 22; Mak 9:42)

17 1Jesus in dō fiya tar irokenēdin, “Ereb erēb tamo mosor bun inenēdiyof anī isiyof bagai, anī ere, tamo nanī be bunem isif, ī

malalon ado. ²Taka ĩ nanaal enidi taka mosor bun inenēya ban, ĩ meein odug guyutu bun ifo ken, maaĩwō irāya nigin biya bagai. ³Anĩ nigin, ā lo welegei. “Ō turā mosor inouf, ou wiyēf, anĩ ĩ falei youf are, ō in mosor nigin wederē tu kel. ⁴Ĩ naa tekelei bun, ō bun mosor ino sewen fouf, ĩ ō gein isi, sewen fe irōf, ‘Aya awaul,’ ō in mosor nigin wederē tu kel.”

⁵Aposel idi Odug dirokenen, “Nemā momoiya odug wouf!”

⁶Jesus solof iron, “Ā momoiya naal, masted faat gen adouf are, aa enei urokenēgouf, ‘Kusu wale, usil maaĩwō ufarauf,’ ago ge di, ā sigoreĩ dō fouf.

⁷“Ā taka, yogon ferfer kabier teneub yūf be, sipsip lof fen, kabierem isi mog, ne maraum tau, ‘Kaisā bagai saaf yōya nigin usi ubod,’ fiyēf de? ⁸Age fiya ban, ĩ eig youf, ‘Neu saaf dodok wol fen, ō naki wol, arunau wale, akas bure afele di, gama ō saaf ado naan wāf.’ ⁹Ĩ irokenē di, dōf age fen nigin, maraum ferfer tau de wiyal fiyēf de? ¹⁰Anĩ nigin, ā erēb erēb irokeneik anĩ ganān dōg, ago weleg fen, āg eig ge urōgouf, ‘Amā ferfer to biya, amā nemā kabĩ anĩ dogol malel.’ ”

Jesus Tamo Ten Lepra Dagi Adodo El Fedin

¹¹Jesus Jerusalem ileyā nigin, Samaria ado Galili distrik daū atu iyok ilen. ¹²Ĩ fonō taka bun ile mog, tamo ten lepra dāgi adodo, ĩ fotou difiyen. Idi gerom difar fen, ¹³aiteid odug nem diweig diron, “Jesus, Odug, amā nigin malalon yō!”

¹⁴Sain ĩ idi ileid fen, iron, “Uleg, aug bouweĩ pris ufelnēdigouf.” Age ye di, idi dile mog, bouweid biya len.

¹⁵Idi neid taka bouwa biya len anĩ ile fen, kel isi, ait odugem Negur yana yalesen. ¹⁶Jesus ye gariyan kubū ye yen ken, de wiyal fiyen, ĩ Samaria tamal.

¹⁷Age fe di, Jesus to fen, “Ten ganān to biya ledin de? Tamo nain idi nain difaref? ¹⁸Takam to kel isi, Negur yana yalesel, yaū enei dogol de?” ¹⁹Jesus age ye fen, ĩ irokenen, “Fā wale fen, ule, ogon momoiyam ō el yom.”

Jesus Negur Nē Tano Nigin Wogō Yen

(*Matyu 24:23-28, 37-41*)

²⁰Sain taka, Farisia tamom, Negur nē tano ere sain isiyouf nigin Jesus to difiyē di, Jesus solof iron, “Negur nē tano, malam ileyā kisi feleyā sā bunem isidig, ²¹tamo to ‘Eĩ yeir,’ be, ‘Your oun,’ be douf, ere nigin, Negur nē tano are ā atun ibodok.”

²²Age ye fen, Jesus yogon dō fiya tar irokenēdin, “Sain isi di, Tamo Naal nē naa taka ileyā nigin oroyeĩf, anĩ ere, ā anĩ to ulogouf. ²³Tamom dirokeneĩf, ‘Ĩ your!’ be, ‘Ĩ yeir!’ douf. Ā, to uleg, idi to dō wedig. ²⁴Ere nigin, Tamo Naal, yogon naa bun, kolimei filiya lalan saa gariyanem irou,

idikeleyan isiledig gen. ²⁵Anĩ ere, uruwa ĩ darau musei yale di, tamo kayau sain enei bun dibodok anidi ĩ dudum difiyēf.

²⁶“Noa nē sain bun age fen gen, age fiya bagai Tamo Naal nē sain buneg age foug. ²⁷Tamo kayau saafei de fen, naanuei den, tamo kayau yalef, kayau tamo difenek difen, age de dile mog, Noa waag namen ilen. Agef mog, kuwei isi fen, idi ganan daũ fedin.

²⁸“Lot nē sain buneg de age difen, tamo kayau saafem, naanem difen, na dalef, na sur difef, saaf diten, fō dino mog, difen. ²⁹Anĩ ere, naa Lot Sodom taun itor ilen bun, yā ado meein salfa, saa bunem uyē gen kukur fen, idi ganan daũ fedin.

³⁰“Age fiya gen bagai, Tamo Naal yaorouf nē naa bun, agef wō youf. ³¹Naa anĩ bun, taka ĩ yogon fō agaran ibod mog, in safina namen ibodok anĩ yalouf nigin to kel isilauf. Age fiya bagai, taka ĩ kabier ibodok, yogon safina yalouf nigin to kel ilauf. ³²Lot nē kayau bun kisi gouf! ³³Taka ĩ yogon mata yalouf nigin kisi foug, ĩ mata anĩ fō yalouf. Taka ĩ yogon mata anĩ itorōf are, ĩ yogon mata irou kafī falouf. ³⁴Aya ā arokeneik, bō anĩ bun, tamo uru idi fatar tekelei bun denēf, tekelei yalouf, taka itornēf. ³⁵Kayau uru idi wit ditutu mog, tekelei yalouf, taka itornēf.” ³⁶(-) ³⁷Idi to difen, “Oduq, ō urok anĩ nain wō youf?” Jesus idi irokenēdin, “Nain be laa yenek nē an, tum guru difoug.”

Kayau Waab Tuwa To Yu Kelen Nē Yaab Od

18 ¹Age ye fen, Jesus, in dō fiya tar idi faimud kosēya nigin tuweid to yūf anĩ ifelnēdiyof nigin, yaab od taka irokenēdin. ²Ī iron, “Taun taka bun, es fiya tamo taka ibodon, ĩ Negur to kumī fiyēdig, tamog to iwesnēdig. ³Taun anĩ bun an, kayau waab taka ibodon, ĩ es fiya tamo bun toku kel fen, yogon kiwai mala solo ifenēf nigin irokenēyai yedig.

⁴“Es fiya tamo ĩ kaisā to karī fiyen, anĩ ere, dum ĩ yogo nigin iron, ‘Aya Negur to kumī afiyek, tamog to awesnēdif, ⁵anĩ ere, kayau waab enei toku morō ifanaf nigin, in morō anĩ ail fen, kayau ĩ irok anĩ age afoug, anĩ bunem ĩ to kel fen, morō ifanauf!’ ”

⁶Jesus age ye fen, iron, “Es fiya tamo sane, ereb ĩ iron anĩ karīg. ⁷Negur yogon igirnēdin anidi, bō ado gaa ado diweig dirokenēdig nigin, ĩ lo nē madur fiya to ifenēdiyof de? Ī sain meluk to karī fiyēdiyof de? ⁸Aya ā arokeneik, ĩ kaisā bagai lo nē madur fiya ifenēdiyof. Anĩ ere, Tamo Naal isiyof sain bun, tenebur ein ĩ momoiya fotou foug de?”

Farisia Tamo Taka, Takis Yaleya Tamo Ado Nē Yaab Od

⁹Tunī idi dogo nigin amā madur bagai de fen, tunī meleid irim lai difedidig anidi bun, Jesus yaab od enei irokenēdin, ¹⁰“Tamo uru tempel bun kosē douf nigin diselen, taka Farisia tamo, taka takis yaleya tamo. ¹¹Farisia tamo ifar fen,

¹⁸ 17:35 Itotoya tunī eig de ditoton: *itornēf*. ³⁶ Tamo uru idi kabier difarauf, tekelei yalouf, taka itornēf.

yogo nigin kosē yen, ‘Negur ō de ayok, aya tamo tunī gen sã, bē diledig, sane age difedig, seseirã dinodig, takis yaleya tamo enei geneg sã. ¹²Aya uub tekelei bun naa uru kuri au fen, ereb ereb ganan aya alef anī, ten teke tekelei ō afonōdig.’

¹³“Anī ere, takis yaleya tamo ī so rel ifaren. Ī saa iluneg to itad fen, anī ere, ī akor yu ken, iron, ‘Negur, aya nigin waū inōf, aya mosor temelou.’

¹⁴“Aya ā arokeneik, Farisia tamo anī sã, takis yaleya tamo enei, Negur mala bun ī madur fen, fō bun ilen. Ere nigin, taka ī yogo yana yalesef, Negur ī yana lai fouf, taka ī yogo yana lai fef, Negur ī yana yalesauf.”

Kesu Nanaal Jesus Geid

(*Matyu 19:13-15; Mak 10:13-16*)

¹⁵Takag, tamo kayau, Jesus kesu momoug kobū fediyouf nigin ī wagen guri difeid disin. Age dife di, in dō fiya tar anī dile fen, idi ou difiyēdin.

¹⁶Anī ere, Jesus kesu ī wagen iweigneid fen, iron, “Utornēdig len, kesu nanaal aya wageun disiyouf, idi to katū wedig, ere nigin, Negur nē tano are eig fediya neid. ¹⁷Aya ā momoi arokeneik, aib taka ī, Negur nē tano, kesu naal age fiya gen to yalouf are, ī Negur nē tanon to bagai ilauf.”

Uyu Irouya Tamo Safina Musei Ado

(*Matyu 19:16-30; Mak 10:17-31*)

¹⁸Uyu irouya tamo taka Jesus to fiyen, “Tise biya, aya ere naig afe fen, mata faimud ibodkeleya alouf?”

¹⁹Jesus ī irokenen, “Ere nigin ō aya anī biya wiyaf? Aibem taka biya sã, Negur yogo dogol. ²⁰Ō itāfiya keleī: ‘Ō seseirã to unouf, ō tamo taka to ukesyouf, ō to bē walouf, ō taka nigin idegēya od to urōf, sinã tamã yeneid walesauf.’”

²¹Age ye di, ī iron, “Enei ganan aya kesu naalun dō afef asin.”

²²Jesus enei karī ye fen, ī irokenen, “Ō fau tekelei anī inī sã. Ogon safina ganan na nigin sur wo fen, maleg tamo weneid, agouf anī ō saa ilun safina biya adouf. Ago wol fen, usi, aya dō wiya.”

²³Anī ere, ī od enei karī ye fen, wau fatuk gudū fen, ere nigin, ī safina musei biya ado. ²⁴Jesus ī lege fiye ken, iron, “Safina musei adodo tamo, Negur nē tano bun ileyā nigin, gai malai bagai! ²⁵Momoi, kamel ī, gabar iwaya nē nil ku bun ileyā nigin, karika bagai, safina musei ado tamo, Negur nē tano bun ileyā nigin, malai bagai.”

²⁶Idi od anī karī de fen, to difen, “Age fiyauf are, aim anī mata ibodkeleya anī yaleya nigin kisi feleya?”

²⁷Anī ere, Jesus solof iron, “Ereb tamom age fiya nigin kisi feleya sã anī, Negur age fiya nigin kisi feleya.”

²⁸Pita Jesus irokenen, “Ulef, amã ō dō mayōf nigin, ereb ereb ganan amã ado anī matoron!”

† 18:20 Eksodas 20:12-16; Diuteronomi 5:16-20

²⁹Age ye di, Jesus idi irokenēdin, “Aya ā momoi arokeneik, aib taka fō, kayau, tura tar, sina tama tar be, gere tar, Negur nē tano nigin itoron, ³⁰ī mala solo musei bagai sain enī bun yalouf, ī dumen isiyouf buneg mata faimud ibodkeleya yalouf.”

Jesus In Laa Nigin Irō, Towo Fen
(*Matyu 20:17-19; Mak 10:32-34*)

³¹Age ye fen, Jesus, in dō fiya tar tuwelf firen geif iroule irokenēdin, “Ulegef, ada Jerusalem teselef, ereb ereb ganan Tamo Naal nigin profet ditoton anī, fau kisi falauf. ³²Ī fau haiden Israel sā anidi imeid bun ilauf. Idi ī fau diselinēf, kono difiyēf, disisnēf, wagī difiye ken, dukesiyouf. ³³Naa towo bun, ī fau baban mata kel fā youf.”

³⁴Anī ere, dō fiya tar, enei ganan taka to kelein. Od anī nē gariya idi bun iminen, agef fen, idi ī ereb nigin irok anī to kelein.

Maleg Tamo Mala Ifofakeleya Anī Mala Fara Felen
(*Matyu 20:29-34; Mak 10:46-52*)

³⁵Sain Jesus Jeriko kelē fiyē mog, tamo taka mala ifofakeleya, naab yerin nonī yef ibodon. ³⁶Ī tamo kayau musei disi dilef ya karī ye fen, ereb wō yef anī nigin to fedin. ³⁷Idi ī dirokenen, “Jesus Nasaret tamal isi ilef.”

³⁸Age de di, ī iweig iron, “Jesus, Dawid Naal, aya nigin malalon yō!”

³⁹Tamo uyu dilen anidim sakā difiye ken, foro yalauf nigin dirokenen, anī ere, ī wade bagai iweig iron, “Dawid Naal, aya nigin malalon yō!”

⁴⁰Jesus dē yel fen, tamo ī wagen dirou disiyouf nigin irokenēdin. Ī isi melsā di, Jesus ī to fiyen, ⁴¹“Aya ō ere age afonōf ani, ō oroyok?”

Tamo anī solof iron, “Odug, aya malau kelē yalau fenē.”

⁴²Age ye di, Jesus ī irokenen, “Malā fara wol, ogon momoiya anim el yom.” ⁴³Kaisā bagai, ī mala fara fel fen, Jesus dōf, Negur yana yalesen. Tamo kayau ganan anī dile fen, idig Negur yana dalesen.

Sakeus, Takis Yaleya Tamo

19 ¹Jesus Jeriko taun wō ye fen, atu iyok ilen. ²Tamo taka yana Sakeus an ibodon. Ī takis yaleya tamo neid mudur, safina musei ado. ³Ī Jesus ī ai bagai anī ilouf nigin oron, anī ere, ī tobega tamo nigin ī kisi feleya sā, ere nigin, tamo kayau musei dinonolnen. ⁴Anī nigin, ī ket gudu ref ile, Jesus ilouf nigin aa fig ilun sō yen, ere nigin, Jesus naab anī dōf, are isi ilauf.

⁵Sain Jesus modoū anī bun ulō yeis fen, mala ilun ira ken, ī irokenen, “Sakeus, kaisā bagai kutū weis. Gama aya ogon fō bun abodōf bagai.”

⁶Age ye di, ī kaisā kutū yeis fen, wau sere fiya ado Jesus aan fiyen.

⁷Tamo kayau ganan enei dile fen, kosesē kurā den, “Ī mosor ado tamo nē fō bun mogo ilef.”

⁸Anī ere, Sakeus ifar fen, Jesus irokenen, “Odug, ulef! Gama yeir aya neu safina atun fara afe fen, sitakā maleg tamo afenēdiyof, aya idegēya bunem tunī neid safina alen are, aya idi mugu mugu mala solo aiwa ifenēya teten ano fen, afenēdiyof.”

⁹Age ye di, Jesus ī irokenen, “Gama kel yaleya anī fō enei bun isil, ere nigin, tamo enī, īg Abraham naal taka. ¹⁰Ere nigin, Tamo Naal fō delen anidi imirneīd fen, kel gei fof nigin isin.”

Ferfer Ten Moni Imeid Bun Inon Nē Yaab Od

(Matyu 25:14-30)

¹¹Idi od enei karī de mog, Jesus tobol fe, yaab od taka irokenēdin, ere nigin, ī mogo Jerusalem melsā ifaref, anī nigin, tamo kayau Negur nē tano kaisā bagai wō youf de fen, kisi difen. ¹²Anī nigin, ī iron, “Tamo taka yana odug ado, ī king dinenē di, kel isiyof nigin fō takā gerō bagai ilen. ¹³Anī nigin, ī yogon ferfer ten iweig laisi fen, moni wan tausen kina mugu mugu ifeneid fen, irokenēdin, ‘Moni enei kabī wenēg mog, aya kelauf.’

¹⁴“Anī ere, yogon tamo tar kiwai difen ken, eig de dirōf nigin ī dumen arū tamo sur difen, ‘Amā tamo enei nemā king wō youf nigin to oromak.’

¹⁵“Anī ere, ī king yana yale fen, fonō kel isin. Agef fen, ī, ferfer moni ifenēdin idi moni ado naig de kabī dalen anī ilouf nigin, iweignēdi di, disin.

¹⁶“Tamo uyu ī isi iron, ‘Odug, aya ogon wan tausen kina bun, ten tausen kina taka alen.’

¹⁷“Age ye di, yogon odug solof irokenen, ‘Ō ferfer biya, ō de agon! Ō safina naal bagai bun kabī biya walen nigin, taun ten lo weid.’

¹⁸“Ī dō fiya taka isi iron, ‘Odug, aya ogon wan tausen kina bun, faif tausen kina taka alen.’

¹⁹“Age ye di, yogon odug īg irokenen, ‘Ō taun faif lo weid.’

²⁰“Age fe di, ferfer taka isi iron, ‘Odug, ogon moni yeir. Aya moni anī gabar masak nem šile afe fen, anokon. ²¹Aya ō nigin kumī aun, ere nigin, ō tamo total ado. Ō ereb to unokon anī waledig, onom to utenen anī kusu wodig.’

²²“Yogon odug ī irokenen, ‘Aya ogon od bunem es ayōf, ō ferfer sane! Ō kelein, aya tamo total ado, ayam to anokon anī aledig, ayam to atenen anī kusu afedig de? ²³Ere wo fen, neu moni benk bun to unon? Ago wom are, sain aya kelauf bun, moni kabī yalen anī nē mala ado, moni ō benk wenen anī bagu fiya kel isin ado alem.’

²⁴“Age ye fen, odug idi difaren anidi irokenēdin, ‘Yogon moni son ge fen, tamo ten tausen kina ado anī wenēg.’

²⁵“Age ye di, idi ī dirokenen, ‘Odug, ī mogo ten tausen kina ado!’

²⁶“Odug solof iron, ‘Aya ā arokeneik, taka ī ado, aya teten anouf, anī ere, taka ī sā bagai, ereb taka ī ado areg, ī bun tamal son fof. ²⁷Anī ere,

neu kiwai tar, aya nedi king ibodōya nigin to orodin anidi, ein wageun gurig uring fen, malau bun udenkesig.’ ”

Jesus Tamo Yana Ado Gen Jerusalem Ilen
(*Matyu 21:1-11; Mak 11:1-11; Jon 12:12-19*)

²⁸ Jesus od enei wogō yel fen, Jerusalem iseleya nigin, i ketem uyu iselen. ²⁹ Jesus Moul Arei^w bun Betfage ado Betani fonō kelē fiye ken, in dō fiya tar uru sur feid irokenēdin, ³⁰ “Fonō wageik anī bun uleg, an wōg fen, donki naal difon anī ulogouf, are aibem taka anī bun to iyon. Anī biru weleg fen, ein urou usig. ³¹ Taka nem to yeif, ‘Ere nigin ā anī biru gef?’ urokenēgouf, ‘Odug anī kabī ifenēf nigin.’ ”

³² Anī nigin, uyu sur fedin idi dile, Jesus irokenēdin kilei bagai anī fotou difen. ³³ Idi donki naal biru de mog, anī nē marau tamo idi to difiyēdin, “Ā ere nigin donki naal anī biru gef?”

³⁴ Idi i solo de dirokenen, “Odug anī kabī ifenēf nigin.”

³⁵ Idi donki naal anī Jesus wagen dirousi fen, idi neid gabar teten dirara ken, i anī teten dinenē ibodon. ³⁶ Jesus iyok ile mog, tamo kayau idi neid gabar naabur du difedin.

³⁷ Sain i iyok isi, naab Moul Arei bunem isileya non, in dō fiya tar ganan, memelik ganan inodin dilen nigin, waud al fiya ado aiteid odug nem Negur yana dalesen:

³⁸ “King, Odug yana bunem isif, are i el fiya ado!”^x

Saa ilun wau inosiya ado, ilun bagai fula fiya medeīya ado!”

³⁹ Tamo kayau atun, Farisia tamo tunī Jesus dirokenen, “Tise, ogon dō fiya tar sakā wiyeīd!”

⁴⁰ Anī ere, Jesus solof iron, “Aya ā arokeneik, idi foro dalauf are, meein eneidi diweig dirōf.”

⁴¹ Ī Jerusalem kelē fiye ken, taun anī ile, wau gudū fe di, inā yale, ⁴² iron, “Ō Jerusalem naa enei bun, ō nigin erebem waū inosiya irou isif anī ō keileim, are dem, anī ere, gama ō malā bun iminek. ⁴³ Sain taka ō bun isiyouf, ogon kiwai tar, ō bun teneub mudu dino, salili diyokel, afi diyokalauf. ⁴⁴ Idi ō tenebur dale dirāyōf, ō ado gerē tar ogon kau namen difaref geid. Idi meein taka taka teten ditorō di, to ibodōf, ere nigin, Negur ō bun isin nē naa anī to ulegan nigin.”

Jesus Tempel Bun
(*Matyu 21:12-17; Mak 11:15-19; Jon 2:13-22*)

⁴⁵ Jesus tempel modoū bun ile, idi ereb ereb na nigin sur de mog, an iruididin. ⁴⁶ Agef fen, Jesus idi irokenēdin, “Negur nē Itotoya bun ibodok, ‘Neu fō are, kosēya nē fō ibodōf,’^y anī ere, āgem ‘bē tamo neid iminēya fō’^z unogen.”

^w 19:29 ‘Oliv Arei’ dedig. ^x 19:38 Sam 118:26 ^y 19:46a Asaia 56:7 ^z 19:46b Jeremaia 7:11

⁴⁷Naa ganan Jesus tempel bun ifelnēdidin. Anī ere, pris odudug, lo ifelnēdiya tamo, tamo kayau neid mudur adodo geid, Jesus dukesiyouf nigin naab dimiren. ⁴⁸Anī ere, idi age difouf nigin naab taka to dilen, ere nigin, tamo kayau ganan in od anī diroun.

Jesus Aim Igrinen Anī To Difiyen

(*Matyu 21:23-27; Mak 11:27-33*)

20 ¹Naa taka bun, Jesus tempel bun tamo kayau ifelneid fen, biya od wogō yen. Agef mog, pris odudug, lo ifelnēdiya tamo, mudur adodo geid, ī gein disin. ²Idi diron, “Aim ō igirnō di, ō ereb ereb enī ago wof anī urokanamā. Aim ō igirnon?”

³Jesus aitedin yale iron, “Ayag to fiya taka afeneif. Solog urokanag, ⁴Jon naan igunēdin are saa ilun tamal de, tamo bunem?”

⁵Idi dogo dogol katō de fen, diron, “Ada, ‘Saa ilun tamal,’ tauf are, ī to fouf, ‘Ere nigin ā ī nigin to momoi wiyēgen?” ⁶Anī ere, ada, ‘Tamo bunem,’ tauf are, tamo kayau ganan meeinem dīnadauf, ere nigin, idi Jon ī profet den.”

⁷Anī nigin, idi solo de diron, “Ī nain be tamal are amā keleī sā.”

⁸Age de di, Jesus iron, “Ayag ā to arokeneif, aim aya igirna di, aya ereb ereb enī age afedif.”

Tamo Kabī Lo Difedig Nē Yaab Od

(*Matyu 21:33-46; Mak 12:1-12*)

⁹Jesus tobol fe, yaab od enei tamo kayau irokenēdin, “Tamo taka wain kabī yale, ī mala solo yalouf nigin wain kabī, kabī tamo tunī imeid bun ino fen, sain meluk uyu takā ilen. ¹⁰Fito fiya sain, ī ferfer taka wain kabī lo fiya tamo gedin, wain biya tunī difenēf nigin sur fen. Anī ere, idi ī du ken, sur difiyē di, ima sāsā ilen. ¹¹Ī ferfer taka sur fen, anī ere, idi tamo anīg du ken, mama difenē di, ima sāsā ilen. ¹²Ī baban takag sur fe di, idi ig darau difen ken, dumeitur diran.

¹³“Age dife di, wain kabī marau iron, ‘Aya ere naig afouf? Aya neu kesu, oboiyou, sur afouf. Idi ī anī karī difiyēf be.’

¹⁴“Anī ere, kabī lo fiya tamo idi ī dile fen, abob dirokenen. Idi diron, ‘Eī ī akorouf. Ada ī taukeis fen, akor eī nedauf.’ ¹⁵Anī nigin, idi ī wain kabī dumeitur dira ken, dukesin.”

Age dife di, wain kabī marau naig fediyouf? ¹⁶Ī isi, kabī lo fiya tamo idenkeis fen, wain kabī anī tamo tunī ifenēdiyof.”

Sain tamo kayau od enei karī de fen, idi diron, “Enei to bagai agef wō youf!”

¹⁷Anī ere, Jesus idi lo feid le fen, to fedin, “Age fiyauf are, ere gariya nigin Negur nē Itotoya bun eig ye irok:

“ ‘Meein are fō inoya tamom sane de fen, ditoron, meein anī gama monog tor wō yen’^a”

^a 20:17 Sam 118:22

¹⁸Aib taka meein anī teten kubū youf, mereb fe fisik fouf, takag, aib taka meein anī ī teten kubū youf, ī danīf aas lauf.”

¹⁹Lo ifelnēdiya tamo, pris odudug geid, Jesus kaisā bagai ironēya nigin naab dimiren, ere nigin, idi kelein, ī idi nigin yaab od enei wogō yen. Anī ere, idi tamo kayau nigin kumī den.

Sisa Takis Ifenēya
(*Matyu 22:15-22; Mak 12:13-17*)

²⁰Anī nigin, idi Jesus ololo difiye ken, kofo tamo sur difedin, kofo tamo idi idegēya bun madur tamo gen dilen. Idi Jesus ereb od wogōya bun kū fenē di, diroune ken, Rom gawaman mudur nē lo fiya ado megeir bun dinenēf nigin kisi difen. ²¹Anī nigin, kofo tamo Jesus to difiyen, “Tise, amā keleī, ogon wogōya ifelnēya ado madur. Ō takam in oroya dō wouf nigin wewu yō di, in oroya dō fen, taka wau morō to wenēdig, anī ere, ō momoi bun Negur nē naab ufelnamādig. ²²Amā Sisa takis mafenēf anī lo dō fiya de, sã?”

²³Anī ere, Jesus idi namedin idegēya anī ile fen, irokenēdin, ²⁴“Koin moni taka ufelnag. Ai nē malakanon ado itotoya anī bun ibodok?”

²⁵Idi aiten dale diron, “Sisa nē.” Age de di, Jesus idi irokenēdin, “Age fiyauf are, Sisa nē are Sisa wenēg, Negur nē are Negur wenēg.”

²⁶An Jesus mal atun wogō yen bun, idi ī ironēya kisi feleya sã. Idi ī solof iron anī bunem terefeit de fen, foro delen.

Mata Kel Fāya Bun Ai Nē Kayau Ibodōf
(*Matyu 22:23-33; Mak 12:18-27*)

²⁷Sadusia tamo idi dirōdig, laa bun tamal mata to ke de fã dedig, dedig anī tunim, to fiya eig fiya ado Jesus wagen disin. ²⁸Idi diron, “Tise, Moses itotkanaman, are tamo taka, ne tura laaf fen, aiwa itornen, anī ere, kesu sãf are, tamo ī kayau waab anī yale fen, tura nē kesu diroukenēf. ²⁹Gama tura tura sewen dibodon. Matu ketem kayau taka yalen, anī ere, kesu yaleya sã mog, tamo laa fen. ³⁰Matu dō fiya bagam kayau anī yalen, ī laa fe di, ³¹ī dō fiya bagam kayau anī yalen, age de dile dile, tura tura sewen ganan kesu sã gare desin. ³²Dum kayau areg laa fen. ³³Anī nigin, dum laa bun tamal mata kel fāya sain bun, ī ai nē kayau ibodōf, ere nigin, tura tura sewen anidi adok ī dale dogolen?”

³⁴Jesus aitedin yale iron, “Gama sain enei bun, tamo kayau yalef, kayau tamo yalef ya ibodok. ³⁵Anī ere, sain anī bun, idi laa bun tamal mata kel fāya sain bun dibodōf nigin kisi feleya anidi, an tamo kayau yalef, kayau tamo yalef ya sãf, ³⁶idi baban gare deyag kisi feleya sã, ere nigin, idi engel gen. Idi laa bun tamal mata ke de fã def nigin, idi Negur nē gere tar. ³⁷Anī ere, arein aa yã wō yen nigin Negur nē Itotoya bun, Moseseg tamo gare den anī mata ke de fã douf nigin ifelnen, ere nigin, ī Odug nigin iron, ‘Abraham nē Negur, Isak

nē Negur, Jakop nē Negur.^b 38 Ì laa neid Negur sã, ì mata ibodōya neid Negur, ere nigin, ì bun ganan mata dibodok.”

39 Lo ifelnēdiya tamo tunī aiten dale diron, “Tise, ò de urok!” 40 Anī bunem idi kumī de fen, taka nem ereb taka nigin baban Jesus to, to fiyen.

Ai Nē Kesu Anī Kristus?

(Matyu 22:41–23:7; Mak 12:35–40)

41 Age dife di, Jesus idi irokenēdin, “Naig fe di, idi Kristus ì Dawid nē Naal dedig? 42 Dawid ì yogo Buk Sam bun kurō falaisin:

“Negur neu Odug irokenen,
“Imau biya melem ubod mog,

43 ogon kiwai tar

on yē inoya nē sawa anouf.”^c

44 Dawid ì nigin ‘Odug’ yef, age fiyauf are, naig fe di, ì Dawid naaluouf?”

45 Tamo kayau ganan karī difiyē mog, Jesus in dō fiya tar irokenēdin, 46 “Lo ifelnēdiya tamo nigin lo welegei. Idi gabar meluluk difonunakel diyo ken, maket modoū bun aan difiyēdiyof anī orodidig. Age de fen, idi Juda neid uub fō bun sia biyai biyai bun dibod ken, tar inoya bun modoū malabag malabag bun dibodōdig. 47 Idi kayau waab idegnēdiya bunem nedi fō sosoin difeid fen, meleid yaleya nigin meluk bagai kosē dedig. Tamo age fediya, mala solo darau sane bagai dalouf.”

Kayau Waab Nē Safina Negur Ifenēya

(Mak 12:41–44)

21 1 Jesus mala irã, tamo kayau safineid adodo, nedi kolekta moni tempel bogis bun dino mog, ileidin. 2 Takag, ì lof mog, kayau waab maleg taka isi, peni giriya moni nanaal uru inon. 3 Agef fen, Jesus iron, “Aya ā momoi arokeneik, kayau waab maleg enī ì, ganan wal fediya, odug bagai bogis bun inol. 4 Tamo kayau enei ganan, dogo neid safineid bun tamal, nedi kolekta moni dinon, anī ere, kayau anī, maleg bun ì mata ibodōf nē anī ganan inon.”

Idikeleya Sain Nē Uris

(Matyu 24:1–35; Mak 13:1–31)

5 In dō fiya tar tunī, tempel meein biya biya nem ado, safineid biyai Negur difenen anim, tempel naki difiyen anī nigin wogō den. Anī ere, Jesus iron, 6 “Á ulegef enei nigin, sain fau isiyouf, meein enī taka to abob tete tete yenēf, anī adok fau isog irailauf.”

7 Idi to difen, “Tise, ere sain eneidi wō youf? Ere uris anī, eneidi kisi falauf nigin wō youf?”

8 Age de di, Jesus iron, “Takam to idegneif nigin lo weleg. Ere nigin, musei aya yanau nem disi dirōf, ‘Aya Kristus,’ takag, ‘Sain mogo melsak.’

^b 20:37 Eksodas 3:6 ^c 20:43 Sam 110:1

Age de di, to dō wiyēdig. ⁹Ā kusī nigin ado, kantri bun kiwai fen, gawaman narī difef ya karī gouf, ā to tererē gei. Ereb ereb enidi ketem wō youf bagai, anī ere, idikeleya anī, sain anī bun bagai to wō youf.”

¹⁰Age ye fen, Jesus idi irokenēdin, “Teneub taka fā ye fen, ī teneub taka nigin kiwai ifenēf, tano taka ī tano taka nigin kiwai ifenēf. ¹¹Mimī odug wowā youf, naū odug ado dagi totol, modoū taka taka bun wowā youf, ereb ereb kumīya nē ado uris odudug, saa bun wowā youf.

¹²“Anī ere, eneidi ganan fau to wō ye mog, idi kaka diyēi ken, kafī fiya difeneif. Idi Juda neid uub fō bun ado kalabus bun dineneif. Age de fen, ā king ado gawaman mudur adodo meleid bun dirouleyēif, anī ganan aya yanau nigin de fen, age diyēif. ¹³Naab enei bunem, ā idi meleid bun, aya nigin kurō wesigouf. ¹⁴Anī ere, ā idi meleid bun aug isenneīya nigin dodok ge fen, to wogō gouf nigin ā kisi ketem ufokeleg. ¹⁵Ere nigin, aya, od ado kisi biya, āgenei kiwai tar takam solof irōya be, kiwai ifenēya kisi feleya sā anī afeneif. ¹⁶Anī ere, ā fau sineī temeī tarem, tureī tarem, sirag ado neī mou taremeg kiwai difenei ken, ā tunī laa bun dineneif. ¹⁷Tamo ganan, aya yanau nigin de fen, ā kiwai difeneif. ¹⁸Anī ere, mudureī bun, fatiyeī tekelei bagai to iminkalauf. ¹⁹Megeir ifareya bunem, mata walogouf.

²⁰“Sain ā Jerusalem kusī tamom salili dife mog, ulogouf, ā keleī youf, Jerusalem fonou inenēya anī melsak. ²¹Age fiya ulogouf, idi Judia distrik bun dibodok, arein diya diselauf, idi taun anī bun dibodok, anenem diyalalauf, idi taun yerin difaref, namen to dilauf bagai. ²²Ere nigin, sain enei are, Negur nē Itotoya bun ibodok ganan kisi falauf nigin darau ifenēya nē sain. ²³Naa anī bun, kayau bouweid ado, kayau kesu su difenek ado, idi meleidlon ado. Teneub anī bun, morō odug wō ye fen, Negur nē didi, tamo kayau enei bun isiyouf. ²⁴Idi dimig nem didenkeis, kalabus tamo gei difeid fen, teneub ganan bun diroulediyouf. Jerusalem fau haiden Israel sā anidim lalai difeid dile, haiden Israel sā anidi neid sain anī kisi falauf.

²⁵“Uris gaa bun, ogō bun ado, barisa bun wō youf. Tenebur ein, teneub ganan bun moloun fire bagai fā ye fen, maaī gugu re di, idi kisi gurū ye fen, nene douf. ²⁶Tamo kayau, teneub bun ere wowā youf de fen, kumī de, meleid wāi youf, ere nigin, saa nē megeir guyoyō douf. ²⁷Sain anī bun, tamo idi, Tamo Naal lalo bun megeir ado fula fiya medeīya barikā isi mog, dilouf. ²⁸Ereb ereb enei gariya ino, wō ye di, ufareg fen, mudureī utadseg, ere nigin, kel yaleyeīya are melsak.”

²⁹Age ye fen, Jesus yaab od enei irokenēdin, “Ā aa fig ado aa ganan ulogouf. ³⁰Sain idi aarau ifiraūd mog, anī ā aug uleg fen, ā keleīdig, saneya melsak. ³¹Age fiya bagai, ereb ereb eneidi wō ye mog, ulogouf are, āg keleī youf, Negur nē tano are mogo melsak.

³²“Aya ā momoi arokeneik, tamo kayau sain enei bun dibodok anidi to gare de mog, ereb ereb eneidi ganan wō youf. ³³Saa teneub ado sa kalauf, anī ere, neu od to bagai sa kalauf.

³⁴“Lo walagauf, sãf are, saafei ge, aai naanuei ge fen, tenebur mata ibodōya nigin sii fiya anim, āgenei wauī bun kafī yeī di, ā keleī sã mog, Negur nē naa kor gen ā bun isiyouf. ³⁵Naa are, tenebur tamo kayau ganan bun wō youf. ³⁶Eneidi ganan wowā you fenē anī wal fiya kisi falauf nigin ado, Tamo Naal mala bun ufaragauf nigin, ā faimud ololo wog fen, kosē gouf.”

³⁷Naa ganan, Jesus tempel bun ifelneīd fen, aragau ganan, Moul Arein isel fen, bō an ibodōdig. ³⁸Age fe di, tamo kayau ganan, tempel bun karī difiyēf nigin, bonimeī bagai disidig.

Judas Jesus Mudur Adodo Imeid Bun Inouf Nigin Yo Yen

(Matyu 26:1-5; Mak 14:1, 2, 10, 11; Jon 11:45-53)

22 ¹Gama Bret Yis Sã Sifa naa, Pasa naa dedig melsā di, ²pris odudug, lo ifelnēdiya tamo geid, Jesus yukesiya nigin naab dimiren, ere nigin, idi tamo kayau nigin kumī den. ³Age fe di, Satan, Judas, Iskariot tamal dedig, tuwelf dō fiya tar atun taka, ī namen ilen. ⁴Age fe di, Judas ile, pris odudug ado tempel lo fiya tamo neid uyu irouya bun wō ye fen, idi geid ī naig fe Jesus kiwai imeid bun inouf nigin katō difen. ⁵Idi od enī karī de, waud al fe fen, ī moni difenēf nigin dirokenen. ⁶Judas ī yo ye fen, tamo kayau to guru de mog, Jesus idi imeid bun inouf nigin naab imirek ilen.

Jesus In Aposel Geid Idikeleya Nē Bō Saaf Don

(Matyu 26:17-35; Mak 14:12-31; Jon 13:21-30, 36-38)

⁷Anī dumen, Bret Yis Sã anī nē naa wō yen, anī bun idi Pasa naa nigin sipsip naal diden ken, sesewi difedig. ⁸Jesus, Pita Jon ado sur feid fen, iron, “Uleg, ada Pasa naa nē saaf tāf nigin dodok wanadag.”

⁹Idi Jesus to difiyen, “Ō, amā nain anī, Pasa naa nē saaf tāf nigin, dodok mafouf anī oroyok?”

¹⁰Age de di, Jesus idi irokenēdin, “Taun wōg fen, tamo taka darum naan ado isi fotou yeif, ī fō bun ilauf anī dōg uleg. ¹¹Agog fen, ā fō marau eig wiyēg urokenēgouf, ‘Tise ō irokonok: Aab nanī bun an, aya neu dō fiya tar geid, Pasa naa nē saaf māf?’ ¹²Ago ge di, ī aab odug ilun anī ifelneif, an erēb erēb dodok de bure difelen. An neda nigin dodok gouf.”

¹³Age ye di, idi dile, Jesus irokenēdin kilei erēb erēb age fiya dilen. Anī nigin, idi Pasa naa dodok difen.

¹⁴Sain wō ye di, Jesus in aposel geid tebol bun dibodon. ¹⁵Age de fen, Jesus idi irokenēdin, “Aya darau yaleya sã mog, ā geid Pasa naa nē saaf tāf anī orouf bagai. ¹⁶Ere nigin, aya ā arokeneik, aya baban Pasa naa nē saaf to āf ile, anī fau Negur nē tano bun kisi falauf.”

¹⁷Age ye fen, ī kap yale, Negur de fiye ken, iron, “Enei waleg fen, ā atun foig. ¹⁸Aya ā momoi arokeneik, aya baban wain to āf ile, Negur nē tano isiyouf.”

¹⁹Age ye fen, Jesus bret yale, Negur de fiye ken, mumã fen. Agef fen, ĩ in dō fiya tar ifeneid fen, iron, “Ei neu bouwau, ã nigin afeneik. Enei agog fen, aya nigin kisi gouf.”

²⁰Age fiya bagai, saaf bure difel fen, Jesus kap yale, iron, “Kap enei, neu naudou bun, ã Negur geid bar itenëya mata, naudou are ã nigin fi felef. ²¹Anĩ ere, taka aya kiwai imeid bun inoyauf, are ein tebol bun urom imamã manof. ²²Momoi, Tamo Naal ĩ nigin iron kilei agef ilauf, anĩ ere, tamo ĩ kiwai ifenek, ĩ malalon ado.” ²³Age ye di, idi dogo dogol toti difen, idi atun aim bagai tobonunã enei age foug.

²⁴Takag, idi atun aim anĩ odug bagai ibodōf nigin luwa diroun. ²⁵Age dife di, Jesus idi irokenēdin, “Haiden neid king, dogo neid tamo kayau lo difedig, idi dogo neid megeir tamo kayau bun yaor difedig, are ada biya difadauf dedig. ²⁶Anĩ ere, ã age fiya anĩ to ago gouf. Age fiya ban, ã atun odug ibodok are, kesu naal gen ibodōf, takag, uyu irouya tamo ĩ, aruna yaleya tamo gen ibodōf. ²⁷Ai anĩ odug, taka tebol bun ibodok anĩ de, taka ĩ aruna yalef anĩ? Taka ĩ tebol bun ibodok anĩ sã de? Anĩ ere, aya ã atun aruna yaleya tamo gen abodok. ²⁸Ã anĩ, neu kisi fiya isi di, aya bun toku ufaregen. ²⁹Neu Dei tano aya ifanan gen, ayag tano ã afeneik. ³⁰Age afe di, ã neu tanon, tebol bun saaf ado naan wãgauf, king nē sia bun ubodōg fen, Israel ibor tuwelf es gouf.

³¹“Simon, Simon, tamo wit biya ado wit ido foi fiya nigin age fedig gen, Satan ĩ āgenei momoiya kisi yei fenē nigin to fen. ³²Anĩ ere, aya, Simon ō nigin ogon momoiya to urofosiyouf nigin kosē aun. Anĩ nigin, sain ō kelouf, turã tar megeir wediyouf.”

³³Anĩ ere, Pita aiten yale iron, “Odug, aya ō ado kalabus bun ado, laa bun ileya nigin dodok afel.”

³⁴Age ye di, Jesus iron, “Pita, aya ō arokonok, gama fau tataro kokorok yeya sã mog, ō wa fen, aya nigin keleĩ sã wo, towo wouf.”

³⁵Age ye fen, Jesus idi to fedin, “Sain aya ã moni nē kodol, faa be, su sã sur ayein, ã ere taka lau gen de?” Idi solo de diron, “Sã.”

³⁶Age de di, Jesus idi irokenēdin, “Anĩ ere, gama taka ĩ moni nē kodol adouf, yalouf, faag age fiya, taka ĩ dimig sã, yogon gabar na nigin sur fe fen, taka na yalouf. ³⁷Negur nē Itotoya bun eig ye ibodok, ‘Ī tamo sesen geid bagu difedin.’^d Aya ã arokeneik, enei aya bun kisi fel, agef wō youf. Ariya, aya nigin itoton are mogo kisi felef.”

³⁸In dō fiya tar diron, “Ulef, Odug, dimig uru yeir.” Age de di, ĩ iron, “Are de.”

Jesus Moul Arein Kosē Yen
(*Matyu 26:36-46; Mak 14:32-42*)

³⁹Agef fen, Jesus aabē tamal ulō yeis fen, gai age fedig gen, Moul Arein iselen, age fe di, in dō fiya tareg ĩ dō difiyen. ⁴⁰Modou anĩ bun wō de fen,

^d 22:37 Asaia 53:12

Jesus in dō fiya tar irokenēdin, “Kisi fiya bun to kubū gouf nigin kosē wog.” ⁴¹Jesus yogon dō fiya tar itorneīd, meein irā di, ile kubū youn age fiyan ile, ibor bobou fe fen, kosē yen, ⁴²“Dei, ō oroyōf are, kap enī aya bun walelauf. Anī ere, neu oroya to dō wouf, on oroya dō wo.” ⁴³Engel taka saa ilun tamal, ī bun wō ye fen, megeir ifenen. ⁴⁴Age fe di, Jesus wau morō fatuk fe di, ī totol bagai kosē yen, age fe di, maab, naud isidig gen, tenebur kuku ren.

⁴⁵Ī kosē yel fen, fā ye, in dō fiya tar gedin kel ile, waud gudū falaisil, den mog, ileidin. ⁴⁶Agef fen, Jesus idi to fedin, “Ere nigin mulaī wenēgef? Ā kisi fiya bun to kuku gouf nigin fafāg fen, kosēg.”

Jesus Dirounen

(*Matyu 26:47-56; Mak 14:43-50; Jon 18:3-11*)

⁴⁷Jesus fau wogō ye mog, tamo musei disin, tuwelf in dō fiya tar idi anī atun taka, Judas dedig inim uyu iroukenēdin. Ī Jesus umā fiyēf nigin non ilen. ⁴⁸Anī ere, Jesus ī to fiyen, “Judas, ō umāya bunem Tamo Naal kiwai wenēf de?”

⁴⁹Sain Jesus nē dō fiya tar, ereb wō you fenē age fe di, dile fen, idi diron, “Odug, amā nemā dimig nem madenauf de?” ⁵⁰Age de fen, idi takam, pris mudur ado nē ferfer weder biyalē anī salōf iran.

⁵¹Anī ere, Jesus iron, “Baban enei to ago gouf!” Age ye fen, ī tamo anī nē weder kobūf fen, el fiyen.

⁵²Agef fen, Jesus, pris odudug, tempel lo fiya tamo neid uyu irouya geid, mudur adodo, ī nigin disin anī irokenēdin, “Ā bē tamo urounēgouf gen, ā dimig adodo seburer adodo usigef de?” ⁵³Naa ganan, aya ā geid tempel bun tabodon, anī ere, ā aya bun imeī taka to unogen. Anī ere, eī āgenei sain, are gugum irouneik nigin.”

Pita Jesus Nigin Wa Fen

(*Matyu 26:57, 58, 69-75; Mak 14:53, 54, 66-72; Jon 18:12-18, 25-27*)

⁵⁴Idi Jesus dale, diroune ken, pris mudur ado nē fō bun dirou dilen. Pita ī so rel fen, dumeid dō fen. ⁵⁵Anī ere, sain idi fofomala atun yā kū de dibodon, Pita īg an weim dibodon, ⁵⁶Kabī kayau momoul taka, Pita yā sirin ibod mog, ilen. Kayau momoul anī Pita lo fel fen, iron, “Tamo eneig ī geid.”

⁵⁷Anī ere, Pita waf fen, iron, “Kayau, aya ī keleī sã.”

⁵⁸Sain naal ile di, taka nem ī ile fen, iron, “Ōg idi neid taka.”

Anī ere, Pita iron, “Mou, aya sã!”

⁵⁹Aua tekelei age fiya ile di, taka bagam ī nigin totol iron, “Momoi bagai, tamo eneig ī geid diyon, ere nigin, īg Galili tamal.”

⁶⁰Anī ere, Pita aiten yale iron, “Tamo, ō urok anī aya keleī sã!” Ī irō mog bagai, tataro kokorok yen. ⁶¹Odug falei yel, Pita lo felen. Age fe di, Pita Jesus

wogō fiyen anī nigin weder fokō yen, “Gama fau tatara kokorok yeya sā mog, ō aya nigin wa wo, towo wouf.” ⁶²Age fe di, ī mayarē ile fen, inā fatuk yalen.

Kusī Tamo Jesus Diselinen
(*Matyu 26:67, 68; Mak 14:65*)

⁶³Tamo Jesus dirounen idi, ī diseline ken, wagī difiyen. ⁶⁴Age dife fen, idi Jesus mala difofakel fen, to difiyen, “Kurō weis urokanamā! Aim ō inok?” ⁶⁵Age de fen, idi kono fiya od musei dirokenen.

Jesus Juda Kaunsel Neid Kot Mala Bun Ifaren
(*Matyu 26:59-66; Mak 14:55-64; Jon 18:19-24*)

⁶⁶We fele di, tamo kayau neid mudur adodo neid kaunsel, are pris odudug, lo ifelnēdiya tamo geid, weim guru de mog, Jesus idi gedin dirou dilen. ⁶⁷Idi diron, “Ō Kristus ouf are, amā urokanamā.”

Anī ere, Jesus aitedin yale iron, “Aya ā arokeneif are, ā to momoi gouf, ⁶⁸agef fen, aya ā to ayeifeg, ā to solog urōgouf. ⁶⁹Anī ere, gama sain enei bunem ilauf ganan, Tamo Naal ī, Negur megeir ado ima biyalem ibodōf.”

⁷⁰Age ye di, idi ganan to difiyen, “Age fouf are, ō anī Negur Naal de?”
Ī aitedin yale iron, “Ā de urōgef, aya anī.”

⁷¹Age ye di, idi diron, “Ere nigin ada, ī nigin od megeir fiya nigin tamo baban tamirēf? Ada ī sigoron bagai karī taul.”

Jesus Pailat Herod Ado Meleid Bun Ifaren
(*Matyu 27:1, 2, 11-26; Mak 15:1-15; Jon 18:28–19:16*)

23 ¹Age de fen, guru fiya ganan fā de, Jesus Pailat bun dirou dilen. ²Age de fen, idi mogo gariya dino, ī bouwa bun od du ken, diron, “Amā, tamo enei nemā tamo kayau ganan idegēya bunem sanen guri feid irou ile mog, mailen. Ī Sisa takis ifenēya nigin katū fiyeid fen, ī yogo nigin aya Kristus, aya king yen.”

³Anī nigin, Pailat Jesus to fiyen, “Ō Juda neid king de?” Jesus solof iron, “Are de yer, ō urok anī.”

⁴Age ye di, Pailat ī, pris odudug, tamo kayau geid irokenēdin, “Aya tamo enei bou bun mosor taka to ailel.”

⁵Anī ere, idi totol dinon, “Ī Judia distrik ganan bun, in ifelnēya bunem tamo kayau waud yalen. Ī Galili an gariya ino fen, tokō fel eineg isin.”

⁶Pailat anī karī ye fen, ī Galili tamal be anī to fen. ⁷Pailat ī, Jesus Herod nē tano bun tamal yeya kelei ken, Herod gein sur fen, Herod īg sain anī bun Jerusalem ibodon.

⁸Herod Jesus ile fen, wau fatuk kulī yen, ere nigin, sain meluk bagai ī ileya nigin oron. Ī nigin karī yen nigin, Herod ī Jesus bun memelik tunī ilouf nigin age fen. ⁹Herod Jesus musei bagai to fiyen, anī ere, Jesus taka to solof iron. ¹⁰Pris odudug, lo ifelnēdiya tamo geid an difaren, ī

bou bun od total bagai dinon. ¹¹Age dife di, Herod yogon kusī tamo geid, Jesus kasā difiye ken, kono difiyen. Age dife fen, kolos biya difounne ken, Pailat wagen sur difiyē di, kel ilen. ¹²Naa anī bun, Herod Pailat ado nugal dun, uruwa bun idi uruwom kiwain.

¹³Pailat ī, pris odudug, mudur adodo, tamo kayau geid iweigneīd fen, ¹⁴irokenēdin, “Ā tamo enei, tamo kayau waud yale fen, sane nigin weleid inon ge fen, waleg, urou usigel. Aya ā meleī bun to afiyem, anī ere, ā ī bou bun od unogen anī, tamo enei bun gariya taka to ailel. ¹⁵Herod īg age fiya, anī nigin, ī kel sur fe di, ada gein isil. Anī ulogouf, ī yukesiya nigin erob sane taka to age fen. ¹⁶Anī nigin, aya darau dogol afen ken, atornēf.”^e

¹⁸Anī ere, idi sigoreid takai fen, diweig diron, “Tamo enei ukesiyouf! Barabas walis kanamā!” ¹⁹(Barabas ī anī taun oun kusī yales fen, tamo yukesin nigin, kalabus bun dinenen.)

²⁰Pailat, Jesus yalisenya nigin baban total bagai irokenēdin. ²¹Anī ere, idi baba baban diweig diron, “Aa tetek bun ūf! Aa tetek bun ūf!”

²²Age de di, Pailat ī irō, towo fen sain bun anī irokenēdin, “Ere nigin? Tamo enei, ere mosor inon? Aya ī yukesiya nē gariya anī, ī bun taka to ailel. Anī nigin, aya ī darau afen ken, atornēf.”

²³Anī ere, idi aiteid odudug fen, ī aa tetek bun yūf nigin, baba baban dirokenen. Age dife di, dogo neid aitedim, Pailat nē od lai difiyen. ²⁴Anī nigin, Pailat, nedi oroya dō fiya nigin kisi yale fen, irokenēdin. ²⁵Pailat ī, tamo kusī yales fen, tamo yukesi di, kalabus bun dinenen ī nigin tamo kayau to difiyen anī, yalisne ken, dogo neid oroya dō difouf nigin Jesus ifenēdin.

Jesus Aa Tetek Bun Dun

(*Matyu 27:32-44; Mak 15:21-32; Jon 19:17-27*)

²⁶Idi Jesus dirou dile fen, Simon Sairini tamal, ī yogon fonom isi mog, luwen ī dale, aa tetek orowa se dife di, faali fe, Jesus dō fen. ²⁷Tamo kayau musei, kayau idi ī nigin waud gudūf fen, inā dalen geid, dō difiyen. ²⁸Anī ere, Jesus idi bun falei yel, idi irokenēdin, “Jerusalem nē barai tar, aya nigin inā to waleg, ā aug nigin ado gereī tar nigin inā waleg. ²⁹Ere nigin, sain fau isiyouf bun, idi dirōf, ‘Kayau dali, kayau fau kesu gō fiya sā, kayau kesu su ifenēya sā anidi el fedif!’ ³⁰Age de fen,

“‘idi arei dirokenēdiyof, “Teteman kukug!”

arei mudu dirokenēdiyof, “Kerub wamāg!”’^f

³¹Tamo, aa mata mog, enei age difedif are, meti youf sain bun, ere wō youf?”

^e 23:16 Itotoya tunī eig de ditoton: *atornēf.* ¹⁷ *Gama ī, kalabus bun tamal tamo taka, Sifa bun yalis kenēdiyof bagai.* ^f 23:30 Hosia 10:8

³²Lo wal fiya tamo uru idig, ĩ geid laa bun dinenēdiyof nigin dirou dilen. ³³Sain idi modoū yana Mudur Tuwan dedig wō de fen, an Jesus aa tetek bun dun, lo wal fiya tamo uru geid, taka biya melem, taka ki melem. ³⁴Age dife di, Jesus iron, “Dei, idi neid mosor nigin weder tu kel, ere nigin, idi keleī sa ken, enei age difef.” Age fe di, idi aisaī kodē de fen, yogon kolos idi atun foifu difen.

³⁵Tamo kayau difar fen, lo difeid mog, mudur adodomeg ĩ kasā difiyē diron, “Ī tunī isennēdin, ĩ Kristus Negur igirnen ouf are, utornēg len, yogou bouwa isennēf.”

³⁶Kusī tamog dise fen, diselinen. Idi wain makik ado difen ken, ³⁷diron, “Ō Juda neid king ouf are, ogo boū usennēf.”

³⁸Ī muduren itotoya eig ya yenen: EĪ JUDA NEID KING.

³⁹Lo wal fiya tamo aa tetek bun difaren anī takam, Jesus kono fiyē iron, “Ō Kristus ouf are, ō ogo usenne ken, amā usennamāf!”

⁴⁰Anī ere, lo wal fiya tamo taka im, ne tā ou fiye ken, iron, “Ō kafī fiya tekelei walef, anī ere, ō Negur to kumī wiyek de? ⁴¹Ada urom darau talef, are de, ere nigin, ada urom sane age tafen anī mala solo. Anī ere, tamo enei ereb sane to age fen.”

⁴²Age ye fen, ĩ Jesus irokenen, “Jesus, sain ō ogon tano bun usel fen, aya karī wiyalauf.”

⁴³Age ye di, Jesus tamo anī irokenen, “Aya ō momoi arokonok, gama ō aya ado paradis bun tabodōf.”

Jesus Laa Fen

(*Matyu 27:45-56; Mak 15:33-41; Jon 19:28-30*)

⁴⁴Gaa atun tuwelf kilok age fiya bun, teneub ganan bun gugum kelef ile, tri kilok aragaun, ⁴⁵ere nigin, gaa mala ifokelen. Age fe di, tempel nē gabar anī atusil serek fe, uru wō yen. ⁴⁶Jesus ait odug nem iweig iron, “Dei, neu uur ō imā bun anof.” Agef iro ken, ĩ oboi irour yalen.

⁴⁷Kusī tamo neid orowa, Jesus age fiya ile fen, Negur yana yales iron, “Momoi, tamo eī madur tamo.” ⁴⁸Tamo kayau ganan idi lo fiya nigin guru difen, ereb anī wō ye di, meledim dilen, are idi waud gudūf fen, akoreid du ken, firagagaū difen. ⁴⁹Anī ere, idi Jesus keleī anidī ganan, idi atun kayau Galilim ĩ dō de disin anidig, so del difar fen, eneidi wō ye di, lo difen.

Jesus Mū Difen

(*Matyu 27:57-61; Mak 15:42-47; Jon 19:38-42*)

⁵⁰Tamo taka yana Josef, ĩ kaunsel taka, madur tamo biya bagai, ⁵¹anī nigin, ĩ idi neid tobonuneid ado od difon anī nigin to yo yen. Ī Judia distrik bun Arimatea taun tamal, ĩ Negur nē tano isiyouf anī tari fen. ⁵²Josef ĩ, Pailat gein ile, Jesus bou buru yalouf nigin to fiyen. ⁵³Agef fen,

ĩ Jesus bou buru yale, irou isil, gabar lalau nem silef fen, matmat sa bun ku dalen an inenen, ku anĩ bun an taka to dinenen. ⁵⁴Naa anĩ dodok fiya naa, Sabat naa mogo gariya inou fenē melsā.

⁵⁵Kayau Jesus geid Galilim disin, Josef dō de, matmat ado, Jesus bouwa buru naig de dinof anĩ, lo difen. ⁵⁶Age difel fen, idi fonō dile, bou wā fiya nē marasin ado moul sumeĩ biya bagai dodok difen. Anĩ ere, idi Sabat naa nigin itāfiya dō de fen, si dinon.

Jesus Mata Kel Fā Yen

(*Matyu 28:1-10; Mak 16:1-8; Jon 20:1-10*)

24 ¹Uub nē naa matu bur⁸ bonimeĩ bagai mumurei ado, kayau idi, bou wā fiya nē marasin dodok difen anĩ dale fen, matmat bun dilen. ²Age dife fen, idi matmat bun meein wele feleya dilen. ³Anĩ ere, sain idi meku namen dilen, idi Odug Jesus nē bouwa buru an to dilen. ⁴Idi enei nigin kisi musei dale mog bagai, tamo uru kolos medeĩya barikā siridin difaren. ⁵Age dife di, kayau kumĩ de fen, kususu de, teneub lo difen, anĩ ere, tamo idi kayau dirokenēdin, “Ā ere nigin laa atun mata tamo umirnēgef? ⁶Ī ein sā, ĩ mogo fā yel! Ī Galili oun ā geid ubodōg fen, irokenein anĩ, wederei fokō youf, ⁷ĩ iron, “Tamo Naal mosor adodo imeid bun dino di, ĩ aa tetek bun dukesiyouf, age dife di, naa towo bun, ĩ baban mata kel fā youf.” ⁸Age de di, kayau idi, in od anĩ wedereid fokō yen.

⁹Sain idi matmat bunem ke de, disĩ fen, aposel ilewen tunĩ ganan geid, enei ganan wogō difiyēdin. ¹⁰Kayau idi are Maria Magdala tamal, Joana, Maria Jems nē sina. Kayau anidi, kayau tunīg geid, enei aposel wogō difiyēdin. ¹¹Anĩ ere, idi kayau nigin to momoi den, ere nigin, kayau neid od, idi bun auya gen. ¹²Anĩ ere, Pita fā yale, matmat bun gudu re ilen. Ī ku bun itin, gabar lalau dogol yen mog, ilen, agef fen, erab anĩ wō yen anĩ nigin, ĩ kisi musei yalef ile, yogon fō bun ilen.

Emaus Naab Luwen

(*Mak 16:12, 13*)

¹³Naa de anĩ bun, idi neid tamo uru, fonō taka yana Emaus dilen, Jerusalem anenem Emaus are ilewen kilomita age fiya. ¹⁴Idi urom, erab erab ganan wō yen anĩ abob dirokenek dilen. ¹⁵Idi eneidi nigin diro ken, katō de dile mog, Jesus yogo isi, weim diyok dilen. ¹⁶Anĩ ere, idi Jesus keleĩya nigin meleid ifofakelen.

¹⁷Age dife di, Jesus idi to fedin, “Ā ere nigin naab luwen katō ge usigef?” Idi dē del fen, idi neweid wau gudū fiya ado agogon delen. ¹⁸Idi taka yana Kleopas Jesus solof irokenen, “Ō ege Jerusalem nē ki tamo nigin, naa eneidi bun an erab erab wō yen anĩ, ō keleĩ sā de?”

¹⁹Age ye di, Jesus idi irokenēdin, “Ere bagai?” Idi Jesus dirokenen, “Jesus Nasaret tamal nigin. Ī profet taka, Negur ado tamo kayau ganan meleid

⁸ 24:1 Are Sande.

bun, od ado tobonunā bun megeir barikā. ²⁰Pris odudug, neda mudur ado idim, ī laa bun dinenēf nigin imeid bun dino di, aa tetek bun dukesin. ²¹Anī ere, amā waumā iron, im anī Israel tamo kayau kel gei foug maun. Anī dogol sā, enei ganān wō yen are, gama naa eneim mogo naa towo ilef. ²²Takag, amā nemā kayau tunīg, amā terē difamam. Gama bonimeī bagai, idi matmat bun dilel, ²³anī ere, idi yogon bouwa buru to dilel. Idi dile, meleid seleulā kurāf fen, engel diledin, engel idi dirokenēdil, Jesus ī mata ibodok, difiyēdi di, disi, amā dirokanamam. ²⁴Age de di, amā tunī matmat bun dile, kayau wogō del gen bagai dilel, anī ere, idi Jesus to dilel.”

²⁵Jesus idi irokenēdin, “Ā neneya bagai, ā profet wogō den anī ganān, wauī bun momoiya nigin folo reya bagai! ²⁶Kristus ī darau enei yale fen, yogon fula fiya medeīya namen to ilauf de?” ²⁷Age ye fen, ī Moses ado profet ganān neid itotoya bunem gariya ino fen, yogo nigin Negur nē Itotoya ganān bun ibodok anī, idi faded fedin.

²⁸Idi fonō dilef nē anī kelē difiye ken, Jesus tokō feleya nigin suma ino genen. ²⁹Anī ere, idi totol bagai dirokenen, “Amā geid tabodōf, ere nigin, gaa mogo kuru kelef, gugum irousif.” Anī nigin, Jesus idi geid dibodōf nigin namen ilen.

³⁰Sain ī idi geid tebol bun dibod ken, ī bret yale, Negur de fiyē, mumāf fen, gariya ino ifenēdin. ³¹Age fe di, idi meleid fara fele di, idi Jesus nigin kelein. Age dife di, ī idi meleid bun iminkelen. ³²Idi abob dirokenen, “Sain ī naab luwen wogō fada fen, Negur nē Itotoya faraf ifelnadal mog, ada namedan wauda to tōf yalel de?”

³³Age de fen, idi fā de dale, kaisā bagai Jerusalem keku de dilen, an idi aposel ilewen, tamo tunī idi geid, guru de difar mog, fotou difedi di, ³⁴diron, “Are momoi! Odug fā ye fen, Simon bun wō yen.” ³⁵Age de di, tamo uru ereb naab luwen wō yen ado, Jesus ī bret mumā fe di, idi Jesus nigin naig de kelein anī wogō den.

Jesus In Dō Fiya Tar Bun Wō Yen

(*Matyu 28:16-20; Mak 16:14-18; Jon 20:19-23; Aposel 1:6-8*)

³⁶Idi fau enei nigin wogō de mog, Jesus yogo idi atun ifar fen, irokenēdin, “Wau inosiya ā ado ibodōf.”

³⁷Idi baraū mailef de fen, terē de fen, kumī den. ³⁸Age dife di, Jesus idi irokenēdin, “Ere nigin ā wauī morō fef, ere nigin ā wauī bun kisi uru wō yef? ³⁹Aya imau yeu ado feleg. Eī aya yug bagai! Kobū wiyag fen, uleg. Baraū ī aya bouwau ado, tuwau ado uleyagef gen sā, ī bou sā, tuwa sā.”

⁴⁰Jesus enei iro ken, ī ima ye ado ifelnēdin. ⁴¹Age fe di, idi waud kulīya ado terēya bunem, fau waud to momoi de di, Jesus idi to fiyēdin, “Ā ereb yōya nē taka ein tau ado?” ⁴²Idi gau yā tamal masak taka difenen, ⁴³age dife di, Jesus gau yale, meledin yon.

⁴⁴Jesus idi irokenēdin, “Enei are, aya fau ā geid tabodon sain bun arokenein. Ereb ereb ganān, aya nigin Moses nē Lo bun, profet neid itotoya bun ado, Buk Sam bun ditoton anī ganān kisi falauf bagai.”

⁴⁵Agef fen, Jesus idi Negur nē Itotoya keleĩ youf nigin, waud kã fenēdin. ⁴⁶24 ⁴⁶Ĩ idi irokenēdin, “Negur nē Itotoya bun eig ye irok: Kristus ĩ fau darau yale fen, laa bun tamal naa towo bun mata kel fã youf, ⁴⁷age fe di, wau faleiya ado, mosor nigin weder tu keleya nē od anĩ, fau ĩ yana bunem teneub ganan bun, Jerusalem anenem gariya dino fen, wogō de dilauf. ⁴⁸Ã enei ulegen nigin kurō walaisi gouf. ⁴⁹Aya esel fen, neu Dei sur afouf yen anĩ, ã bun sur afouf, anĩ ere, taun anĩ bun ubodōgef uleg, ã megeir saa ilun tamal anim ifounneĩf.”

Jesus Saa Ilun Iselen

(Mak 16:19, 20; Aposel 1:9-11)

⁵⁰Sain Jesus idi gurif irou, Betani non dilen, an ĩ ima yales fen, el fiya ifenēdin. ⁵¹Ĩ idi el feid le fen, ĩ itornēdi di, saa ilun irou iselen. ⁵²Age fe di, idi ĩ yana dales fen, waud kulīya odug ado, Jerusalem ke de dilen. ⁵³Age de fen, idi tempel bun toku dibod ken, Negur yana dalesedig.